

हनेवहम्ह भाजु डॉ. तेजलन कसा:या
दुनुगले

खेलुइता:

(साहित्यिक दँ-पौ)

स्वंगूगु दँ

ने. सं. ११०२ हापुजा

स्वंगूगु ल्या:

सम्पादक

नरेन्द्रमान श्रेष्ठ

बिजयेश्वर बैद्य

व्यवस्थापक

रावेश शिल्पकार

सह - सम्पादक

केदार 'सितु'

सह - व्यवस्थापक

तीर्थराज बज्र० एस० एन० चित्र०

पिकाक

खेलुइता: पिकाक गुथि

ललित अध्ययन गोष्ठी,

तंग: त्वा:, यल ।

मू: ३।-

सल्लाहकार

स्वयम्भूलाल श्रेष्ठ

जनकलाल बैद्य

नर्मदेश्वर प्रधान

दुज:

जुजुभाइ चित्रकार

बद्रीनारायण नकर्मि

प्रकाश राजकर्णिकार

श्याम कृष्ण रंजित

देब:

वत्स गोपाल बैद्य

थाकू

मञ्जुश्री प्रिन्टिङ्ग प्रेस

इखाछे त्वा:, यल ।

फो. ल्या: २१५०८

नेपाल सम्वत् ११०२ न्हू दँया लसताय

व्याक नेपा:मिपिन्त जिमिगु

-भितुना-

संसारया थीथी देशं व:गु भिंगु, बांला:गु, बल्ला:गु
व ल्व:वनापुसे च्वंगु थीथी सामानत मा:सा जिमिथाय् मासँ !

गीफ्ट हाउस

विशाल बजार, येँ ।

फो. ल्या: १४,६४४ ।

ने. सं. ११०२ न्हू दँया लसताय

भितुना

रेडियो, क्यासेट, ट्रान्जिस्टर, टेपरिकर्डर,

क्याल्कुलेटर व थीथो इलेक्ट्रिक व

इलेक्ट्रोनिकसया सामानत

मर्मतया लागो जिमिथाय् झासँ !

जिमिथाय् भिडियो मर्मतया ज्या नं जुइ !

नापं अफिस कन्टाय्कटया लागि स्वापू तयादिसँ-

रेडियो एण्ड इलेक्ट्रोनिकस सर्भिसिङ्ग सेन्टर

तंग:, यल ।

तया वयाचवनागु दु नापं हे की कीया दुने गुगु नं पंगलःत चीकाः छप्पं
छधी जुयाः सः तय्या लागी व्याक्क उपेक्षित भाषाभाषिपिन्त इनाप या
वयाचवनागु दु । अथे हे थुगु स्वंगुगु ल्याः नं उगु सःया मेगु लिध्वः सः खः

अन्त्यय, थुगु ल्याः पिकायूत च्वसु विरादीपि च्वमि भाजु मय्जुपि
विज्ञापनदातापि, माःगु सुराव व नैतिक तिवः विरादीपि हनेवहपि
पासापि, नापं पत्रिका इलय हे पिकायूत लगनशील जुया ग्वहापि
यानादीपि मञ्जुश्री प्रिन्टिङ्ग प्रेस व चामुन्द्रा प्रेसयात जिमिगु शुभाय
अले इलं भाय् मल्लाना तःपुमछि हे ग्यसुग्यंगु च्वसुत थुकी दुध्याके मफुगु
च्वमि भाजु मय्जुपिके क्षमा फवना । नापं ने. सं. ११०२ दं क्यंगु लसत
सकल मानव मात्रयात भिन्तुना !

ने. सं. ११०२ न्हू दंया लसताय्

व्याक्क ग्राहकवर्गपिन्त

- भिन्तुना -

छिकपिन्त माःगु ली, सिजःया, घः, फवसि, बाता,
अय्लाः काय्गु डिस्टिलरी व मेमेगु नं फर्मासि बसाःत
माःसा लुमंका दिसँ ।

ताम्राकार सहकारी संस्था लि.

पाटन औद्योगिक क्षेत्र, यल ।

ने. सं. ११०२ न्हू दंया लसताय्

- भिन्तुना -

हिसि दुगु, बांलाःगु, बल्लाःगु थःगु देशय् दय्कूगु
तैय्या गलैँचा व जाकेट माःसा लुमंका दिसँ ।

महाबौद्ध कार्पेट उद्योग

पाटन औद्योगिक क्षेत्र

यलः

चिनाखँ

पुरुखापिनिगु ह्यगस	सिद्धिचरण श्रेष्ठ	१
यःहा गुबलेँ सीमखु	दुगलाल श्रेष्ठ	२३
विचार महिमा	जगदीश चित्रकार	५१
न्हू-दं	नारद वज्राचार्य	७०
मोहनि वल ला थें ?	पुष्पराज राजकर्णिकार	११९
थःत मालाचवनावलय्	सुदन खुसः	१४०
दबू	(मुक्तक तँसा)	१५७

बाखँ

टेलिफोन कल	शुशीला साय्मि	५५
विस्थापन	केदार 'सितु'	६३
जीर्णोद्धार	केशरमान ताम्राकार	९७
व्यवस्था	राजेन्द्र यादव	१४९

चवखँ

जि छगू अभिव्यक्ति,...	पूर्णवहादुर वैद्य	७३
गेटअप	फणिन्द्ररत्न वज्राचार्य	१४७

समालोचना

समीक्षाया दापू	रत्नध्वज जोशी	१७
आनन्दजोशी- जि 'जि' मखु	माधवलाल कर्माचार्य	१०५
छन्दः छगू तर्क	चर्मदेश्वर प्रधान	१४१

अनुसन्धान

मध्यकालया अभिलेखय्...	डा० कमलप्रकाश मल्ल	३
अनुसन्धान ज्वलं ताःलाकालि	जनकलाल वैद्य	२७
कवि सुन्दरानन्द- छगू चर्चा	धनवज्र वज्राचार्य	५९

उपन्यास

- १) जिगु म्ये छंगु खः ! भूषणप्रसाद श्रेष्ठ १२१
- पुलां वाखं**
- १) छवांयतयगु देश मुं० करुणाकर वैद्य २४
- पुलां-म्ये**
- १) पुलांगु म्ये मुं० प्रेमबहादुर कसाः २
- खेल्हावलहा**
- १) भाजु कृष्णचन्द्रसिंह प्रधान नाप छकाः ५३
- वमिया लिचवः**
- १) ने. सं. ११०१ या खेलुइताः, ... आशाराम शाक्य १५२

ने० सं० ११०२ न्हू दँया लसताय्

—भितुना—

छिकपिन्त माःगु स्टेशनरी सामानत, थोथी प्रकारया भव, अफिस सामानत व इन्जिनियरिङ्ग सामानत माःसा सेवाया लागी तयार दु ।

कागज कोठी

प्युखाः, खिचापुखू, यें ।

फो. ल्या. ११४२९

ने. सं. ११०२ न्हू दँया भितुना

धलिं, थां, सतरी, ऊयाः, चौकोस आदि छेँयात माःगु विभिन्न साइजया सिँ माःसा लुमंका दिसँ ।

बंगलामुखि काठ कार्यालय

प्याःपुखू, यल ।

खेलुइताः

पुरुखा पिनिगु म्हगस

—सिद्धिचरण श्रेष्ठ

जिमि हे पुरुखापिनिगु हिचःति मुनाः दयाचवंगु धव जिगु दे बिलिबिलि जायाचवंगु अमिगु हे माया-मतिना खः जिगु म्हय लख दुन्य क्वसिना चवंगु धव धर्ति अमिसं हे खः पित हःगु वा-फ्य, खुसिबाः, निभाः मधास्ये थःत धवया निति पयाःगु ।

छेँ, बुँ व ख्यः क्यव थाय्वाय् सकतां खः पुरुखापिनि हे छेँगू ल्वानाः, ख्यानाः, स्यानाः व सिनाः थ्वेत सदां म्वाका तःगु गाः, ध्वप ल्हाकाः, कंसाः चीकाः अथ्याःथाय् माथं वंकाः गां, पाः, दे, लँपु अमिसं खंगु जीवन गुँखि मीगु ब्वलंकाः ।

जिगु प्ये, जिगु घुटु, जिगु तिय पुन्य नं खः पुरुखापिनिगु हिचःति अमिगु म्हगस खः, स्वयम् जि हे नं न्हयैपुस्य चवंक्यत थुगु सृष्टि छिक्यत, भिक्यत, यैपुस्य चवंक्यत थन जियां लिपा वैपित आय्बू जि सदां खेलुइताः थें जःया नं जःतु ज्वीत ।

खेलुइताः

(१)

पुलांगु म्ये (राग, सिन्हाज्या)

मुम्हः- प्रेम बहादुर कसाः

हुनि हुनि सखी छन वम्ह व्वना बिहुनि ॥५॥
सपनास खनिव जिथास ओयिव
अनेग लसया ख ल्हायुव
दनाव स्वया जिन छम्ह मदयिओ
जि मन ओयुनि थे त्यनिओ ॥१॥
पान रुमनिओ नय मजियाओ
वनयो जि बि(र) हन गनाओ
सरिल मझिनाओ लाहाति केनाओ
बैद्यन जिगु रोग मसिओ ॥२॥
ला जावभन जुरयो प्रभुन मदु स्वओ
व्हनकिओ जिगु दुख सियाँओ
कान्हजु बोना बिओ जि मन चोनिओ
अनेग पुण्य फर लायुओ ॥३॥
राजा फची तथओ जि वने मजिओ
जि वने लोकन छु धायुओ
सखी छ वनाओ बोनाओ जित बिओ
सहस्र बिनति ख ल्हानाओ ॥४॥
जि व म्हमसिओ सु भक न्यनिओ
ध्वम्ह धक कने जि मसयुओ
स्यनाव छोओ जित छता मत्यनक रे
ल्हाकम्ह कृष्णजुन खनिव ॥५॥

(२) ।

अनुसन्धान

मध्यकालया अभिलेखय् नेपाल भाषा

डा० कमलप्रकाश मल्ल

१. न्ह्यखँ

१.१ बिस्कि बिस्कं खंवःया कथं लिच्छवि अभिलेखया शुरु निसँ हे नेपाल भाषा छ्यलातः गु खने दुसां पूर्वगु वाक्य बाय वाक्यांशया रूपय् नेपाल भाषा छ्यला तः गु दसि ने० सं० २९३ या सक्कया ल्वहँपोया स्थापायागु मल्लुनि । ग्रन्थ रचनाय् नेपाल भाषा छ्यलातः गु प्रामाणिक दसि नं ने० सं० १०० या जःखःया हे जक खने दु । नेपाल भाषाया गठन व स्वभावया इतिहासिक खोजि व अध्ययनया लागि मूज्वलंया रूपय् मध्यकालया प्राप्य अभिलेख तसकं महत्वं जाः । थ्व ईया अभिलेखया प्रामाणिक संग्रह व कलन पिमदनिसां थ्व बःधगु टिप्पणीया लागि भाजु हरिराम जोशीजु माचीन नेपाल या थ्यल्याः ५३-५८ (भदौ-चैत्र २०३६-असार-साउन २०३७) स पिदंगु ९६ गू अभिलेखया गुहालि कायत्यन । नेपाल सम्बत लिस्था जूसां निसँ ने० सं. ३२० सं मल्ल वंश शुरु मजुतले पूर्व मध्यकाल, ने. सं. ३२० सं निसँ ने० सं० ६०२ स नेपालाःया राज्य उच्चा मदःतले मध्यकाल, व ने. सं. ६०२ निसँ ने. सं. ८८८ तक उत्तर मध्यकाल धकाः इतिहासवेत्तापिसं प्रचलनय् हःगु काल-बिभाजन कथं थन । सं. ३९० निसँ ने. सं. ६०२-थ्योमथ्यो स्वसाःदेया दुने पलिस्था नातःगु अभिलेखय् छ्यलातःगु नेपाल भाषाय् छपुलु बिइत्यनागु दु ।

१.२ ने. सं. १ निसँ ने. सं. ३२० तक दुनेया कालयात गुम्हं गुम्हं इतिहासकार “अन्धकारया युग” धकाः नां छुगु दु । छायाःसा थ्व साः व चाःचू देया दुने अभिलेखया प्रमाण साप हे म्हो । जोशीजुया

लेखिताः

लेखिताः

(३)

Medieval : MS 320 - 602

संकलनय् थ्व ईया २६ गू अभिलेख खने दु । व फुकं संस्कृत भासं हे जक । गुलि 'दु उलि नं चिचिहाकःगु व खण्डित । ने. सं. ३२० निसं ने. स. ६०२ तकया अभिलेख मध्यय् नेपाल भाषा छ्यलातःगु दकले पुलांगु अभिलेख ने. सं. ३५३ या मोतीटारया ३ ऊवः दुगु अभयमल्लया पालय्या अभिलेख खः । अनलि स्थितिमल्लया उदय (ने. सं. ५००) न्ह्यःया अभिलेखय् नेपाल भाषा छ्यलातःगु छगू महत्त्वपूर्णगु खः, ने. सं. ४५४ मदुसतःया सिजः पो । स्थितिमल्लया इलय् नेपाल भाषायात बुलुहुं छुं भतिचा थाय् बिबा हःगु खने दु । ज्योतिर्मल्ल (ने. सं. ५३०) निसं 'अथ पर नेपाल भाषा' धकाः अलग हे नेपाल भाषां छे हनेगु नीस्वनेगु ज्या जुइ ।

१.३ अभिलेख पलिस्था यायगु ज्याय् संस्कृतया मू भूमिका जुइगु स्वाभाविक खः । संस्कृत 'देव भाषा' अले नेपाल भाषा 'लोक भाषा' जक । अभिलेख पलिस्था यायगु ज्या छगू पुण्य कमेयायगु व कीर्ति स्थापना थाय्गु ज्या जुल । संस्कृत छगू परिस्कृत व स्तरीकृत भाय्, नेपाल भाषा छगू खल्लाबल्लाया जनभाषा जक । उके संस्कृत भास शिक्षा-दीक्षा कयाः समाजय् च्वय् थ्यनाच्चवि शाक्य, वज्जाचार्य, ब्राम्हण, आचार्य, देवज्ञ व कायस्थपिसं संस्कृत त्वःता मेगु भासं अभिलेख च्वय्त थाकुइगु अस्वाभाविक मखु । प्राचीन कालं निसं हे नेपालय् शिक्षा-दीक्षाया भाय् संस्कृत हे खनेदु । उलि जक मखु सनातन धर्म व महायान धर्म नितांया माध्यम हे संस्कृत जुल । उके संस्कृतया प्रभुत्व निविवाद जुइगु हे जुल । नेपाल भाषा संस्कृत व प्राकृतया सम्पर्कय् वःगु छुं मखुसां लिच्छविकालं निसं हे खने दु । मध्यकालय् थ्व भाय् लिपिबद्ध जुलं नं संस्कृत प्रभावित वर्गया पाखे हे जूगु दु । उकि अभिलेखय् छ्यलातःगु नेवाः भाय् अध्ययन व विश्लेषण याय् न्ह्यः थ्व छे लुमके वहः जू । अंग्रेजी, हिन्दी बाय् नेपाली भाय्या शैली व वाक्य - गठनं प्रभावित च्वमिपिसं नेवाः भाय् छ्यलीबलय् गुलि भाषाया थःगु पहः वः बिचाः याना स्वयं सी दइ । नेपाल भाषा छ्यलातःगु मेगु प्रमाणिक दसि छुं मदुगुलि कीगु भाय्या व्याकरणया अध्ययनया लागि मध्यकालया अभिलेखया उपयोग याय् माला-चवंगु दु ।

२. पुलांगु भाय्या अध्ययनय् जोगेनसनया व्याकरणया उपादेयता
२.१ सन् १९४१ स पिदंगु डा० हायन्स जोगेनसनया A Grammar

(४)

लुइताः

the Classical Newari कीगु पुलांगु भाय्या अध्ययन, अन्वेषण व विश्लेषणया लागि छगू तसकं ज्याय् छ्यले ज्यूगु ज्यावः खः । नेपाःया किरात भाय् खलःया गुगुं नं भाय्या थुलि दुग्यंगु व्याकरण प्रकाशनय् वःगु खने दु । तर थ्व व्याकरण छ्यले न्ह्यः स्वयम् जोगेनसनया धापू लुमके जू ।

It is a descriptive grammar, not a comparative one. I have entirely abstained from references to the cognate languages. On the other hand, it was to a certain degree bound to become a historical grammar, since the manuscripts, on which it is based, range from the fourteenth to the nineteenth century, and the natural changes in the language during this period have to some extent been reflected in them.

(Jorgensen, 1941:1)

व्याकरण च्वय्त जोगेनसनं ने. सं. ४८१ निसं ने. सं. ९९० जःखःया तलिखित ग्रन्थया लिधसा काःगु दु । थ्व थ्योमथ्यो न्यासःत्या देया दुने नेपाल भाषा हिलाव वनाच्चगु अवश्य नं दय्माः । छाय्धाःसां गुगुं नं विवित भाय्या शाश्वत चारित्रिक विशेषता खः - छगू पुस्ता स्वयाः मेगु पुस्ताया, छगू थाय्या स्वयाः मेगु थाय्या, व अरु छगू सामाजिक वर्गया स्वयाः मेगु सामाजिक वर्गया भाय् पाइ । न्यासःत्या देया दुनेया विभिन्न भाषा वा बिस्क बिस्क भाषिकां च्वयातःगु पुथिया आधारय् च्वयातःगु व्याकरण जूगुलि जोगेनसनया व्याकरण ज्यावःया कथ छ्यलेबलय् होश याय् । वय्कलं धयादीथे थ्व वास्तवय् Descriptive Grammar मखु । Historical Grammar खः, छाय्धाःसा थ्व गुगुं छगू ईया गू भाषिकाया व्याकरण अवश्य मखु । वय्कलं यानादीगु नेपाल भाषा-क्रियाया विश्लेषण व रूपायन (Inflection) या प्रस्तुतीकरणया लक्ष्यतायागं थ्व हे कारण जुइ फु (स्वया दिसं कोयलभर, १९७८)।

पुलांगु भाय्या अध्ययनय् अभिलेखया थाय्

३.१ जोगेनसनं ह्लातं च्वयातःगु सफूया अध्ययन याःगु अवश्य दु । तर मूकःया ज्वलं सीमित-मुख्य यानाः बाखं, आवदान, पुराण, आयुर्वेद व

खेलुइताः

(५)

ज्योतिषया सफू- व नं छगू निगू त्वःताः इस्वी सन्या १८ गू व १९ सदीया । अभिलेख, ध्यासफू, कोश, म्ये, नाटक, नीति, धर्मशास्त्र मेमेगु शास्त्र सफू जोगेनसनया विश्लेषण-क्षेत्रे पिने लाःगु खनेदु । थुकि मध्यय नं व्याकरणय अध्ययनया दृष्टि अभिलेख महत्त्वपूर्ण । बाखं, अवदान, पुराण, शास्त्र आ ग्रन्थया पाठक शिक्षित वर्ग खः । तर अभिलेख जनसाधारणया ध्यानाकर्षण याय्त पलिस्था याइगु खः । मूलतः थुकी आपाःसिन थुइगु खं उल्लेख याय माःगुलि आपाःसिन लहाइगु भाय् छ्यलीगु यक्वं सम्भावना दु । आःया स्थितिइ थ्व छगू परीक्षण याय् बहःगु परिकल्पना (Hypothesis) जक खः । संस्कृत च्वयासःगु अभिलेखय नं “अथ परम् देश भाषा” धकाः संस्कृत अंशय् वने धुंकूगु मूखं हाकनं लिसा कथाः नेपाल भासं किय तःगुलि थ्व खंयात तिबः ब्यू । अले जयस्थितिमल्लयां ल्यू नेपाल भास हे सग च्वयगु, अनुवाद याय्गु, टीका दय्कैगु अभिलेख पलिस्था याय्गु स्वना बुशुहु हःगुलि बहुसंख्यक प्रजायात सम्मान याय्गु भनं इमिगु जनभाषायात याय् बिया यकूगु खनेदु । मेमेगु विधाय स्वया अभिलेखय जनभाषाया उपो प्रमाणिक व आधिकारिक ख्वापा लुया वइगु सम्भावना खनेदु । संस्कृत शिक्षा-दीक्षा कयावःपि गुभाःजु-छःभाजु-आचाजु-जोशीपनिगु भाय् व शैलीया प्रभाव अभिलेखय अवश्य लाःगु दु । अथेतुं अभिलेख ल्वहंतय व सिजपतिइ कीपि ज्याकःमितय लापरवाहीया वि नं थायथासय् खनेदु । अय् नं अभिलेखया भाय् जीवित जन भाय् नाप ग्रन्थ रचनाया नेवाः भाय् स्वयाः यक्व सत्तीगु सम्भावना दु । ग्रन्थ-रचनाया भाषाय् संस्कृतया तप्यं प्रभाव लाःगु दु, संस्कृत ग्रन्थ-रचना (Model) या सफल-असफल अनुकरण खनेदु ।

४. चीन - संय् भाय् खलकय् नेपाल भाषा व संय्-बर्माभि भाय् या छुं विशेषता

४.१ मध्यकालया अभिलेखय छ्यलातःगु नेपाल भाषा कयला स्वय् न्हयः छगू मद्यक मगाःगु पृष्ठभूमि कथं उल्लेख याय् बहःगु खं खः- थ्व भाय् या मेमेगु सगोत्री (Cognate) थःलाःगु भाय् नाप स्वापू । कीगु भाय् चीन-संय् (Sino-Tibetan) भाय् खलःया संय्-बर्माभि भाय् (Tibeto-Burman) पुचःया छगू कच्चा खः । Swadesh 100-Word List या आधारय थ्व भाय् खलःया ९ गू भाय्नाप दानाः प्रकाशनय हःगु

आः अनुसार नेवाः भाय् या

नेपाङ्ग भाय् नाप	२८%	गुरुङ्ग भाय् नाप	१६%
संय् भाय् नाप	२२%	कंके भाय् नाप	१६%
तामाङ्ग भाय् नाप	२०%	सुनुवार भाय् नाप	१४%
थकली भाय् नाप	१९%	मनाङ्ग भाय् नाप	१४%
शेर्पा भाय् नाप	१८%		

खंय (Basic Core Vocabulary) पाय् छि खनेदु (ग्लोवर, १९७०:२३)

तथ्याङ्कं निता खं सीदुः १) नेपाल भाषा संय्-बर्माभि भाय् पुचःया भाय् खः २) अथे जूसां थ्व भाय् सगोत्रीय भाय् पुचलं तापानावगु आपाः दय् धुंकल । आर्य भाय् (प्राकृत व संस्कृत) नाप ध्वदुयाः थ्व नाप मह-वास जूगु ता ई दय् धुंकल ।

४.२ आर्य भाय्नाप ताईया मह-वास व सम्पर्क जूसां नेपाल भाषां गगु खलःया चारित्रिक विशेषता गुकथं ल्यंकातल धेगु खं प्वला स्वयत्त संय्-बर्माभि भाय् पुचःया छुं विशेषता लुमंके बहः जू । थ्व खलःया भाय् आपाः धेय् एकाक्षरी (Monosyllabic) । थ्व जुल थ्व खलःया भाय् विशेषता । व्याकरण व वाक्य-गठनया दृष्टिकोणं आर्य भाषाय् थुकी संज्ञा, क्रिया, विशेषण, क्रिया विशेषण, अव्यय आदि खंयःया प्राथमिक वर्गीकरण (Primary Categories) भाय् Parts of speech या स्पष्ट आधार छुं मदु । अले गौण वर्गीकरण, गथे कि

संज्ञा	सर्वनामय	विशेषणय	क्रियाया
लिङ्ग	पुरुष	तुलना	काल
कारक	संख्या	Degree	संख्या
संख्या			भाव (Mood)
			वाच्य (Voice)
			पक्ष (Aspect)

पेंज्यागु Secondary Categories अत्यन्त सीमित । क्रियां छुं ज्या जुल वा सिधल वा मजुनि धेगु भेद सम्म कयनि; संज्ञाया कर्ता (Agentive) बाहेक मेगु स्पष्टगु छुं कारक मदु; लिङ्गया व्याकरण वा Sex नाप छुं सम्बन्ध मदु; ज्यान दुगु संज्ञा छगू लिंग ज्यानमदुगु मेगु;

श्व भेद हिन्दी वा फ्रेन्चया लिङ्ग भेद क्रिया निर्धारण जुड थें नुं फरक मडु । संख्यां नं क्रियायात प्रभावित मयाः, पुरुष-भेदनं उस्त मयाः संस्कृतय् संज्ञाया हे जक २४ गू रूप दु । ल्याटिन भाषाय् छगू क्रियाया १२० जम्मा रूप दु । सैय् बर्माणि भाषाय् क्रियाया निगू वा स्वरूप रूप जक उकें श्व भाय् खलःयात Isolating वा रूप चलय् याय् स्वाःगु भाय् धाइ । श्व भाय्या क्रिया उकें छगू कथंया संज्ञा थें हे जक खः । श्व फुक्क कारणं याताः थज्यागु भाषाय् word order वा खंयःया क्रम हे वाक्य-गठनया आधार जुल । वाक्यय् खंय-क्रम खः कर्ता, कर्म व क्रिया अले संज्ञा-वाक्यांशय् जुडमा क्रिया-वाक्यांशय् विशेष्यया न्हाः विशेषण चवनी । अनं सम्पूर्ण सैय् बर्माणि भाय् खलकय् क्रिया न्हाबलें वाक्यया दकले ल्युने मवसें मगाः । दकले लिपा श्व भाय् खलकय् संज्ञा व क्रियाय् उपसर्ग (Prefix) व प्रत्यय (Suffix) या प्रयोग जूगु यक्व प्रमाण खने दु । उपसर्ग व प्रत्ययया मू शब्दया रूपायन नाप छुं स्वापू मडु । श्व उपसर्ग व प्रत्ययया सम्बन्ध अर्थ (Semanticc) नाप उो ; वाक्य - गठन (Syntax) नाप ह्यो ।

५. मध्यकालया अभिलेखय् छथलातःगु नेपाल भाषाया छुं तथ्याङ्क

५.१ आः नकतिनि प्वला स्वयागु सन्दर्भय ने. सं. ३५३ या मोतीटारया अभिलेखया छगू वाक्य स्वया दिसें

ओ सुतो गल जल कुंल ऋ युक्त मुहान सस... स्यनक... युते

प्रमुडा चित्तन जुया... जलें ल्होडा जुरो

थुकी स्यनक खंय नेवाः भाय्यागु खःसां जःखः पाठ मडुलि व्याकरणया दृष्टि विश्लेषण याय् मछि । तर प्रमुडा (प्रसन्न) चित्तन जुया... जलें ल्होडा जुरो पाखे ध्यान बिद्वहः जू ।

जलें (<जहं < जधुं < जलद्रोणी) ल्होडा जुरो

या क्रियाया अवस्थां (छुं ज्या सिधःगु) स्पष्ट हे सैय् - बर्माणि भाय्या क्रियाया विशेषता कयं । जुया Participle form खः । उकें थन क्रियाया निगू रूप खनेदय् धुंकल - जुरो व जुया । अरु ल्होडा जुरो क्रिया-वाक्यांशय् ल्होडा मू-क्रिया व जुरो सहायक क्रिया खः । श्व ईया अभिलेखय् खनेदुगु मेमेगु सहायक क्रिया खः

यने, हये, पाये, रये, वयले, माले

श्व Participle व मेमेगु क्रिया-रूप तथा जुल आदि Auxiliary System विकास जूगुया आपाल कारण मध्यय् प्राकृत भाय्या नेपाल भाषाया शुभं निसेया सम्पर्क जुड फु । प्रेरणाथक क्रिया - प्रत्यय - चेक नं थुगु हे इलय् खने दय् धुंकगु दु ।

५.२ व्याकरणया दृष्टिकोण ने. सं. ४१४ या मरुसतःया सिजःपौ साप रोचक । श्व ९ कवःया अभिलेख जूगुलि ल्हापायागु दसी स्वयाः थुकी तथ्याङ्क गाकं लुधक दु । दकले ल्हापां क्रिया-वाक्यांश नि स्वय

कः लागरण च मतेव ग्राड

डः जुयमाल्व जु - वं

खः विह्वकारी याड

चः बन्हुमहपे धाल्व जुर

बः मथिरापुं ध्वसरप

छः थिरारपा

घः लक जुन्व

जः थ जुर / श्व जुर

श्व हे तथ्य मे कथं प्रस्तुत याःसां

रपा	माल्व	याड	थ जुर	मतेव	जुय
रपं	धाल्व	थिरारपरडा	थ जुर		
रपे					

आदि क्रिया - रूप खने दुगु स्पष्ट जू । क्रियाया रूप चलय् याय् माःगु आवश्यकता जूगु छुमां थिरारपरडा थें ज्यागु (स्थीर + रपा + याड) समस्त रूप नेवाः भाय्या थासाय् दुध्याकातःगु क्रिया कयं । रपा प्रत्यय वयाः थन ध्यंवल्य सहायक क्रियाया ज्यायाःवय् धुंकल । अले धाल्व व माल्वया लिधंसाय् नेपाल भाषाय् लिपा वयाः अत्यन्त प्रचलितगु Periphrastic Verb Phrase या रू काःवय् धुंकल । छुबे भावप्रकाशनाथ रूप चलय्याय् माःगु आवश्यकता व मेखेर रूप चलय् याय् मज्यगु भाय्या स्वभाव-श्व नितानं प्रवृत्तिया दश्वी द्वन्द हे थुयाय्या भाषाया वैयाकरणिक विशेषता खने दु ।

५.३ मरुसतःया सिजः पौया संज्ञा-वाक्यांश पाखे छको नं आः मिखा व्वय् ।

कः ओ यंगाल ओ त्रिभय छयं पांचालि सन्हाहस सुवीस

खः ओ च्याछ तव तवमोसन

ग: जुगि सामरगी याके
घ: स्वदेशी परदेशी ननो
ङ: स्वतेया
च: थ्व थिति लोप बाकया
छ: महानरकस

संज्ञा वा संज्ञा-वाक्यांशय् व्यापक रूप छयलातः गु प्रत्यय -स, -न, व गर्न नं - सनं खने दु । -स प्रत्यय फुकस्वयां ह्यापांगु Tibeto - Burman Suffix खने दु । थुकियागु प्रयोग अनेक अर्थय् जुगु खनेदु । - छाय्घा:सा थ्व अभिलेखय् खने दय् धुंकूगु - याके, - या आदि कारक प्रत्यय वय् सिबे न्ह्यः थ्व हे - स प्रत्यय ज्या चले जुगु जुइमा: । थ्व खंया प्रमाण लिपा लिपाया आपालं अभिलेखय् खनेदु । (गथेकि जोशी संकलन अभिलेख नं ४३ ने. सं. ४९२ या स्वयम्भूया अभिलेखय् - थ्व आखर टाकर लोकरमी भी मानोगल असु मुलमीस, स एब ह्वन्था मुलमीस, अभिलेख नं. ४४ ने. सं. ५०२ या इतुम्बहाया अभिलेखय्- तारास पिण्डिस चोया थ्व देबस लकमस-आदि) । उबलेया संज्ञा-वाक्यांशया छगू रोचक दसि खः

फात्सुगु शुल्क पूर्णबिमासी सोमवार देबस प्रतिष्ठा दिन
(अभिलेख नं ७९ ने. सं. ५६९)

गनं छुं रुपायनया वा प्रत्ययया चि मदुगु ७ गू संज्ञा ऊवलंक मा:हना: तःगु दुसां वाक्यांशया मू - छय (Nuclear Head)-दिन - दकले लिपा वःगु दु । थ्व Modifiers-Modified Construction या छगू बांला:गु दसि खः । संय्-बर्मासि भाय्या ध्वाय् खः ।

५.४ यल, इछाछे, आलक्व हितिया ने. सं. ५३५ या सिजःपी (जोशी संकलनया न ६९) भाषिक अध्ययनया दृष्टिकोणं लुधंगु दसि खः । न्ह्या:नेया छगू वाक्य त्वःता थ्व मुकं तःहागु अभिलेख नेपाल भाषां खः । थथे ता:हाकःगु व मुक्कं नेपाल भाषां च्वयातःगु थ्व ह्यापांगु अभिलेख खः । थुकी वाक्यांश व वाक्य गठनया गुलि विविधता दु उलि यक्षमल्लया ईया अभिलेखय् नं खने मदु । गथे

... इहकाल वषतस जलवृष्टि मजुयाओ सागर समुद्रस लंख शुय-
जुओ कालवषत थ्व ।

ख: ... थ्व पुण्वनं जल उत्पत्ति जुयाव धरित्रीनं जुनवृष्टि जुस्यं
होहाकाल जुओ लोक सत्त्व प्राणो जगत् रक्षा उद्धार जुलो ।

ग: ... थ्वते लग्न वयलासं थ्व जलधारा प्रवेशयाड लंख हायकं
स्थापना याड दिन जुलो ।

घ: ... ल्होन्यबलेस थ्व लंख नादि वण्डलसं समस्त मेघ शिलाछत्रण
साधन लोहहनं तोकपूस्यं तया लोहत पोलाओ स्वयमतेओ ह्यां ।

ङ: ... थ्व शुद्ध भूमिस ... साम्, क्षगुया लाकाम थुति सुद्धा शरीरस
दषकं थ्व शुद्ध भूमिस ओयेमतेओ । थुति, अर्वाचित याड थ्व
हितिया भूमिस निमित्त माय्माल ।...

छता खं, थुकी - स व - न प्रत्यय संज्ञानाप स्पष्ट Functional role य
वय् धुंकूगु दु । - स अधिकरण-कारक-प्रत्यय (Locative Case Clitic)
व - न करण (Instrumental/Ergative) व अपदान (Ablative) या
या रूपय् विकसित जुगु बां सीदय् धुंकूगु दु । अथे हे Participle व
Gerundive Form वा Non-finite Verb Form या दथ्वी नं
भेद स्पष्ट खने दत-

जुया ओ / जुयाव - Participle : पूर्वकालिक क्रिया

तोक् पूस्य तया { Gerundive : सातत्यबोधक क्रिया
यास्यं तया

थुलि जूसेलि थ्व अभिलेखया भाय् कीगु थौंया भाय्नापं गाक सत्तीगु खने
दःवय् धुंकल ।

६. मध्यकालया नेपाल भाषाय् भाषिका-भेदया छुं दसि

६.१ यल, आलक्व हितिया भाय् गुलि यात्तुसे च्वं खवप भाषं च्वया-
तःगु ने. सं. ५६० या पशुपतिया सिजःपी उलि मच्चं । थ्व खंया मेगु प्रमाण
खवप लाय्कूया पिनेया यक्षमल्लया ने. सं. ५७१ या सिजःपी खः । ह्यापां
पशुपतिया सिजःपीया छुं दसु स्वया दिसं (जोशीजुया अभिलेख नं ७८)

क: संसारदेवी ठकुरिणीस प्रतिमा गौरीसके दिन प्रति अखण्डयाडन
जोगारपेभोजाके कुन्हु छिन थुयाजा अमसछता, वयस्वता, चिचेकन,
थ्वत्येन त्यवत्याके हाने, थ्व भोजा: गौरीसके न्हवताव संसारदेवी

ठकुरिणिसतं ह्लिथंड दुखि देशांतरीस द्वायी आविये ...

खः ... ह्लियाव मेता वियाव छोयेके

गः धरिफलके लाव जिमछदाम् ११ हाने थ्व समस्तावसपेयातां आय डुतंतया

अथेतुं यक्षमल्लया ने. सं. ५७३ या सिजःपौया छुं दसु व्वय्—

कः श्री श्री जययक्षमल्लदेव, प्रभु ठाकुरस विजयरजस, श्री खवपस, खारनो गडप्राकारनो, लववाठनो दयका जुरोम

खः खवपदेशश बसरबको समस्तस्यबुं खार ड्यडीस सड, मेस, सा, फा, थ्वतेस्यबु ह्लोयेकेमटेव

गः प्राकारनो लववाठनो स्यकाले थम डडाम् थनथमव ज्यायात्रके

थ छोयकं तकस्य चिंता यायमाल जुरोम

थन -सत व -स प्रत्ययया प्रयोग शुरुशुरुइ गये खः अथे हे विभिन्न अर्थय छगु हे प्रत्यय अस्पष्ट (Undifferentiated Use) ज्या याना च्वन तिनि । अथे हे -स्यब, खवा भाषिकाया विशेषता खनेदु । सल, मे, सा, व फा (न) न्हइके मते मधासे -थ्वतेस्यबु या प्रयोग थन मेगु विशेषता खनेदु । अथे हे नकेखुःहु ह्लिच्छिया अर्थय भोजाकेकुःहुछिनया प्रयोग न्हयथने वहःजू । अथे हे मेता (मत), ह्लवताव (ह्लयन्हे तथा) धरिफलके (धो बजि) आदि शब्द नं लुमके वहःजू । येँ-यलया भाषिकां स्वया उपो पुलांगु व पाःगु खँवः व वाक्य - वाक्यांश गठनया अवशेष न्यकेगु ज्या खवपया भाषिकां यानावःगु न्हगु खँ मखु धँगु थुकि यच्चुक सीदु । उके खवप भाषिकाया अध्ययन-अनुसन्धान नेपाल भाषाया इतिहासया लागि आपालं महत्त्वपूर्ण जुल । थन च्वःगु अभिलेख व ग्रन्थया भाषिक - विश्लेषण नेवाःभाय्या गाक पुलांगु रूप व चरित्र ल्यकातःगु वयने फु ।

७. सारबब

७.१ थ्व बःधंगु लेखय् कयनेगु कुतः यानागु खँ खः संस्कृत-प्राकृत आदि आर्य भायनाप ध्वदुइ धुंकाः नेपाल भाषाया विशेषता । संय्-वर्मणि भाय् पुचःया थःगु चरित्रयात व्याकं तोमफिकूसे संज्ञाय विभिन्न कारक-प्रत्ययया विकास, क्रियाया Finite व Non-Finite रूपया विकास, थी थी

सहयक क्रियाया विकास व Periphrastic Verb Phrase पाखे बुलुहुं छयूगु पलाः अले वाक्य-गठनय न्हापाया छाःगु पह (Rigidity) त्वःताः यात्तुसे च्वंगु विविधताया विकास थ्व फुक - आर्य भाय्या सम्पर्क जगु खनेदु । थ्व रूपायन (Inflectional morphology) व वाक्य-गठनय पुलांगु Isolating विशेषताया थसय् वैयाकरणिक सम्बन्ध वा संगतिया (concord) प्रारम्भिक विकास यानाः कीगु भाय् गाक यात्तुसे च्वसावैचंगु प्रामाणिक दसि मध्यकालया अभिलेखं स्वाजिक कय ।

७.२ थ्व लेख क्वचाय्के न्हयः नेवाः संस्कृतिया मर्मज फ्रांसया आचार्य सिल्वी लेविं नेपाल भाषायात कया व्यक्त याना दीगु छत्वाःत्रा मन्तव्य थन न्हयथने, तेना —

The Newari language of the palmy days embodies a harmonious equilibrium between the Himalayan dialects which had remained in their primitive stage by reason of the seclusion, still poor, rough, and incapable of translating lofty thoughts and abstract notions, and the dialects completely Aryanized by the constant borrowings from the Aryan tongues of the plains. The Newari language has developed its lexicon by an internal process, and if it has had to borrow from the New Indo-Aryan dialects, it has had to assimilate its borrowings and derive new forces therefrom.

(Levi, 1905:I:252)

नेवाःतयगु, धर्म, कला, संस्कृति व सामाजिक-गठन थेतु इमिगु भाय् नं किरात व आर्य तत्त्वया समन्वयया यच्चुगु दसु खः धँगु मध्यकालया अभिलेखं कोछीज्यू । भाय् मडु, येँ ।

कुलछि स्वयं, १९०१ ।

भक्तुबर ६, १९८१ ।

लिधंसा-सफू धलः

- Benedict, Paul K. 1972 *Sino-Tibetan: A Conspectus* Cambridge: The University Press
- Egerod, Soren 1979 "The Sino-Tibetan Languages" *Encyclopedia Britannica* Vol 16 Chicago: Encyclopedia Britannica Inc ,796-806.
- Glover, Warren 1970 "Cognate Counts via the Swadesh List in Some Tibeto-Burman Languages of Nepal" in F. K. Lehman ed., *Occasional Papers of the Wolfenden Society on Tibeto-Burman Linguistics*, Vol III, Part II. Urbana. 23-107.
- Jorgensen, Hans 1941 *A Grammar of the Classical Newari*. Copenhagen: Munksgaard.
- Kolver, Ulrike and Bernhard 1978 "Classical Newari Verb Morphology." *Zentralasiatische Studien*. 12:273-316.
- Konow, Sten 1909 *The Linguistic Survey of India*. Vol III, part I. Calcutta. 1-13.
- Levi, Sylvain 1905 *Le Nepal: Etude Historique d'un Royaume Hindou*, Vol 1. Paris: Ernest Leroux.
- Shafer, Robert 1952 "Newari and Sino-Tibetan." *Studia Linguistica* 6: 92-105.

1955

"Classification of the Sino-Tibetan Languages." *Word* 11:94-11

1966-67

Introduction to Sino-Tibetan. Part I and II, Wiesbaden: Harrassowitz.

Wolfenden, Stuart N.

1929

Outlines of Tibeto-Burman Linguistic Morphology, London: The Royal Asiatic Society.

ने. सं. सम्बत् १२०२ न्हू देया लसताय्
ब्याक्क ग्राहकवर्गपिन्त दुनुगलनिसें

- भित्तुना -

नेपाःया काष्ठकलां विश्वय् थःगु हे कथं न्हाय् तयाच्चंगु दु
छिकपिसं नं थःगु हे देया हस्तकला छ्यलाः
नेपाःया न्हाय् तया दिसैं ।

छिकपिन्त माःगु तक नेपाःया भःगु हे पहःया थी थी
काष्ठकलां जाःगु ऊयाः, तिकिमयाः, लुखा, चौकोश व
मेमेगु नं उपहारयोग्य बुत्तां जाःगु सामान्त माःसा लुमंका
दिसैं ।

छिकपिनिगु सेवा हे जिमिगु आजु खः ।

बुत्ता व सिँज्याया नायः

उड कार्मिङ्ग इण्डस्ट्रिज प्रा. लि.

पाटन औद्योगिक क्षेत्र

फो. ल्याः २१४४७

खेलुइताः

(१५)

खेलुइताः

(१४)

ने.सं. ११०२ न्हू दंया लसताय्
व्याक्क ग्राहकवर्गपिनि सुख व समृद्धिया लागो

भितुना



जिमिगु ज्यासलं उत्पादन जूगु तःताजिया आर. सी. सी.
हमपाइप - Sewerage, House drain, Water
Tank, Pillars, Culvert व Irrigation छयला स्वदेशी
उत्पादनयात धिसिलागु तिवः बिया दिसँ । जिमिथाय्
१०० एम. एम. निसँ १६०० एम. एम. साइजया हूम
पाइप उत्पादन जुई । छिपिनिगु सेवा हे जिमिगु आजु खः ।

थौं हे स्वापू तया दिसँ ।

काठमाण्डौ हूम पाइप कं.(प्रा.)लि.

बालाजु औद्योगिक क्षेत्र येँ !

फो ल्याः १६,४६५

समालोचना

समीक्षाया दापू

- रत्नछवज जोशी

गुगुं छगु रूप, रंग वा बसा बांलाः अथवा बांमलाः धाय्गुया आधार
छु ? थहां व स्वयाः ह्लापा बराबर अथवा गुबलें गनं स्वय् खने धुंगु रूप,
रंग व छायापा हे मखा । बांलाः बांमलाः त्यइगु मिखां खःसां मनं त्यइगु
बांलाः बांमलाःयात व स्वया च्वन्हाः धाय् हे माः । थथे हे खवाःया
अवयव (ज्वलं) सकसियां व हे ह्लाप्, म्हुनु, न्यताः आदि खःसां थ्वया स्वयाः
वया खवाः बांलाः अथवा बांमलाः धया हे च्वन । थथे हे बाखं, कविता,
नाटक आदि बिधाया नामं व रूपं छगुलि मयाक न्ह्याःने च्वंवल, त्यय्
माल धाःसा नं त्यइहा अथवा आलोचकया अध्ययन व अनुभव हे त्यय्गुया
दापू अथवा मानदंड जुयाच्वनी ।

गुगुं कृतिया आलोचना याय् न्ह्यः व कृतिया रूप, उद्देश्य व ग्यसु
थहां थ्वीके मफत धाःसा उगु विषयय् च्वापुका जुयाः कलम संकेगुया
पलिसां सुंक च्वनेगु हे भि । कृतिया च्वमिलिसे यः मयःया भाब तीत्र
जुयाच्वन कि नं उगु कृतिया विषयय् संतुलित समीक्षा च्वय् थाकुया च्वनेयः ।
दापू विना आलोचना च्वय् फेगु संभावना मदुसां छगु हे दापुलि फुक्क
कृतिया आलोचना याय् स्वय्गु पूर्वगु बिचारया लक्षण धाय् छि मजू ।
समीक्षा याय् त्यनागु कृति पतिकं दापू पाके माःसां व पाकेगुया दुने
विवेक संमत संतुलन दय्माः ।

साहित्य मनया भाषा खः, मनया भाषा मन दुहां जक हे थुया

खेलुइताः

(१७)

चवनी । आलु लनेगु तालुं लुं लनेत स्वैहां थःगु खँ- थहां धयागु खँ
मथुल धकाः मन ववतुंकां सह जुइमखु । चवमि थःथःगु संस्कृति अनुसार-
यागु विश्वासं गुगुं कृति चवइ । आलोचकं चवमिया व विश्वासयात वास्ता
मतःसे थःगु हे संस्कृति, थःगु हे विश्वासया भरं उजाःगु कृतिया आलोचना
यायूत स्वल धाःसा व समीक्षा सुथां लाइगु आश यायू फइमखु । आपाः
यानाः नेपाल भाषाया साहित्यिक कृतिया आलोचना यायूत न्हाचिलेबलय थुगु
खँय सतकं जुइ माला चवनेफु । भाषा, छास, दूमाःपिसं तुपुलि मपुइगु
आदि तःतामछि खँय नेवाः धाक्व छधी खः सां कुहाः व ज्यापु, त्यपय्
व कुहाःतय् थ्यंक संस्कृतिया छुं छुं बव पाः धयागु न्यने दु । गुलिसियां
ह्यनुं दू व्यंसां गुलिसिया दू व्यनेत फिस्वन्हु माः । थुकथं हे मेमेगु नं
गुलिखे खँ दय फु । थुजाःगु खँया विवेक मतःसे सुना नं थःगु हे संस्कृतिया
दापू मनय तयाः न्हाहासियागु कृतियागु समालोचना यात धाःसां पाठक वर्ग
उजाःहा आलोचकयात तुं-ब्यां धायूत लिमस्वय फु ।

कलम चवलेत न्हाचिले मन दुपि अनेक दुसां सकसिनं उत्थे ग्यंक छाय्
चवय मफत, अभ्यास सकसितं छाय माल, गुलि गुलि चवमिया कलम व हे
छचाःचा परिधिइ, वात्तुवां चाःहिलेगु व गुहासियां कलमं कृति पत्तिकं न्हू
न्हूगु क्षेत्रया रहस्य छाय उलाः क्यनेफत ? थुजाःगु बिषयय समीक्षकया मिखा
मवन धाःसा वं थः यःपि वा मयःपि छहा निहासिया कृतिया बिषयय
जक हे थःगु कलम छचला चवने मालेफु । गुलिखे चवमित लिलातले जक
हाइपु छचायूत थें साहित्यया क्षेत्रय ह्याःतयाः मेगु ज्या ज्वने धुनकि 'ग्व,
लि हे मलाः' घाइपि व गुलिसिनं धाःसा 'चवय धयागु ला खः, ग्वः, चवय-
मफया चवनका' धया म्हुतु पिचुकीपि नं दु, उजाःपिनिगु कृतियात नं इमिगु
खवाः मस्वसे मद्दिक् चवइचवपिनिगु तय तयाः समीक्षा यायू फम्का चवनेमाः ।
गन सेवाया वव तव्व जू मजूयागु खँ वइ अन हे जक उजाःपिनिगु दुमदंगु
सेवाया खँ पिहां वइ, गुह्यं लेखकं तःगुमछि सफू पिकाल धायूवं जक हे नं
वयागु सेवाया मू यक्व वनीमखु । नीदें नीम्यादँया सेवा गुह्यं लेखकं याःगु
छगू वा निगू जक सां संसारया न्हाःने तय बहगु मफू चवत धाःसा व छगू
दर्जन सफू चवःहासित स्वयाः वयागु सेवाया मू अप्वः ल्याः ख्याय मालेफु ।

धाय, छहा चवमि कीगु भाषा साहित्यय जवः हे मदुगु छगू काव्य, नाटक

वा उपन्यास पिकाल, छहा निष्पक्षपातहा आलोचकं उकियात ल्वयूक् चवछायाः
समीक्षाया लेख नं पिकाल, दँ बदै लिपा जूबलय संगू बःछि हे मपाक व थें
हे चवंगु कृति मेगु भाषां मेहा लेखकं व स्वयाः ह्यापा चवयातःगु वा कीगु
भाषाया प्रेरक जुइफुगु कृति मेहा आलोचकं ल्वीकल धाःसा ह्यापायाहा
आलोचकया निष्पक्षपातगु व्यवहारया महत्व छु दत ! उकि दापू छगू हे
जुइगुया महत्व तःमि व चीमिहा लेखकया कृतिया समीक्षा यायूत्यैबलय दु थें
हे समीक्षकया तफ्पाःगु अध्ययनया महत्व नं उलि हे दैचवनी ।

ह्यापालाःहा लेखकया कृति प्रभाव अथवा प्रेरणा कायवं लिपा कलम
छचहा चवमिया कृतिया मू कम हे जुइमाः धयागु नं मदु । आदि कवि
बाल्मीकिया राम व भरत स्वयाः तुलसीदासया राम व भरतयात मनूया
रुपं जक हे तुलना याना स्वत धाःसा नं लिपा चवःहोसिया मू छुं पाः मजू ।
इतिहासया अध्येता मास्टर हेमलाल जोशीया नाटक स्वयाः यक्वं लिपा व
छगू जक हे चवःगु खःसां वासुशशी वैद्यया 'ताःचाप्वाय' या ग्यसु हा मजू ।
उकि समीक्षाया दापू मदयूक मगाः धयागु खँ खःसां व थुजाःगु हे जुइमाः
धायबलय हथाय चाय मज्यू । समीक्षाया जि ग्वःता दुगु खः, दापू नं वःता
हे जियागु दतं हे मयाय फु । छता जियागु दापूया उपयोग तःतामछि प्रकारं
जुइफु । थ्व हे खँ दापू पतिकयागु खँय ज्वं ।

धाय, आलोचनाया मूल आधार तुलना खः । तर तुलनात्मक आलो-
चना सकसिनं छगू हे प्रकारं जक याइ धयागु मदु । थथे हे मेमेगु जियागु
समीक्षाया दापूया बिषयय नं जुइफु ।

संसारय दक्व विकसित भाषाया साहित्यया इतिहास बवनास्वत धाःसा
छगू हे तथ्य लुया बइ, ह्याप्पां ह्याप्पां बलय पद्य-साहित्य अथवा लय तयाः
हाले छिगु म्ये दयका हइ, व हे म्ये लाना कया मेमेपिसं नं हाली,
थथे हे गुलिखे ततःधंगु घटना जुइ, जातिया उत्पत्ति वा अवनति जुइ, व हे
खँ छम्हसिनं मेम्हसित कनी, व हे खँया परंपरा न्हा ज्याज्यां वनी, मेमेपित
कनीम्हसिया लुमंकेगु शक्ति, बाखं कने सःमसःगु पह अनुसार वहे छपु बाखं
सां गां पत्तिकं धया थें व बाखंया रुप आपालं वा भतिभति पापां वनी,
उजाःगु हे बाखं जक मुं जुइम्ह छम्ह व्यक्ति बिशेषया चर्चित यानाः छगू लोक
बाखं संग्रह हे पिकाय बह जुइक छद्म खात खनि धयागु खँ लोकं थुइ ।

खेलुइताः

(१९)

की नेवाः जातिया दुने उजाःगु हे बहुमूल्यगु ज्या यलय् करुणाकर बैद्यजुं व लोक म्ये धाक्व मुनेगु ज्या येँ स्व. मानदास तुलाधरजुं याना दीगु खः, गुगुयात ल्वय्क भूमिका च्वयाः विदेशी विद्वानपिनि म्हाःने अंग्रेजी भाषां तय्गु ज्या ठाकुरलाल मानन्धरजुं याना च्वना दीगु दु । थये हे प्रेमबहादुर कंसाकारजुं 'बाखं म्ये', 'मतिनाया म्ये' पिकयाः छगू मज्जिमगाःगु ज्या याना दिल । 'डा. लीनहार्डया नेपाल भाषा गीति-मञ्जरी' शीर्षक वियाः डा. कमल प्रकाश मल्लजुं गुगु लेख "सिकःमिया स्वाने" दुने लाकादीगु दु, व थौया नेवाः जातिया दुने माक्व जाग्रतपि नं ग्वाःग्वाः दत्त, आः थःपिनिगु बाखं, नाटक, उपन्यास, खण्ड-काव्य, प्रबन्ध-काव्य आदिया बिषयय् माःहसित माःकथं आलोचना च्वया थकाय् माःगुयात थकयाः व स्वया अज स्यल्लाक च्वय्गु प्रेरणा मेमेपित नं बी माल । तीर्थराज तुलाधरजुं उल्या याना दीगु "आखे" थें जाःगु बाखं-मुना नेपाल भाषां नेवाः जातियागु जीवनयात हे कया च्वया तःगु दय्के फक्के माल । कीसं सहानुभूतिशील जुयाः लागि मचासे मनया मिखाप्वाः चाय्काः बी मानिपि नं यक्वं यक्वं दनि, उजाःपि दाजुकिजापिनि छें मचानिसें थःगु मांभाय् ला अर्थे हे सैनि, ह्नाप्पां व्वकेत माःगु भाय् नी सय्के मालका, धकाः वं वयागु वं वयागु स्वला च्वःन, प्वः जुइक मेगु भाय् सय्के हयाय् चाय्गु भ्वासि पहलं दुस्वय् मफुनि । दुमस्वःगु हे भि । गुम्ह मचां थःगु भाय् पूर्वक मसवं मेमेगु भाय् नि सय्कः ज्वी, व मचां थःगु मातृभाषा-यात माक्व आदर भाव याय्गु मखु, हेबाय् चवाय् याय्गु नी सय्की धयागु खें, वंकीमचन्द्र चटर्जीयागु "हाउ डुडु" (डूडू ?) शीर्षक निबन्ध व्वना स्वैदीव हे चाइ ।

समीक्षाया दापू समिक्षकया थःथःगु रुचि, अध्ययन सीमा, कृतिया स्वरूप व कृतिकार लिसेयागु आलोचकया सम्बन्ध स्वयाः नं भचाभचा पाय् यः । तर लेखक विशेष नापयागु सम्बन्ध स्वयाः पाइगु मानदंडयात भचा शंकाया मिखां स्वैपि नं दु । मुख्य खें समालोचकया दृष्टिकोण व समीक्षाया रूप स्वया वनी । गंभीर व व्यापक अध्ययन दुम्ह आलोचकं विभिन्न प्रकारयागु समीक्षाया दापू मध्ये गन गुगु त्वल, अन उगु उगु हे जियागु समीक्षाया दापू छचलाः सकसितं यय्क, सकसितं ल्वय्क आलोचना च्वय् नं फु । अध्ययन गाक्क याय् मधुकूतिम्ह वा न्हागु कृतियात नं थहां स्यूगु वा ल्यय् धुंगु वादबिषेययागु मिखां जक हे स्वयाः आलोचना च्वैम्ह जुल कि थःगु रुचिया दुने मलाःगु न्हागु कृतियात नं कुं मखिसे आलोचना हे

मच्वय् नं फु । उजाःगु आलोचनायात पूर्वाग्रह-ग्रस्त आलोचना धाइ ।

गुगुं कृतिया कुं जक खिनेत अथवा उकियात जिव्व पाखें च्वछाय्गु दृष्टिकोण सुनानं स्वैगुं कृतिया बिषयय् छुं च्वत धाःसा उकियात आलोचना समालोचना धकाः सुं च्वन धाःसा व मनूयात समीक्षाया बिषयय् 'नमोवागी' हे मस्युनिम्ह व्यक्ति खः धाःसां छुं पाइमखु । कवः बुद्धि व पक्षपातं मुक्त जुयाः कृति छुं धाय् त्यंगु खः वा छुं धाःगु खः, व गुलितक देश कालयात ल्वः जू वा मजू पूर्वक ल्ययाः क्यने फुगुयात हे आलोचना धाइ ।

आलोचना अनेक जियागु दु; थाय् व कृतिया रूप स्वयाः ल्वगु थासय् ल्वःगु जियागु आलोचना च्वय् सय्के फुहोसित जक आलोचक धाय् ल्वइ । कला कलाया लागि खः, स्वां व्हेगुया थःगु प्राकृतिक नियम दु अय्सां सुं व्यापारी वा उद्योगपति गुलाफ स्वां व्हेगुया कारण उजाःगु स्वां द्वैचिक मुनाः, उकिया अय्लाः दय्काः अत्तरया नामं मिया ध्यबा थमुंकेमा धैगु लक्ष्य तथा ह्मःगु खः धैगु दृष्टिकोणं सुं लेखकं च्वःगु कृतियात लेखक धैपि कलम ज्वनीपि पल्टन खः धैगु जपमाः हीकीह्ना न्ह आलोचकं आलोचना याय्त कलम ज्वन धाःसा वं उगु कृतियागु आलोचना गुबलें नं न्यायपूर्ण रूपं च्वया नैमखु । थ्व हे खें सकतां प्रकारयागु आलोचना च्वय्बल्य् आलोचक महोदयपिसं विचार याय्गु लुमंकाः दीमाः । समीक्षक च्वमियागु मन व कलम-यागु अवस्था स्वयाः मां, बी, गुरु थें गं जुइफु, वैद्य डक्टर जुइफु, न्यायाधीश जुइफु, वकिल वा टीकाकार नं जुइ फु । गुम्ह च्वमिया लागि गन गुगु रूप काय् माल, अन उगु हे रूप कयाः प्याखंया नायः नकि नं थें पहः काय् सःम्हसित हे स्यल्लाःम्ह आलोचक धाइ ।

आलोचनायात तःतामछि जिमध्ये दकसिवय् पुलांगु प्रकार निर्णयात्मक आलोचना पद्धति खः धाइ । संस्कृत भाषां काव्य च्वःपि कवित मध्ये मर्हिपि बाल्मीकि व व्यासयात त्वःता कालिदासया ज्वःम्ह कवि अःतक पिहां मवःनि धैगु छपु सिलः हे दु । माःबल्य् माःगु थासय् छचलेफत धाःसा थुनिया मू उलि थुलि हे मदु । मखुगु थासय् मखु कथं छचले लात धाःसा थ्व ति ग्यानापुगु पद्धति नं मेगु दैमखु । थुजाःगु हे आलोचनाया दुरुपयोगं कवि किट्सया निधन २९ दं जक दय्वं जूगु खः धाइ । आलोचकं गुगुं कृतिया बिषयय् बीगु निर्णयया मू तच्चः, उकि उकियात मद्रकं छचलेगु गं उलि हे आवश्यक ।

तःशुमछि कृति मध्ये गुगु सर्वोत्तम धैगु खँ ल्यय् माल, आलोचकं द्व'कल वा
पक्षपात यात, छम्हसिने काय् माःगु इज्जत मेम्हसित लाइगु जुल धाःसा
उजोथाय् द्व'कोम्ह, विवेकं व निस्पक्षपातगु मिखां मस्वःसे कवःबुद्धि ज्याइहा
वा निर्णय बीम्ह आलोचक वा परोक्षकं व भाषा साहित्ययागु विकासय्
पंगलः थनेगु ज्या यात मधाःसे मेगु छु धाय् ल्वै । कीगु भाषा साहित्यया
इतिहासय् थुजाःगु हे अविवेकपूर्ण घटना निम्ह नां दंपि भाषा सेवकपिनि
पाखें प्यकः तक जुगु जि स्यु । उजाःगु दुर्घटनां थवथवय् वेमस्य सृष्टि
मयाःसा मेगु छु शा । उकि सःस्यूपिसं धाइ, 'अज्ञान व अविवेक ति
ग्यानापुगु मेगु छु मु ।'



न्हू द ११०२ या भित्तुना

न्हू न्हूगु हाँचां, छिकपिसं मनंतुनादीथें बांलाक व
बल्लाक सुज्याया निति व ल्वःयनापुसे च्वंगु तयारी
वसःया निति जिमिभाय् मासँ ।

जुजुभाई एण्ड ब्रडर्स

खिचापुखू, येँ ।

खेलुइताः पिकाक गुथिया न्हापांगु सफू
'मतजः' विबन्ध मुना थौं हे न्यानाः स्वया
दिसँ ।

यःम्ह गबलें सीमखु

दुर्गालाल श्रेष्ठ

“पालिख्वाँय् जक सी दु छुं छुं
गथु मखं गो गन वन ?”

स्वांतसें सुथया निभालय्
छयों व्हनाः थय् धैचवन !

वेदनाया मगमगं हे
मगन जूगु थ्व क्यब स्वयाः

चीसलं हिहिलं - मलं थें
बल छसः बुलुहुं थ्वयाः !

“गन छिपिं अन हे जि नं दु
यःम्ह गबलें सीमखु

स्वय् मसःतल्य थःत छिमिसं
थन जि माःसां ल्वी मखु !”



गुजाःम्ह बौ धकाः फनफन तं पिकयाः बौम्हसिया न्हयःने हे मच्चंने
मांम्हसियाय वन ।

उलिचिया बाखं थुलि

ध्यः तय्गु कुलि.....

[तः दै न्हयःनिसै कीगु नेपाल भाषाया न्हनाबने तय्गु पुलां बाखंया संरक्षण
याय्गु ज्याय् थःगु तन, मन, धन बियाः स्वाहालि याना च्वनादीम्ह
भाजु करुणाकर बैद्यजु कीगु नेपाल भाषाया आपालं पुलां बाखंत मुना
दीधुं कूगु दु । थुगु हे फ्वलय् थ्व “छ्वाय्तय्गु देश” नं छपु बांलाःगु
पुलां बाखं खः । मेमेगु बाखं सिवे थ्व पुलां बाखंया थःगु हे पहः चहः
खने दु । छगू नामय् दक्क मनूत व खुसित जक जूवल्य् अन गुजाःगु
वातावरण प्याहां वल धइगु खंयात थ्य बाखनं वाःचाय्का च्वंगु दु ।
नापं उजाःगु वातावरणय् थः थवय् खल्लाबल्हा आदान प्रदान नं गुगु कथं
जुल धइगु खंयात थ्व बाखनं सीमदय्क ध्याचु नका च्वंगु लुमंके वहजू । सं.]



ने. सं. ११०२ दैया लसताय्

भित्तुना

अनुभवि शिक्षक व शिक्षिका पाखें न्हू कथं शिक्षा बिया
छिकपिनि मस्तय् भविष्य मःमः धाय्का दिसैं । थ्व हे
माघंनिसैं नर्शरी निसैं ७ तर्गि तक भर्ना चाल ।

अमर आदर्श विद्यालय ।

ने. सं. ११०२ न्हू दैया लसताय् भित्तुना

थोथी स्टेसनरी सामानत माःसा जिमिथाय् कासं ।

शुभ कर्मसयल हाउस

ने. सं. ११०२ न्हू दैया लसताय् व्याक्क नेपाःमापनि सुख व
समृद्धिया लागी दुनुगलंनिसैं भित्तुना

व्हाइट आर्ट (ज्ञानमान शाक्य, यल) ।

अनुसन्धान

अनुसन्धान ज्वलं ताः लाकाळि

— सह प्रा. जनकलाल वैद्य

१. विषय न्हयथना

थुगु च्वखें नेपाल भाषा प्राचीन काव्यया सिर्जनात्मक
प्रवृत्तिया विश्लेषणात्मक अध्ययन शीर्षकय् विद्यावारिधि उपाधिया
निति शोध - ज्या याय्त माःमाःगु अनुसन्धान ज्वलं माला ताः लाकाव
च्वनाया ल्हयथ प्रगति बिबरण खः । थुकी, प्रस्तावित शोध ज्याय् अन्तः
साछ्य रुपय् छ्यले बहगु अनुसन्धय ज्वलंया जक नि स्रोत, स्थिति, विषय
व थुमिसं कथना च्वं कथंया नेपाल भाषा काव्यया परम्परा संकेत पाय्गु
कुतः यानागु दु । नापं नापं, शोध-ज्या यायां वनेवल्य् धवदुवइ छ्वाःवःगु
गलःया खं कयाः न चर्चा याय्त्यनागु दु ।

१.१ ‘प्राचीन काव्य’ धयागुया स्पष्टिकरण

प्रस्तावित विषय शीर्षकय् दुध्याःगु ‘प्राचीन काव्य’या स्पष्ट व्याख्या
याय् माःगु आवश्यक भाःपिया । इतिहास विषयं नाला तः कथंया विशेष
समय अवधियात लक्ष्य यानाः ‘प्राचीन’ खंवः रुढ अर्थय् छ्यला तयागु
मखु । नेपालया इतिहासय् प्राचीन काल धकाः धया तःगु लिच्छवि काल
दुनेया नेपाल भाषा काव्यया सिर्जनात्मक प्रवृत्तिया शोध-ज्या थ्यंक हे जुइ
त्यंगु ला धकाः भ्रम धमजुइमा । प्रस्तावित अनुसन्धान विषयया पृष्ठभूमि खं
छुइबलय् धाःसा लिच्छविकालय् नेपाल भाषाया स्थितियात कयाः विवेचना
याय् माली तिनि । उबलय् धार्मिक, सांस्कृतिक व सामाजिक रीति स्थिति

न संस्कार परम्परा कथं मध्यकालीन नेवाःजन-जीवनम् ध्येयं दहं वयाः नेपाल भाषा काव्यस्य लिख्यया चवनीगु भावया पृष्ठ पोषकजुया चवंगुला किं धकाः सप्रमाण वालाः क्वः छिना वयने मानि । थुलि धाःसा अवश्य खः शोध अनुसन्धान यायां वनेबल्य् उ । प्राचीन कालया नं नेपाल भाषा काव्य परम्पराया पलाः चि लुङ्के फइला धयागु अभिलषित आकांक्षा चव्य वंगु 'प्राचीन' खं बल्य् ध्वनित यानागु खः । धातु ला थ्व सोझ-ज्यां ने. सं. ४८१-९६५ तकया समयावधि क्षेत्र विशेषतः कताइ । सामान्यतः तः दे पुलांगयात शिष्टता पूर्वक 'प्राचीन' धाय्गु चलन दु ।

१.२ 'सिर्जनात्मक प्रवृत्ति' धयागुया व्याख्या

प्रस्तावित शोधज्या नेपाल भाषा काव्य (नाटक व बाखं त्वःताः) या सिर्जनात्मक प्रवृत्ति विश्लेषण याता वयनेगु खः । सिर्जनात्मक प्रवृत्ति धकाः जि क्वय् न्हयथ । तयागुयात लक्ष्य यानागु खः —

अनुवाद व टीकाया नं मदुगु- काव्य सिर्जना,

ख) काव्य तत्व व (भाव व कला नितिं पक्षया) जाःगु मौलिक काव्य-सिर्जना,

ग) थःगु देश दुने अथवा जःला खःला देशय् प्रचलित व प्रख्यात जुया चवंगु गुगु काव्य परम्परा व प्रवृत्ति खना सजग जुसे थःगु देश, काल, परिस्थिति व जन भावना त्वय्क सिर्जना याता तःगु काव्य,


घ) आत्मानुभूति साधारणीकृत जुइफ्यक काव्य कृतिया अभिन्न अङ्ग थे याना न्ह्यवया तः काव्य,

ङ) थःगु हे पहगु काव्य-विद्या व विशेष प्रवृत्ति ल्हयव्यगु ज्या खे, प्रख्यात व उत्कृष्ट काव्यया लिधंसा कयाः अथवा ऐतिहासिक घटनाया लिधंसा कयाः अथवा थःगु जन-जीवनय् प्रचलित लोक म्ये व लोक बाखंया लिधंसाय् प्रबन्ध काव्य सिर्जना याय्गु ज्या खे ।

२. अनुसन्धान ज्वलंया स्रोत

२.१. नेपाल भाषा काव्यया सिर्जनात्मक प्रवृत्तिया अनुसन्धानात्मक अध्ययन

(२८)




भाय् कयागु आधार स्रोत थुपि खः —

क) लोक म्ये (ख) दाफा भजन सफू (ग) म्ये सफू
घ) शिलाभिलेख (ङ) पौभाः (च) पुलांगु नाटक (मे, श्रृंगारोक्ति, वीरोक्ति, देश व राज बणंन जक) (छ) ध्वाना सफू जुया पिहां वःगु पुलांगु नाटक व म्ये सफू ।

क) लोक म्ये नेवाः जातियाके यक्वं दु । थुगु क्षेत्रय् पूर्वक व व्यापक अनुसन्धान ज्या जुइ हे मानि । आः तक, थुगु क्षेत्रय् श्री सत्यमोहन जोशीः ज्या छुना दीगु नं खः, गुकिया फज स्वरूप लोकगीतया छुं मलका शीर्षक चवखं पासा जन्मोस्वाङ्क (ने. सं. १०७३) स पिदंगु नं खः । उगु चवखंय् गुलि म्ये स्व. श्री मानदास तुलाधरं मुंकाः तया दीगु व श्री प्रेमबहादुर कसाःया संकलनया छुं म्ये नं दुथ्याः । अये तुं जन-कवि केशरी श्री धर्मराज थापां 'मेरो नेपाल भ्रमण' धाःगु सफुतो नेवाः लोक म्येया दसु सहित चर्चा याता दीगु नं लुमंके बह जू । नी न्यादे न्हयः ये, यल व खपया त्वाः स्वालय् यक्वं पुलांगु लोक म्ये वय्कलं मालेगु कुतः याता दिल, उबल्य् हे नेपाल भाषा लोक म्ये लोप जुया वने धुकुगु खं नं श्री सत्यमोहन जोशीं अनुभव याता दीगु खने दु (जोशीः ने. सं. १०७३ पासा विशेषाङ्क) । लोक म्ये नेपाल भाषाय् यक्वं प्राचीन कालयागु दय्माः धकाः पुवारे म्ये, सिन्हाज्या म्ये व धातु म्ये थज्याः गुलि कीत संकेत याता च्वनि । लोक म्ये विकसित जुयाः तिति लिपिवद्ध गीतिकाव्य, मुक्तकाव्य व प्रबन्ध काव्य खने दय्कः वइगु खः ।

ख) भाग्यया खं खः, नेपाल भाषाया गुलिख्य धार्मिक, सामाजिक, श्रृङ्गारिक, नैतिक व ऐतिहासिक बिषय वस्तुया गीति काव्य सम्पदा लिपिवद्ध जुयाः चवगुलि आःतले न्यने वने दया च्वन । दाफा व भजन सफू सफुति लिपिवद्ध जुयाः नेपाल अधिराज्यया धाय् थासय् ध्येय न्यना वना नं च्वन । थुमिके सुरक्षित जुयाचवंगु म्येयात हे आधारभूत प्रमाणिक अनुसन्धान ज्वलं धकाः नाला छचले जिउ । थुजाःगु सफुली विभिन्न इष्ट देव देवीपनि स्वरूप गुण वर्णन जाःगु प्रार्थना म्ये, सामाजिक रीति थिति नीति व्वइगु म्ये, ऋतु ऋतुइ हाजीगु विभिन्न रागय् चिना तःगु म्ये राग कथं ऊवःलाक तया पुचः, पुचः माः हुना मुना-तःगु खने दु । बौद्ध सम्प्रदायस प्रचलित दाफा सफूली चवंगु म्ये धार्मिक सहिष्णुया उदार भावना कामना न्हयव्यया चवंगु यक्वं बांलाःगु उदाहरण धाय् माः ।



(२९)

फुक्क धया थें दाफा व भजन सफूया म्ये छगू हे सलं धया थें राज - भक्ति व देश भक्तिया सामूहिक भावनाया सः म्यका च्वंगु दु । समय समयया थाय् थाय्या अज्ञात व ज्ञात स्रष्टापिनि रचना उज्वःगु दाफा व भजन सफुली दुध्याका तःगु खने दु । उगु इलय् दाफा व भजन ग्रन्थ तथा भजन याय्गु थिति हे नेपाल भाषा काव्यया सिर्जना प्रवृत्ति पितृव्या च्वंगु खः धाय् माः । ज्ञात स्रष्टापि मध्ये आपाः यानाः जुजुपि, रानीपि अनंलि काजि मन्त्री जुया च्वपि प्रतिष्ठित मनूत व प्रतिष्ठित पण्डित (शैव व बौद्ध) खने दु । दाफा सफू विशेष यानाः म्ये स्यना बिहहा गुरुयाके सुरक्षित जुया च्वनीगु जुया च्वन । तर यल बृंगद्यः, भिद्यः, ये पचली भैरवः इत्यादि थासय् धाःसा सम्बन्धित छःया देगल्य् तथा तइगु खः । थुजाःथाय् नं दाफा वाय् भजन खलःया नायःया नियन्त्रणय् उजोगु सफू सुरक्षित याना तइगु खः । सफू पुलां भ्वाथः जुल धाय् व वाय् सुं दातां न्हू कथं सफू च्वकाः छछाय् हल धाःसा (गथे बृंगद्यःया थाय्) न्हूगु सफू छचलीगु नं जुयाच्वन । पुलांगु भ्वाथःगु दाफा वाय् भजन सफुलि ल्ह्याया न्हूगु दाफा वाय् भजन सफू दय्कीबलय् नायः वाय् गुरुया निर्देश कथ पुलांगु म्ये लिक्काः मेमेगु न्हून्हूगु म्ये दुध्याकेगु चलन दु । नेपाल भाषाया पुला पुलांगु गीति काव्य दुर्लभ जुयाव वंगुया छगू मू कारण थ्व खः । आः यक्व दाफा खलः व भजन मण्डली दाफा भजन सफू देवनागरी च्वयातःगु जक छचलीगु जुया वयाच्वन । थुभनं पुलांया पलिंसाय् न्हूगु सफू छचलेगु याइबलय् व पुलांगु लिपि मसः मसिउ घकाः देवनागरी लिपि सफू च्वकाः छचलेगु याना हइबलय् प्राचीन, मौलिक पूर्ण व शुद्धगु दाफा सफू, भजन सफू व म्ये तनाः, लोप जुयाः वनीगु जुया च्वन । दाफा वाय् भजन खलकं भ्वाथः पुलां धकाः वाय्थः पवाय्थः जुइक हिनामिना मयासें अमूल्य पुरातात्विक सम्पदा जुयाच्वंगु उजोगु पुलां पुलांगु दाफा भजन सफू बांलाक कथं हंकः व सुरक्षित याना तय्गु व्यवस्था याःगु जूसः पुलां पुलांगु रचना सुलभ जुइगु, गीति काव्य परम्परा त्वाः मदय्क अध्ययन याय् दइगु, व काव्य परम्पराया प्रवृत्ति व शैली विशेषताया ख्वाः स्वय् दइगु खः । थ्व थौं व कल्लय्या इलं हाया च्वंगु सकसिननं थुइकाः माःगु बन्दोवस्त याय् माःगु ज्या खँ खः । समय चक्रेया विडम्बना ! थौं कल्लय् की थुजाःगु प्रामाणिक ज्वलं छचले मखनीगु स्थितिइ लानाच्वन । संगठित दाफा व भजनखलःयाके च्वंगु सफूया हे थुजोगु गति धाःसा सामाजिक विषय बस्तु व ऐतिहासिक विषय बस्तु दुगु गीति मुक्तक व बाखं-म्ये च्वया

तःगु पुलां पुलांगु म्ये सफू मालाः लुइकेगु कन दकले आगां छाय् यःगु ज्या जुया च्वन । छाय् धाःसा नि उज्वःगु ज्वलं व्यक्तिगत संकलनय् जक दइगु, दाफा फजन सफुली मदइगु जुयाच्वन । अय् जुयाः काव्य शास्त्र कथंया काव्य रचना (मौलिक वाय् राममायण, महाभारत वाय् लोक धारणाया लिखंसा कया च्वयातःगु सां) नेपाल भाषां च्वयातःगु ग्रन्थ उस्त लुया मवःनि । लुया वःगु नं गुलि पू मवं । गुलि छत्वाः नित्वाःचा जक । गुलि आखः सीमदय्क पी कुचा चने धुंकूगु । हानं उजोगु अभिलेख सफू छथाय् दुगु, मेथाय् दइ मखुगु । राष्ट्रिय अभिलेखालयय् दुगु जुजु प्रताप मल्लया म्ये सफू मेथाय् मलू । अथ्य हे च्वसापासाया संस्थापक श्री प्रेमबहादुर कसाः-याके दुगु म्ये सफूया जोगु हे म्ये दुगु म्ये-सफू मेथाय् दुर्लभ जुया च्वन । व्यक्तिगत संकलनय् वाय् मल्ल जुजुपिनि लाय्कुली दइगु उजोगु म्ये सफू गुलि प्वः पी चीगु ज्याय् छचला वां छवत, गुलि विदेशय् च्वया वन (Wright : History of Nepal १८७७ इ. सन. पौ २१५-२१८ दुने ल्याः १४४५ या सफू) गुलि लें सिथय् मियातःगु अन लाः थन लाः मदय् त्यंगु खंकाः न्याना तिति पापा याना तल (श्री कसाः) ।

ग) शिलाभिलेख, मुद्राभिलेख व पौभाः इत्यादि नं नेपाल भाषाया लिपिवद्ध जुयाच्वंगु म्ये व माःमाःगु सन्दर्भ सूचंया महत्वपूर्ण श्रोत खः । जयदेव निहमं संस्कृत भाषां पशुपति स्तोत्र शिलाभिलेखय् कीकाः थकू थें मध्य कालीन नेपालया जुजुपिसं नं शिलाभिलेखय् संस्कृत, मैथिली व नेपाल भाषां इष्ट देव देवीपिनि स्तोत्र व उपदेश वाक्य कीकाः थकूगु लुया वःगु दु । रामायण, महाभारतया सचित्र बाखं नं (गद्यमय) यल कृष्ण देगल्य् कीकाः तःगु दु । नेपाल भाषां उपदेशात्मक म्ये छपु खवपया जुजु जगत प्रकाश मल्लं (ने. सं. ७९२) भण्डार खाःया हिनीच्वंगु शिलाभिलेखय् कीकाः थकूगु खनेदु । थ्व सिवे महत्वपूर्णगु मेगु पुरातात्विक ज्वलं खः (आपालं अन्वेषक इतिहासकारतसें त्वःफिका तःगु) मलया जुजु सिद्धि नरसिंह मल्लं च्वःगु श्री कृष्ण लीला सम्बन्धी गीति काव्य नं लिपिवद्ध (नेपाल लिपि) याना तःगु पौभाः । थुकी सिद्धि नरसिंह मल्लया ३१ पु म्येया ३१ गु तुं दृश्यया रंगीन किपा दु । थ्व किपा ह्नि ह्नि स्वय् दइ कथं थौं कल्लय् यल मंगलय् च्वंगु राष्ट्रिय धातु कला संग्राहालयय् (श्री ५ या सरकार पुरातत्व विभागया) च्वया तःगु दु । थ्व पौभाः दय् दस ज्येष्ठ पूर्णिमा खंहु सर्व साधारण जनतां स्वय् खने दय्क कृष्णदेगल्य् च्वया तइगु खः । उखुन्हु

हे सन्निहलं निसैं थुकिया भजन काती दबुली याइगु थिति आः तलें दनि ।
 थ्व पोभाः कपा नं जःखः सिथय् सिथय् गुनां चित्र व आखः मदय् धुकल ।
 गुलि गुलि म्येया आखः ज्यालाः व्वने हे मजी धुकल । थुकी लिपिवद्ध जुया
 च्वंगु म्ये शुद्ध व पु वंगुलि आपालं प्रमाणिक जू । खप लाय्कूया अंगलय्
 नं रागमालाया म्ये व नाटकया दृश्य चित्र परिचय अभिलेख सहित चवका
 तःगु नं व्वला वने धुकुगुलि छु छु भाषाया म्ये छु छु दृष्य दु तिफ्याक
 स्वय् खने मदयाः च्वन । मेगु खं, गुलि शिलाभिलेख
 राष्ट्रिय अभिलेखालयस लुयावःगु ऐतिहासिक तथ्य व आत्मदुःखानुभूति
 प्वका तःगु वृद्धि लक्ष्मी (जुजु रणजीत मल्लया रानी) या गीति मुक्तकया
 खंयात माःगु दसिया ज्या बीउ । मेगु निगू अभिलेख जुजु रणजीत
 मल्लं दोहा म्ये दय्का प्रशन्न जूगु खं प्वलाच्वंगु दु । थुगु तथ्य जुजुपिसं
 गुगुं लयताःया अवसरय् दोहा थें जाःगु म्ये चिना दाफा भजनय् हाय्केत
 प्रसाद प्रशन्न जुइगु थिति व्वय् हः । मे मेगु शिलाभिलेख जुजुपिनि प्रशस्ति
 न्हायना तइगु “कवीन्द्र” व “शस्त्र शास्त्र संगीतादि विद्यापारंग” थजाःगु
 तथ्यं मध्यकालीन नेपालय् काव्य अलंकारया अध्ययन व काव्य साधना
 जुजुपिनि जक पुक् थें जुया च्वंगु क्यं । मध्यकालीन नेपालया
 जुजुपिसं थः थुपिनिगु शासन कालय् थः थःपिनिगु नां व प्रशस्ति पद
 किया तःगु मुद्राभिलेख नं प्रस्तावित शोध ज्यायात दसि कथं छचलेत
 ग्वाहालि जुइगु खनेदु ।

२.२ अनुसन्धान ज्वलंया मेमेगु स्रोत

आः थन प्रस्तावित शोध ज्याया निति ज्याय् छ्यले दुगु भाःभाः
 च्वय् वंगु १.१ व १.२ खण्डया खं ध्यान दृष्टि तया मुनागु अनुसन्धान ज्वलें
 स्रोतया परिचय खं न्हाव्वय् त्यना । ने. सं. १०९८ यंला गाः ६ खुन्हु
 (ह्लापां सूर्य विनायक खपया दाफा सफू) निसैं थाय् थासयया दाफा सफूया
 कपा कयाः अनुसन्धान ज्वलं मुनेगु ज्या छुनागु खः । आः तक संघ संस्था,
 दाफा खलः, भजन खलः व व्यक्तिगत संकलन नापं याना कीगु स्रोत
 अनुसन्धय ज्वलं मुने धुन । मेगु क्षेत्रया स्रोत नं ज्वलं मुनेगु ज्या ल्यं
 दनि । अनुसन्धान ज्वलं मुनेगु ज्याय् ग्वाहालि जूवःगु मुख्य मुख्य स्रोतया
 परिचय न्हायनेगु थन प्रासाङ्गिक जुइ-

✿ खप राष्ट्रिय अभिलेखालयस च्वयातःगु गुलि पोभाया नेपाल भाषा
 च्वयातःगु परिचय खं म्हुइगु दुप्रयाश यानातःगु दु ।

क) स्व. श्री मानदास तुलाधरं मुना दिगु मे

आपाःयाना धार्मिक भावं, छु छु मनोरञ्जनया निम्ति व नैतिक, सामाजिक,
 वैयक्तिक विषयया खं सञ्चार याय् निति च्वया तःगु दाफा व भजन-सफू
 सफूया नेपाल भाषा मे न्हापालाक ल्हया मुना अध्ययन याय् वहुगु विषय ज्वलें
 रूपय् परिचित याका दीम्ह दकले न्हापम्ह व्यक्ति स्व. मानदास तुलाधर खः ।

“इतिहास पूर्णगु नेपाल भाषा, नेपालया
 संस्कृति तथा साहित्य तिव्र गति
 लोप जुजु वना च्वंसां लिपाया
 नवयुवक, साहित्यकार तथा लेखक
 अन्वेषक तय् ज्यायागु भूमिका
 म्हु मजुयमा”

—मल्ल शाहकालया मे, प्रकाशकीय खं ।

धयागु पवित्र तातुनां ध्वाका कौलागा ७ सोमवार ने.सं. १०४७ निसैं दूरदर्शीता-
 पूर्वक नोस्वना दीगु वय्कःया थ्व पुलां मे मुनेगु ज्या घात्थें हे आः न्हाय्याय्
 त्यंगु नेपाल भाषाया अनुसन्धानोन्मुख प्रवन्ध साधनाया पलाः च्वय्केत माःगु
 छका मूलं हे नोस्वना थका दीगु ति ग्यं । कान्तिपुर, ललितपुर, भक्तपुर, कीर्तिपुर,
 तानसेन इत्यादि छंछा छंछाय् च्वंगु मे सफुलि थःम्ह हे मे ल्हया कया, ल्हय्का
 कया दीगु जुया च्वन । ने.सं १०७७ तकया दुने ८०० पु (जोशी, ने.सं. १०८७
 पास) विशेषाङ्क) विभिन्न विषयया मे खाका दिल । ने.सं १०८७ तकया दुने
 जम्मा ९०० पु मे खाःवल (हृदय, ने.सं. १०८७ पुलां मे भाग २) । वय्कःया
 थ्व ज्यां नेपालया बुद्धि-जीवि जगतय् नेपाल भाषा काव्य परम्पराया गौरवपूर्ण
 व ताहाकःगु अस्तित्व दु धयागु खंया सजीव दसि न्हाव्वया सजगता याना दिउगु
 जुया च्वन । थ्व ज्याया निगु परिणामकथं धाय् माल सं. श्री फत्तेबहादुर सिंह
 नेपाली विहार कविता संग्रहस (ने.सं. १०९६) छपु नेपाल भाषाया प्राचीन गीति
 मुक्तकयात थाय् बिया दकले न्हापालाक मुद्रित रूपय् प्रकाश याना जनसमक्ष
 तया दिल । अनलि, श्री ठाकुरलाल मानन्धर पुलांगु मे (ने.सं १०७२),
 स्व.श्री मानदास व श्री सुगतदास मल्ल शाह कालया मे (ने.सं. १०७७), स्व.श्री
 मानदास पुलांगु मे-भाग २ (ने.सं. १०८७) व पुलांगु म्ये भाग ३ (ने.सं १०८८)
 पिकया दी धुंक्गु दु । अथ्य श्री स्व.तुलाधरया आदर्श लं लिना मेनेगु लं नं नेपाल

✿ खेलुइताः ✿

(३३)

भाषाया पुलंगु म्ये व बाख म्ये पिदना च्वगु दु । थुपि प्रकाशनं याना नेपाल व विदेशया विद्वानपिसं नेवाः जातिया मौलिक व सिर्जनात्मक विधा नेपाल भाषाया गीति काव्य खः धयागु धारणा स्थापित याना च्वगु दु ।

स्व. श्री मानदास तुलाधर थहां मुनागु म्येया थोत १६ गू दाफा भजन व वैयक्तिक सकलनया संक्षिप्त तर अस्पष्ट व अपूर्ण परिचय बि । थका दीगु दु । वय्कल म्ये ल्हाया कया दीगु दाफा सफू मध्ये श्री प्रेम बहादुर कसाःया थाय्या व टक्सार टोल तानसेनया दाफा सफू जक सुलभ जुया च्वंगुलि उकिया किपाः कया हयागु दु । स्व. श्री मानदास तुलाधर कयना दीगु गुलिखे दाफा सफू (परिचय विवरण अस्पष्ट व अपर्याप्ततां याना) व मेमेगु म्ये सफूया हस्तलिखित सफू आः दुर्लभ जुयाच्वंगु दु । स्व. श्री तुलाधरं मुना थका दीगु म्ये मध्ये प्रकाश याय् मानिगु जक मुनाः पुलंगु म्ये ४ गूगु भाग सफू याना पिकायकेगुली साहित्य शिरोमणि तथा कवि केशरी श्री चित्तधर हृदय र्वसाः र्वयाच्वना दीगु दु । स्व. श्री तुलाधरं मुना थका दीगु म्ये दुगू कापि छप्प आः नेपाल भाषा परिषदया सफू कुथइ सुरक्षित याना तःगु दु ।

ख) श्री प्रेम बहादुर कसाःया सफू कुथइ नेपाल भाषा म्ये 'सफू च्वसापासाया संस्थापक श्री प्रेम बहादुर कसाःया सफू कुथी नेपाल भाषा साहित्य, नेपाल संस्कृति व काव्यत्तर विषयया हस्तलिखित पुलंगु सफू संरक्षण जुयाच्वंगु दु । थुपि सफू गुगुं विषयया शोध ज्याया निति प्रमाणिक ज्वलं कथं छयले वह जू । वय्कःया थ्व सकलनय दुगु यववं म्ये सफू व दाफा भजन सफू मध्ये थ्व अनुसन्धान ज्यायात आपाः ज्याय् छयले दुगु म्ये सफू, दाफा सफू व भजन सफू जक २५गू दु । थुपि पुलंगु हस्तलिखित ग्रन्थत गुलि वय्कःया थाय् ह्यापानिसं दयाच्वंगु, गुलि वसन्तपुर व हनुमान ध्वाखा लें सिथय् मिया तःगु न्याना हया दीगु व गुलि छें थ्यंक मिइत हःगु न्याना कया दीगु जुयाच्वन । ये, यल, खपया म्ये सफू व दाफा तथा भजन सफू मध्ये थिमि बालकुमारीया नेपाल लिपि च्वया तःगु दाफा सफू, ल्याः ५७ या येया छगू दाफा सफू महत्वपूर्ण जू । ल्याः ६० ना २९५ या म्ये सफूती ६पु व ल्याः १५ या म्ये सफूती १३ पु नापं याना आतले मुद्रित रूपय पिहां मवःनिगु १९ पु (रा. अभिलेखालयस + थ्व सफू ने. सं. १९०९ दं दुने प्रकाशित जुइ धुकल ।

२१ पु जोलाःगु जक छथी त्वःतावल्य) जम्ना याना २७ पु जुजु प्रताप मल्लया गीति मुक्तक कवितात सुरक्षित जुया च्वं च्वंगु नेपाल भाषा काव्य इतिहासया निति मूल्यवान ज्वलं खः । अथ्य हे तं म्ये सफू (ल्याः ६७१/७०५) या सिद्धि नरसिंह मल्लया ९ पु म्ये नं विश्वसनीय व शुद्ध प्रमाणिक ज्वलं खने दु । वय्कःया थुगु सफू कुथी ने. सं. ७३२ या म्ये सफू (म्ये सफू १०/२२५ थ) तक लूगु दु । थुलिमछि महत्वपूर्ण म्ये लुयाः नं वय्कलं हे सम्पादन याना दीगु बाखं म्ये (ने. सं. १०८३/ वि. सं. २०२०) व मतेनाया म्ये सफूनी (ने. सं. १०७९) दुध्याना च्वंगु तःगु मछि हे महत्वपूर्णगु म्येया हस्तलिखित गुरुप्रति आः तलें मलूनि ।

ग) राष्ट्रिय अभिलेखालयस नेपाल भाषा म्ये सफू

प्रस्तावित शोध ज्याया निति विश्वस्त, प्रामाणिक व मौलिक अनुसन्धान ज्वलं राष्ट्रिय अभिलेखालयस नं सुरक्षित जुया च्वंगु दु । थन दुगु म्ये सम्बन्धी अभिलेख ग्रन्थ ३३ गू मध्ये आपाल महत्वपूर्णगु १२ गू दु । थन दाफा भजन सफू छगू (माइ० फि० ३१५/२६) जक दु । छम्ह हे स्रष्टाया छगू हे पूवगु अभिलेख ग्रन्थय श्री जगत प्रकाश मल्ल अर्थात जगच्चन्द्रया नेपाल भाषा संगीत (माइ० फि० वी २८ ना २६, ने. सं. ७९२) खः । थुकि गुलि प्याखंया म्ये, गुलि अष्ट नायिका भेद सम्बन्धी म्ये, गुलि शृङ्गार रसया म्ये दु । म्ये ५३० पुं मल्लाः । थ्व नाप याना आः तक मुद्रित रूपय पिहां मवःनिगु राष्ट्रिय अभिलेखालयया म्ये सम्बन्धी फुवकं ग्रन्थय जक ६१७ पु म्ये खनेदु । थुपि म्येया विषय-वस्तु भक्ति, शृङ्गार, नीति, आत्मपीडा, प्रकृति चित्रण, ऐतिहासिक घटना इत्यादि जुया च्वंगु दु । थन थाय् थ्व नं लुमंके वह जू-राष्ट्रिय अभिलेखालयस दुगु बही सफू धलः (माइ० फि० ए ६१०/२३) स म्ये सम्बन्धी ९ गू सफू न्हयथना तःगु दु । तर दुर्भाग्यवश उकीया सफू परिचय अस्पष्ट व अपूर्ण जूगुलि आः अभिलेखालयस खने दनिगु मध्येया गूगु सफू खः कोछी मछि । गुलि शायद राष्ट्रिय अभिलेखालयस मंदय धुकूगु नं जुइफु ।

राष्ट्रिय अभिलेखालयस आः सुरक्षित जुया च्वंगु दाफा व भजन सफूया म्ये मध्ये ५५६ पुया स्रष्टा ज्ञात जू । रचना समय जक ज्ञात जूगु

६ पु व मेगु फुवक्या स्रष्टा व रचना समय अज्ञात जुया च्वन । थन दुगु दकले पुलांगु म्ये सफू ने. सं. ७२५ या खः । दकले लिपाया ने. सं. ९२४ तकया म्ये खने दु ।

घ) यल मंगलय् भिद्योयाथाय्या भजन सफू नेपाल लिपि च्वया तःगु खः । थ्व स्वसः पौ नं मल्याक दुगु अवस्था बांलाःनिगु सफ खः ★ । थ्व सफू पित यने मबिउसें न्हयल्लाःन्हसित मवयंसे सुरक्षा याना तःगु दु । थुकी जुजु सिद्धि नसिह मल्लया ३६ पु कृष्ण लीला सम्बन्धी म्ये, जुजु निवास मल्लया नीति, शृङ्गार व बौद्धिकता जाःगु मुक्तक चिनाखँया नापं यल्यवाधः प्याखँया गुगु गीतिमय खँल्हाबल्हा छत्वाः बत्वाः नं दु । अथ्य हे जुजुपि योगनरेन्द्र मल्ल, विष्णुमल्ल व महिन्द्र मल्ल (योग नरेन्द्र मल्ल व राजेश्वरीया काय्) या शासनकालीन म्येया नाप नाप स्थानीय रचनाकारत गथ्य कवि विजयानन्द (सक्षिप्त परिचय संकेत नं), कृष्णसिह (सिद्धि नरसिह मल्लया गीति मुक्तक प्रभावित), वीर राज (ने. सं. ९९९) व मेमेपि खने दु । जुजु श्री ५ रणबहादुर शाहकालीन छपु चिनाखँय सति वनीगु दृश्यया सजीव व रोमान्चकारी वर्णन संक्षिप्त बिद्या तःगु खने दु । भजन खलःया नायो नं थ्व सफू स्वय् हे मजिउ धकाः कयना मदी ।

न्ह्यागु थजु आः तक किपा कयाः अध्ययन यानागु उकिया म्ये मध्ये ४३ पु जक मुद्रित रूप्य प्रकाशित जुइ धुंकूगु व मेगु ७५ पु धाःसा अप्रकाशित हे तिनिगु खः । थुपि ११८ पु म्ये मध्ये नं स्रष्टा, सम्बन्धित शासक वाय तिथि खने दुगु म्ये ८७ पु खने दु । मेगु ३१ पु जकया स्रष्टा वाय रचना काल अज्ञात जुया च्वन ।

ङ) बुंगद्यःयाथाय्या दाफा सफू नं (ने. सं. १०१८ दँय च्वका दछाया तःगु)

★ हाल्य् हे यल भिद्यो व बुंगद्यो भजनया गुरु श्री सिद्धिमान श्रेष्ठ (७५ दँ), कोथु तःक्याः मंगलवजार नापं जूगु खँल्हाबल्हा थ्व च्वःगु हे प्यंगु सफू वयकःया बाज्यां च्वया थकूगु धकाः सी दत । छगू बुंगद्योयाथाय्, छगू पूर्णचण्डी, छगू तमोतसे याइगु भजनय् दु धकाः वयकलं कना दित ।

(३६)

❖खेलुइताः❖

महत्त्वपूर्ण जू । अन दुगु जि खनागु स्वंगू सफू मध्ये छगुलिइ पुरा हे नेपाल लिपि च्वया तःगु तर गनं गनं जक देवनागरी लिपि च्वया तःगु म्ये दु । थुकिया म्येया स्रष्टापि यल, येँ व ख्वपया जुजुपि नं खने दु । थुकी नं यलया स्थानीय पण्डित कविपि गथ्य अमृतानन्द, बिजयानन्द व मेमेपि खने दु । थुकी मुनाच्वगु आपालं म्ये नं धार्मिक सहिष्णुताया यइपुगु व निगु उदाहरण ल्याव्वया च्वंगु दु । वंशावली व ऐतिहासिक दसिकथं हे १००० दं मल्याक प्राचीन खनेदुगु बुंगद्यः जात्रा जुया नं थुकी उलि प्राचीनगु म्ये खने मदुगु तसकं दुःखया खँ खः । हानं नेपालया जनजीवनय् धार्मिक दृष्टिकोण थुलि लोकां ह्याःगु बुंगद्यः जात्रा (मत्स्येन्द्र नाथ जात्रा) दसेलि सम्बन्धित नाथ संप्रदायया (मत्स्येन्द्र, मीन व गोरखनाथया) परिचायक तथा विचार प्रतिपादक रचना खने दय् माःगु खः । उजोगु रचना आः तक जि मखनानि ।

च) बौद्ध दाफा खलःया दाफा सफू जि अध्ययन यानागु भिल्लेबहाः यल, नागबहाः यल; श्री प्रेमबहादुर कसाः याके च्वंगु व तक्सार त्वाः तानसेन व भोजपुर #यागु खः । तानसेनया सफू छगुलिया किपाः काय्का हयागु दु । मेमेगुया माःमाःगु जक ल्ययाः किपा काय्का हयाः अध्ययन याना नागबहाः-यागु सफूया म्येय् बिद्या तःगु जुजुपिनि नां व तिथि गुगु सन्दिग्ध, भ्रमपूर्ण व अन्ध अनुकरणया लिजः थें च्वं । थ्व त्वता मेगु स्वंगूया म्ये, जुजुपिनि नां व तिथि यक्वं बिश्वसनीय जू । थुपि बौद्ध दाफा सफूया मंकाःगु विशेषता थुकथंया खने दु ।

अ) धार्मिक सहिष्णुता जाःगु म्ये मुना (बौद्ध, शैव, शाक्त स्वतांया इष्ट देव देवीपनि प्रार्थना स्तुति रचना)

आ) बौद्ध जातक बाखँया लिधंसाय् च्वया तःगु इतिकथानात्मक व गीति मुक्तक रचना

इ) स्वयम्भू वाय् स्वयम्भू पुराणय् आधारित गीति मुक्तक रचना

ई) बौद्ध दर्शन व विचार जाःगु गीति मुक्तक रचना

टक्सार टोल भोजपुरया दाफा सफूया म्ये ल्हया तःगु कापी छगू श्री उ. प्रा. काशीनाथ तमोठया पाखें स्वय् खन । नेपाल अधिराज्यया पूर्वया छगू जिल्ला थाय् भोजपुरय् दुगु थुकिया नेपाल भाषा म्ये ज्वलं-यात थ्व अनुसन्धान ज्याय् जि उपत्यकां पिनेया पूर्वरिखेया क्षेत्रया प्रतिनिधि अनुसन्धय ज्वलं यानागु दु ।

❖खेलुइताः❖

(३७)

(छ) महालक्ष्मी घोषायाय भजन व दाफा सफू- थुपि निगुलि देवनागरी लिपि चवका तःगु सफू खः । भजन सफू नीदें निसें सुइदें न्हवः चवका तःगु व दाफा सफू जक थ्यं मध्यं सच्छि दें न्हवः चवका तयागु खः धकाः दाफा खलः या नायो आशाकाजीया (गाः बहाल कायगुननिया) धापू खः । महालक्ष्मी भजन सफुती अभयानन्दया गीति रचना व मेमेगु देव देवीपिनि सम्बन्धित स्तोत्र प्रार्थना म्ये दु । दाफा सफुली मालश्री रागया अष्ट मातृका भैरव गणपिनि विषयया रचना व गुगु सामाजिक विषय वस्तुया म्ये नं दु । तर आपालं रचनाया स्त्रष्टा व रचनाकाल अज्ञात जुया च्वन ।

२.३. अनुसन्धान ज्वलं मालेत ल्ययागु क्षेत्र व ज्वनागु आधार

नेपाल भाषा गीति काव्य (दाफा व भजन रूपय्) अधिराज्य भर नेवाःत गन गन थःगु संस्कृति, सभ्यता नापं यंका च्वं च्वंगु दु, अन अन दइगुला जुल । प्रस्तुत अनुसन्धान ज्याया निति माःगु अनुसन्धय ज्वलं ताः लाकेत कवय् न्हयनागु थाय् प्रतिनिधि क्षेत्र याना ल्ययागु जुल -

क) मूल क्षेत्र

येँ, यल व खप

ख) पूर्वे रिख्यया कचा क्षेत्र

भोत, दोलखा, व भोजपुर

ग) पश्चिम रिख्यया कचा क्षेत्र

पोखरा व पाल्पा

थुपि क्षेत्र ल्यय्त ज्वनागु आधार-

(क) नेपाल भाषा गीति काव्यया क्षेत्रीय बिस्तार प्रसार व लोक ह्याः धयागुया दसि । आः तक ताःलाकागु ज्वलया लिधंसाय् धाय्गु खाःसा नेपाल भाषाया गीति काव्यया मूल स्रोत क्षेत्र नेपाल उपत्यकाया येँ, यल, खप खः धयागु तथ्य न्हयःने च्वं वः । मेमेथासं ताः लाकागु अनुसन्धय ज्वलं फुक्क धयाथे येँ, यल, व खपया दाफा भजन सफुती दुथ्याःगु म्येया विषयनाप जो जो लाः । थुलि जक मखु कि मेमेथाय् दुगु दाफा भजन म्ये येँ, यल व खप मध्ये गुगु थासं वःपि खः उगु उगु थासं हयातःगु धकाः पोखरा व पाल्पाया स्थानीय दाफा खलःया सम्बन्धित मनुतय् धापू दु । हानं मेमेथाय् दयाच्वंगु दाफा सफूया गीति

(३८)

❖ खेनुइताः ❖

काव्यया विषय-वस्तु व न्हययना तःपि शासकतय् नां स्वयं हे उगु दाफा सफूया मूल स्रोत क्षेत्र हासीके अःपुज् । तानसेन टक्सार त्वाःया दाफा भजन सफू व भिछें बहाः, नाग बहाः यलया दाफा सफूया गीति रचनात नाप जोलाःगु ला दहे दु । थुपि स्वंगुलिइ शासकतय् नां तं मध्यकालीन यल राज्यया शासकपिनि नां आपाः वः । अथ्य हे ह्यासाया दाफा सफुलि न्हयया हया तःगु म्ये (थव कापो श्री प्रेम बहादुर कसाःया थाय् दु) येँया दाफा सफूया म्येनाप जोलाः । साहित्यिक पत्र पत्रिका व प्रचार प्रसारया ज्याभः लभः छुं मदुबलय् सिर्जना जूगु नेपाल भाषा गीति काव्य धुभनं नेपाल अधिराज्यया थाय् थासय् न्यनावं च्वंगु जुया च्वन । दाफा भजनया माध्यमं सहृदय श्रद्धालु भक्ततसें भजन म्ये हालाः न्यनाः ल्यताया ल्यताया वःगु जुया च्वन । ताः लाकागु अनुसन्धय ज्वलं पाखें छता खें स्पष्ट जू वःगु दु, गुगु रचना विशेष आपाः धया थें दाफा भजन सफुली दुथ्याना च्वंगु खने दु । दसुया निति “नारायणजु गुँया सिस रसन विज्याक”, “जमुना सिध मनिन”, “अथिर शरीर छाया निदानस उपाय”, “यथाहा अकुरन फायाव मडाव”, “सिहया धुं ज्वना व्याड्या ख्याल”, “कपतिया मायान बिडा” तःगु मछि हे शैव व बौद्ध दाफा भजन सफुली दुथ्याना च्वंगु खने । अथ्य जूगु लोक ह्याःगुया कारणं खय्फु ।

(ख) स्थान विशेषया सिर्जनात्मक प्रवृत्ति । विभिन्न क्षेत्र व थाय्-यात प्रतिनिधित्व याकाः अनुसन्धय ज्वलं मुनेगु यानागुलि थाय् थाय्या नेपाल भाषा गीति काव्यया सिर्जनात्मक प्रवृत्ति प्रक्रिया लिसे परिचित जुइत ज्याछिन । येँ, यल, व खपया (मध्यकालीन नेपालया) जुजु व कवि-पिसं गीति काव्य सिर्जना याय्गुया नं प्रतिस्पर्धा हे याना वं थें च्वंक विभिन्न विषय, रस व शैलीया यववं गीति काव्य च्वया थकूगु खनेदु । मुनागु अनुसन्धय ज्वलं अध्ययन थाय् थव नं प्रमाणित जू वः -

येँया जुजु प्रताप मल्ल, यलया जुजु सिद्धि नसिह मल्ल व खपया जुजु जगत प्रकाश मल्लपनि इलय् गीति काव्यया उन्नति थःथःगु ढंङ्गं यक्वं जूगु खनेदु । छता खें थव नं न्यने वह जू - सिद्धिनसिह मल्लया गीति काव्य येँ, यल व खपया विभिन्न दाफा भजन सफू सफुली दुथ्याना च्वंगु खने दु थें प्रताप मल्ल व जगत प्रकाश मल्लया (जगतचन्दया) गीति

❖ खेनुइताः ❖

(३९)

काव्य यलया दाफा भजन सफुली अपायस्कं खने महु । थुकिया वा
उवलेया स्वनिगःया सम्बन्ध सुथां मलाःगुलि जुइफु । कित उगु
रचनातय् प्रयोजन सम्बन्धित जुजुपिनि लायकुली जक सीमित याना त
नं जुइफु । यल भिद्योया दाफा सफुली विजयानन्द व कृष्ण सि
जाःपि स्थानीय कविपिनिगु गीति काव्य रचना नं दुथ्याना च्वंगु खने
बुंगद्योया दाफा सफुली अमृतानन्द, कविर व विजयानन्द धाःपि स्था
कविपिनि रचना दुथ्याना च्वंगु खने दु ।

येया दाफा व म्ये सफुलि कृगल थाकुर, नवमी सिंह, गरुड
देवानन्द, वृषभानन्द, हरध्वज, छत्र ध्वज स्थानीय कवि रूप्य परिचित
वःगु दु । तर खवप रिखेया दाफा सफुली शासकत त्वःता मेपि
साधारण व्यक्ति कवि रूप्य परिचित जू वःपि उस्त मखनानि । ह्लासाय्
नेपाल भाषा दाफा सफुया म्ये नं उपत्यकां हे सिजित जुयाः अन स्थाना
जुया वंगु म्ये जक खने दु । ह्लासाय् प्रवासित जूपिसं व जुया च्वंक्वि
थःथःपिनि दुःख सुखया अनुभूति व्वया च्वंगु म्ये छपुं लुया मवःनि
तानसेन व भोजपुरया टक्सार त्वाःयागु दाफा सफुलीनं अनया स्थानी
विषययात कया च्वया तःगु म्ये उस्त मलू ।

(ग) स्थानीय भाषिक स्वरूप व भाषा अलङ्कार । ताः लाका
अनुसन्धय ज्वलं थाय् थाय् व इलय् इलय्वा गीति काव्य सिर्जना जुइगु
समय अनुसार व थाय् अनुसार पाना वःगु नेपाल भाषाया स्वरूप अध्यय
थाय् उपयुक्त आधार ज्वलं खः । नेपाल भाषाया गीति काव्य रचना
आपाः हे धया थें स्त्रष्टापिनि तुगः खँया सहज व स्वाभाविक अभिव्यक्ति
खः । नेपाल भाषां नेवाः जातिया भावना व विचार स्वाभाविक कथं यका
अभिव्यक्त याय् फुगु थ्व हे गीति काव्य विधाय् खः । हानं थुजाःगु गीति
काव्यय् स्त्रष्टापिसं छयला तइगु अलङ्कार नं अध्ययन याय् वह जू । अलङ्कार
भाव अनुकूल जुइक थःथःपिनिगु जन जीवनया अनुभूति बुइका छयला
तइगुलि इमिके कृतिमता व अनुकरणया नं ताय् महु । अलङ्कार (खँत्वा
खँभाय्) छयलीगुली नं स्थानीय जातीय विशेषताया जलं खया च्वंगु
खने दु ।

(४०)

खेलुइताः

३. नेपाल भाषाया काव्य धाः

आः तक मुने धुनागु ज्वलनं कयं थें काव्य स्त्रष्टाया नां व काव्य
रचना जूगु दें (तिथि व शासकया नां) खने दुगु नेपाल भाषा काव्य कृति
निसें जक ल्याः तया ह्यबलय् थुकी छासकथ भक्ति काव्य, श्रृङ्गार व रीति
काव्य, नैतिक काव्य निगुण मुक्तक काव्य, बाख मे काव्य धाः न्हयाना च्वने धुकूगु
मय । थ्व फुक्क काव्य धाःया विषय प्वला स्वयंबलय् आत्मव्यथा प्वला तःगु
प्रार्थना, श्री कृष्ण व रामया चरित्र गुण वर्णन, ऋतु वर्णन, नायिका भेद
वर्णन, मिसाया शारीरिक सौन्दर्य वर्णन, जुजु देश-प्रजाया गुण वर्णन,
जीवन दर्शन, नैतिक व धार्मिक उपदेश, देशया स्थिति व सामयिक घटना
वर्णन, मतिना इत्यादि जुयाच्वंगु खने दु । थुजागु पुलांगु काव्यया
सिर्जनात्मक सक्रियता ने. स. १९५५ लिख्य तक खने दु । ने. सं. ७५०-७९४
तक दुनेया अवधि थुगु काव्य धाःया पराकाष्ठा खः ।

३.१ भक्ति काव्य धाः- भक्ति काव्यस वंणव, बौद्ध, शैव व शक्ति
धर्मावलम्बीया इष्ट देव देवीपिके ज्ञात अज्ञात कविपिसं थःगु (सामूहिक नं) दुःख
वेदना प्वलाः उजोगु दुःख वेदना फुका बिउ धकाः प्रार्थना यानातःगु खने दु ।
तत्कालीन (आः तले नं) नेपालया जन जीवनय् न्हयागु ज्या खँ धर्मया लं
तिप्यकेत स्वहंगु संस्कार दु । प्रागैतिहासिक कालया संज्ञास संस्कारया अवशेष
हे थल्यमा भागवत व कालिका पुराणया प्रभावं छाय् मछयमा तान्त्रिक धर्म
काण्ड पिना स्वाकूगु संस्कार हे थजुइवगु नेपाल भाषाया काव्यस, अष्ट
मातुका नवदुर्गा गण देवीपिके थःगु शत्रुपक्ष नाश याना बी फय्का
बिउ धकाः प्रार्थना याना तःगुया दृष्टान्त यक्व दु । अलय् शक्ति देवी-
पिनिगु स्वरूप, गुण व उपकारया वर्णन नं भक्तितय्के उस्ताह व पराक्रम
स्वाकी कथं याना तःगु लू । थुजागु ओजपूर्ण मालभी व विभास रागय्
चिना तःगु गीति काव्य नेपाल भाषाया बीर रस प्रधान काव्य धर्मया
पिलाय् स्वथना तःगु जुया च्वन । थ्व हे सन्दर्भय् भैरव व भीमसेनयाके
शक्ति वर पवने निति याना तइगु गीति काव्य नं ल्याः काय् वह जू ।
नेपाल भाषाया भक्ति काव्यया थ्व लुमके वहुगु देन खः । भक्ति काव्यया
माध्यमं नेपाल जन-जीवनय् धर्म सहिष्णुताया भावना कामना व्यावहारिक

खेलुइता

(४१)

संस्कार कथं स्वाका तय विउगु नेपाल भाषा काव्यया मेगु विशेषता खः ।
कृष्ण भक्ति परम्पराया मे साधना याय्गुली सिद्धिहरसिंह मल्लया कवि
रूपय स्थान नेपाल अधिराज्यस आः तर्क अद्वितीय खःनि ।

३.२ शृङ्गार व रीति काव्य-युजागु काव्य बलनेत मध्यकालीन
नेपालया ये, यल व छवंपया लायकूया सक्रिय भूमिकां तिवः बिउगुलि
धयार्थे खने दु । जुजु व राजकुमारबिनि शिक्षाया छगू विषय संगीत,
काव्य, अलङ्कार व पुराण खः धयार्थे आपालं पुरातात्विक दसि कथं ।
मेगु, तत्कालीन जुजुपिनि वैवाहिक सम्बन्ध नं उत्तर पूर्व भारतया राज-
कुमारीपि लिसे जुया वंगु (दसु येया जुजु प्रताप मल्लया इहिपा कुच
बिहारया राजकुमारी रुपमती, अनन्तप्रिया, कर्णाती राजकुमारी राजमति
नाय जूगु दु) व भारतया पण्डित व संगीतकारत ई. सन् १७ गूगु
सदी लाय्कुली आश्रित जुया चवन । उबले मैथिली गीति पद शैली नेपाल
भाषा मे चिनिगु जुया चवन । अय् जुया प्रताप मल्ल, जगच्चन्द,
निवास मल्ल, योग नरेन्द्र मल्लया इलय् नेपाल भाषाय् शृङ्गार प्रधान
तथा रीति काव्यया साधना थःगु हे कथं जुयाः थुजागु काव्य कृतिया
संख्यात्मक व गुणात्मक प्रगति जुया वंगु खने दु । थ्व हे काव्य
तत्कालीन जनजीवनय् अतिकं लोकं ह्यागु जुया चवन, लाय्कूया
रङ्गमहर्लनसे' सर्वसाधारण प्रजाया ननि व कतः थ्य'क ।

३.३ नैतिक काव्य- देश काल स्थितिया प्रतिक्रिया बुझ्कूगु
नैतिक काव्य नं आपालं ज्ञात व अज्ञात कविपिसं चवरा त्वःता थकूगु
जुया चवन । पुराण बाखंया छुं किचः लाःगु खने दुयां हितोपदेश,
पञ्चतन्त्र वाय् नीति शतकया प्रभावं तापाःगु नेपाल भाषाया १७ गूगु
ई. सन् १७ सदी नैतिक काव्य मौलिक सिर्जनाया फल धाय्त्वः ।
जगज्ज्योति मल्ल, सिद्धिहरसिंह मल्ल, प्रताप मल्ल व निवास मल्ल नेपाल
भाषा नीतिपरक मे चिना वपि प्रख्यात कविपि खः ।

३.४ निर्गुण मुक्तक- खय्त ला सगुण भक्ति लिसे निर्गुण
भक्तिया गीति मुक्तक नं नेपाल भाषाय् मल्ल जुजुपिनि शासन कालय्
सिर्जना जुया वंगु खने दु । निर्गुण काव्य धाः बांलाक बलंगु ई. सन् १७
गूगु सदि निसं ने. सं. १५२ तक खः । कवि सिद्धि नरसिंह

(४२)

खेलुइताः

मल्ल, जय प्रकाश मल्ल, अभयानन्द स्वामीया देन थ्व विधाय् विशेष तःजि
खने दु ।

३.५ बाखं मे- थ्व नेपाल भाषाया थःगु हे धाय् वहगु
विधा खः । मेवदूत व रघुवश थेंजाःगु प्रबन्ध काव्य अधायन
याइपि नेवाःतसें उजागु प्रबन्ध काव्य साधना मयासें प्रबन्ध व रूपक
काव्यया बथुइ लाःगु थःगु हे पहगु बाखं-मे हे आपाः सिर्जना यानाः
थःथःपिनिगु काव्य प्रतिभाया जः ह्वला थकल । सिद्धाज्या व पुवाज्या
रागय् बाखं-म्ये आपाः चवयातःगु खने दुगुलि नं थ्व विधा नेवाःतय
थःगु हे मौलिक विधा खः । परम्परागत लोक म्ये, समकालीन ऐतिहासिक
घटना व बौद्ध जातक अवदानया बाखंया लिधसाय् काव्य गुण जाःगु स्वस्यल्लाःगु
नेपाल भाषा बाखं-म्ये नेवाःतसें आपाःयाना ई. सन् १८ गू व १९ गूगु
सदि दुने यानावंगु खने दु ।

३.६ कथा ह्याय् म्ये : ध्याचू म्ये- गुला सिवा, सायाः व यैयाः
जात्राया अवसरय् हाला म्यंकीगु लोक चरित्रय् खने दुगु विकृतिमात
कथाः ध्याचू म्यंकीगु कथा ह्याय् म्ये खः । थ्व म्ये थौं कल्लय्या ध्याचू
म्ये (Satirical Poems) यां पूर्वं रूप खः ।

४. प्रमाणीकरणया ज्याय् संभावित पंगलः

शोध ज्या यानाः छुं खँया निष्कर्षय् वय्त व थःगु खँय् क्वातुक तर्क
तेवा विइकेत दसि खँया आवश्यक जू वइ । थ्व दसि नं अन्तःसाक्ष्य व बाह्य
साक्ष्य धकाः नितान्ति दु । शोध ज्याय् नितान्ति दसिदा आवश्यक जू । प्रस्तावित
अनुसन्धान विषययात अन्तःसाक्ष्य व बाह्य साक्ष्य रूपय् छचले वहगु अनुसन्धय
ज्वलं पर्याप्त मात्रां सुलभ मज्जुगुलि शोध ज्या यायां वनेबलय् ववय् स्थितया थें
जाःगु पंगलः दं वय् फु-

क) रचनाकारया कृतित्व व व्यक्तित्व विषय कथाः परिचयात्मक चर्चा व
टिप्पणी याना तःगु तथ्य उवलया अभाव खनेदु । राष्ट्रिय अभिलेखालयया
छगू ग्रन्थया छपती थ्व निगू श्लोक-

“सरस मन गुगु विलास कलासन अ[द]भुत
रसिक मधुर कोम[ल] भीड मेया पद ।

खेलुइताः

(४३)

छड गोम्हा कविराज सरस्वति ॥४॥

राजा देव प्रताप मल्ल कविया विस्तार भारव! अति (अति)

मामा छन्दमिताक्षरं रस पदं ज्ञानी गरुड ध्वजं,

योगी सिद्ध नृसिंह देव सरसं भाखामय निर्गुणं

ज्ञानार्थस वृषक ध्वजो अति सर्वज्ञ छत्र ध्वज ॥५॥

—माई. फि. वी२८४।१७, रा. अ.

जक लुगु दु । अन्तःसाक्ष्य रूप्य कवि विजयानन्दया परिचय संकेत विज-
यानन्दया म्ये “नृप गृवाण जुद्ध विक्रम शाह जन कवि विजयानन्द कवि
लहाक” उल्लेख जुगुलि वयकः श्री ५ गोर्वाण युद्ध विक्रम शाहया लायकुली
तकं थ्यंहा कवि रूप्य याउँक परिचित जू वः । अथ्य हे वृषभानन्द नं
थःगु परिचय थ.गु छपु म्येय थुकथं बिउगु दु- “परवत पति भूपालेन्द्र मल्लनं
सियाओ, सुदलि छन, बिनति याङान, सुपुरुष पुरुषन पास यायिओ सत,
वृषभाया थ्व खा पलमान” (माई. फि. वी.४०१।१९, रा. अ.) ।

(ख) दापा खलः व भजन मण्डलीतसें थःथःपिके दयाच्वंगु भजन
सफू छसि कथं सुरक्षित याना तयगु व्यवस्था छने मदुगुलि नेपाल
भाषाया काव्य प्राचीनता कोछी ज्यामछिना च्वन । कवि व रचना तिथि
अज्ञातगु गीति काव्य गनं गुबले रिख्य च्वःगु जुइ धयागुया अनुमान
तकं याय् मछिना च्वन । मेया उपसंहार वाक्यस जुजुया नां बिया तल नं
रचना काल सन्दिग्ध जुया च्वंगु गुलिख्य रचना (गथ्य कि रण मल्ल व
जय जग मल्ल देवया नां दुगु) प्राचीनतम अभिलेख दाफा ग्रन्थ सुरक्षित
जुया च्वंगु मल्लगुलि शंका निवारण याय् मछिना च्वन । थुकि याना
दकले सकले तःधंगु समस्या नेपाल भाषा प्राचीन काव्यया रचना काल
निर्णय याय्गु व थुकिया विशुद्ध ऐतिहासिक विकास क्रमया रू रेखा
वांलुइकेगुया जुया च्वन ।

(ग) नेपाल भाषाया पुलांगु गुगु रचना विशेषया चर्चा प्रसङ्ग
याना तःगु समकालीन च्वखं व काव्य कृति हे नं दुर्लभ जुया च्वन ।
छन्द, अलङ्कार, थुजाःगु काव्य शास्त्रीय ग्रन्थय नेपाल भाषाया गीति पद
दमु कथं ह्यथना तःगु समकालीन ज्वलं नं आःतक लुया मवःनि । थुकि
याना काव्य शास्त्रीय व संगीत शास्त्रीय दृष्टि नेपाल भाषा काव्यया गुण पारख
जुया च्वंगुया दसि नं ह्यःने च्वमवल ।

(४४)

❖ खेनुइताः ❖

(घ) गुगु रचनाय आखलं सम्बत भवका तःगुली अर्थ दुर्बोध्य
याना खास गुगु दयात लक्ष्य याःगु खः निर्णय याना व रचनायात
खास ऐतिहासिक क्रमय को छुके मछिना च्वंगु समस्या नं यक्व दु ।
गथ्य “वरख थ्व नेपालया चरन पि निगु गुन” व “पञ्चदाल” ★ इत्यादी ।

(ङ) कविया नां छने दुगु मेया ख्यं मुख्य नांया स्वाताजि समस्या
प्रमाणीकरणया लंय न्ह्यथं वया च्वन —

(!) कूटथयुक्त नां गथ्य तिथिगु सिंह व नाग नसाध्वज

(!!) थथ्य हे देवीया दास, चण्डिका दास, हरया ध्वज नां नं अन्तः
साक्ष्य व वाह्य साक्ष्य ज्वलं आः थथ्य मल्लनिगुलि भ्रमपूर्ण जुया च्वन । हानं
थथ्य नां दुपि कविपिनि रचना छपुयां छपु जक लुयाः परिचय रहीत
अवस्थाय लाना च्वन ।

(!!!) गुगु गीति काव्यया स्रष्टा रूपय न्ह्यथना तःपि जुजुपिसं हे
व मे च्वःगु खःला मखुला धयागु नं शङ्का दना वः । जगज्योति मल्ल,
सिद्धि नसिंह मल्ल, प्रताप मल्ल, निवास मल्ल, जगत प्रकाश मल्ल, जगज्जय
कुमुदिनी, जय प्रकाश मल्ल, रणजीत मल्लपिनिगु स्रष्टा व्यक्तित्वय
शङ्कायाय थाय् मदु । थुपि त्वःता मेपिनिगु ख्यं शङ्का याय् थाय् दु ।

च) जो ला.गु नां व वहे नां दुपि तःमह मछि दुगुलि याना नं
गुगु रचनाया खास स्रष्टा सु खः, व रचना गुबलय् रिखेया लाः कोछीगुली
नं समस्या दया च्वन । दसुया निरति महिन्द्र मल्ल व जय लक्ष्मी । नेपाल

★ श्री हेमराज शाक्यया पाखे कया यल ओकु बहाः (रुद्र वर्ण महाविहार)
या दाफा सफू अध्ययन यानावल्य कवि विश्व हर्षया खं व “पञ्चदाल”
धाःगु अस्पष्टगु ल्याः स्पष्ट जुल । उगु दाफा सफूया थुपि निपु म्येया
समाप्ति वाक्य थ्व सन्दर्भय अध्ययन याय् वह जू ।

क) पञ्चरङ्ग दुवाल (१५९ यात न्ह्यकथं व्वने १५५) जुल नेपाल
संवत्सल, कर जोरी वारंवार विश्वहर्षन लहाक गणपति ।

—ओ. व. दा. स. पौ ८५, मेपु ल्याः १९६९

ख) भूपतिद्र श्री राजेन्द्र साहया (ने.सं. १३७-१६७) सुमंगल ।
विश्वहर्ष दीन वंछया बिनाशा पाप या ॥

—व हे, पौ ११०, मेपु ल्याः १९४१

❖ खेनुइताः ❖

(४५)

भाषाया तःगु मछि दाफा व भजन सफुतो कुथ्याःगु म्येय् महिन्द्र मल्ल ना न्हयथना तल । एव नायात महेन्द्र मल्ल (ने.सं. ६८०-६९४) या ना नालेगु खःसा पुरातात्विक अभिलेखय् फुक्कय्सं महेन्द्र मल्ल हे ना स्पष्ट च्वया तःगु दु । मे चिनेत गण वाय् मात्रां मबिल धाय् नं महिन्द्र व महेन्द्र निगू नं वःगु हे मात्रा ल्याःया खँवः खः । महिन्द्र सिंह व वीर महेन्द्र अथवा वीर महिन्द्र ना उल्लेख जूवःगु मे नं दु । थुमि पाखें अपाय्सकं भ्रम मजू, महिन्द्र सिंह ला स्पष्ट व निश्चित हे जुल । वीर महेन्द्र वाय् वीर महिन्द्र मल्ल धाइगुली नापसं वीर खँवः व 'लोकनाथया' धयागु खँवः न दया च्वनीगुलि एव योग नरेन्द्र मल्लया काय् (ने.सं. ८२९-८३४) घकाः मेमेगु पुरातात्विक अभिलेख ज्वलंया लिधंसां नं निश्चित रुपं परिचित जूवः । जय लक्ष्मी ना वःगु मे छपु हे जक दु, तर जयलक्ष्मी नां दुपि तःम्हं मछि रानी थुकथं दया च्वन- अ) नृपेन्द्र मल्लया रानी, आ) योग नरेन्द्र मल्लया छम्ह रानी, इ) भूपतीन्द्र मल्लया रानी, ई) रण- जीत मल्लया रानी । दुःखया खँ खः जय लक्ष्मीया कवि व्यक्तित्वया परिचय बिइगु मेगु दसि छुं मदु ।

उपसंहारः- आःतक सुलभ जुयाः च्वय् च्वंगु अभिलेख ग्रन्थय् च्वंगु नेपाल भाषा गीति काव्य मध्यकालीन नेपालय् नेपालया थःगु हे काव्य परम्परा दया वंगुया ज्वलन्त दसि खः । मैथिली, बंगला, अवधि इत्यादि भारतीय भाषां नुने मफय्क उर्वलय् नेपाल भाषा थःगु भाषिक व साहित्यिक विशेषता न्ह्यब्वया वर्तमान नेपाल अधिराज्यया काव्य परम्परा छगू महत्वपूर्ण व तोफिके मजिउगु देन बिउगु खँ त्वः फिका च्वया तःगु नेपाली साहित्य इतिहास अपूर्ण हे जुइ । देश, देशवासी व विश्व मानव प्रेम भावनाया पंलिनाः च्वयातःगु नेपालया निगु लखय्, फसय्, चाय् सिजित जुया ब्वंगु नेपाल भाषाया प्राचीन काव्य स्वां नेपाल व नेपालीया अमूल्य सम्पदा खः । स्व. मानदास तुनाधर थःम्हस्यां ल्हया तःगु व ल्हय्का कया तःगु मे दाफा सफूया सेनाप पाना मच्वंगु खँ टक्सार त्वाः तानसेनया दाफा सफूया किपा व प्रेम बहादुर कसाःया थाय् च्वंगु दाफा सफूया किपाया मे ब्वनाबलय् पाठ भेद अपाय्सकं मदु । प्राचीनतम दाफा भजन सफू दुर्लभ जुयाच्वंगु आःया स्थिती पुलांगु मे, बाखं मे, मतेनायामे सफूत प्रस्तुत शोध ज्याया निति अनुसन्धय् ज्वलं

पय् स्वीकार्य जुइमाः ताया । थय्य जूसा ज्ञात वा अज्ञात पुलांपिनि काव्य कृतिं प्रति छी पाखें उपेक्षा मयाःगु जुइ, अभ्याय मयाःगु जुइ ।

लिख - खँ प्यला (Foot-notes)

- १) दिल्ली रमण रेग्मी, मिडियवल नेपाल भाग ४ (इ. सन् १९६६) पौ १५३-१५४
- २) वहे, वहे, पौ २९८-२९९
- ३) "... — श्री श्री जय रणजित मल्ल देव श्री श्री वृद्धि लक्ष्मी देवी श्री श्री साहेब जुजु नेहा माचा थेमिस शरण छोड वलस — "
- ४) वहे, वहे, पौ २८८ व २६७
- ५) "..... महाराजाधिराज श्री श्री जय रणजित मल्ल देव प्रभुषाकुलसन बोभु कायाव तयाव, सिभ लिग कोटस, थाना वव वेलस ये", यल, गोर्षा सोहा राजाया थाना भाचय याहाव ओकुन्हु वाभुलि तेलाव थयमि वुदे, नकदेश, चोरपुरया पंचा प्रजा पनिस्त छपु रस दोहा प्रसाद प्रसन्न जुगा जुल — — — — —"
- ६) वहे, वहे, पौ ७५, ९०, १००, १०१
- ७) किपा कया ह्यागु दाफा व भजन सफू थुपि खः-
क) सूर्य विनायक (छवप)—नेपाल लिपि च्वया तःगु सफू १ गू जकया
ख) महालक्ष्मी थसिखेल यल — देव नागरी (ल्यया ल्यया) "
ग) काय्गु ननि गाःवहाः, यल — "
घ) वुंगद्यो, वुंगय् — नेपाल लिपि गनं गनं देवनागरी (ल्यया ल्यया) "
ङ) नाग बहाः यल — देवनागरी "
च) भिछे बहाः यल — नेपाल "
छ) कृष्ण लीलाया पौभाः-
(राष्ट्रिय धातु संग्रहालय)—नेपाल लिपि फुक्कं (ल्यया ल्यया)
ज) भिद्यः, मंगल — नेपाल " प्यब्वय् स्वब्व जक काय् धुन
झ) श्री प्रेम बहादुर कसाःया थाय्गा — [ल्यया ल्यया]
ञ) टक्सार त्वाः पाल्पाया दाफा सफू वःगु - फुक्कं
" बाखं " " - फुक्कं व नाटक आंशिक
- ८) रेग्मी व हे, भाग २, पौ ८३८ ।

“... — It is true that if it were not for their drama and lyrical compositions they would not have passed as able writers ... —”
Seigfried lien Hard, Newari Giti Manjari (Stockholm : 1974), Page 17

“... — Thus the present volume containing the round number of one hundred hymes, Poems and ballads, has a double purpose: firstly as far as possible to offer a representative selection from a poetry bound to soon to become extinct, and secondly, to put into hands of the learned reader compositions in Newari which neither translate nor paraphrase sanskrit, but which, in essence, are primarily Newari.”

७) स्व. श्री मान दास तुलाधर मुंका दोनु म्येया श्रोत धुपि खनेदु । अनं म्ये ल्हाया तःगु कापी, चव्या तःगु जुयाचवन —

- क) असं स्वाःया दाफा सफू ख) जान तुलाधर असङ्गु बहाः
ग) थवही भगवान बहाः घ) श्री करुणामय, यल
ङ) सिद्धि चरण श्रेष्ठ च) गोल देशया सफू
छ) हरिकृष्ण, असं ज) प्रेम बहादुर कसाः
फ) दुर्गलाल ब) चण्डिका लाल माय्के (मानलालयागु मे)
ट) बखत भजनावली ठ) दिल बहादुर किपूया सफू
ड) लोक रानया पुगंगु मे सफू ड) गोरख बहादुर
ण) धमा थूया दाफा सफू त) टक्सार टोल, तानसेन
न) श्री प्रेम बहादुर कसाःया थाय् चवंगु दाफा, भजन व मे सफू —

- क) दाफा सफू ६०८।२९५ ख) दाफा सफू ६।५३ व २२३ थ
ग) " " ५ घ) " " ५८
ङ) " " २ च) " " १ संस्कृत व मैथिली जक
छ) " " ९ ज) " " (सफूया ल्याः खनेमदु)

- ऊ) " " X छ) " " X ग (" ")
ढ) " " X घ) ठ) " " ७
ड) " " ६७।१७.०५ ड) " " थिमि बालकुमारीया
ण) " " ४८।४०९ त) मे सफू ३
थ) मे सफू ४७७ द) " " ६०७
घ) " " १२ न) " " १४
प) " " १३ फ) " " (सफू ल्याः मदुगु)
ब) " " ६३९ भ) मंगला छे मणेद्यो भजन सफू (बवप)
म) " " १० व २२५ थ

९) राष्ट्रिय अभिलेखालयस दुगु मे सम्बन्धी ग्रन्थ—

ग्रन्थ नां	माह. फि. ल्याः
क. गीत	बी २८७।३६
ख. गीत	बी २८४।१७
ग. गीत	बी २८४।२०
घ. गीत गोविन्द	बी ३९५।२६
ङ. गीत पुस्तक	बी २८४।३४
च. गीत पुस्तक द्वयम	बी २८४।२५
छ. गीत पुस्तक	बी २८४।३१
ज. गीत संग्रह	बी २८४।१०
झ. " "	बी २८४।१६
ञ. " "	बी २८५।६ गीत गीतेश्वर मे.सं ७२५ श्लोक १६ एक दुगु मतिना बाबं मे ।
ट. " "	बी २८५।८
ठ. " "	बी २८५।१५
ड. गीत संग्रह	बी २८५।११
ण. " "	बी २८५।१२
त. मानार्थ पन्च दश गीत	बी २८६।९
राग	बी २८७।३

ध. राग माला	बी २८७।१०
द. " "	बी २८७।९
घ. " "	बी २८७।११
न. " "	बी २८७।१४
प. संगीत	बी २८८।२
फ. "	बी २८८।५
ब. संगीत भाषा	बी २८८।२६
(नेपाल भाषा संगीत) ने.सं. ७९२ जगज्जन्दया ५३० पु मे हुगु	
भ. गीत	बी २८४।३६ महिन्द्रसिंह कुमल थाकुरया मे
म. स्वोत्र भजन गीत संग्रह	बी ४०१।५९
य. संगीत चन्द्र	बी २८८।२२

विचार-महिमा

- जगदीश चित्रकार

१०. राष्ट्रिय अभिलेखालयया बही (सफू धलः) माई. फि. ह्याः ए ६९०।२३स
न्याथना तःगु मे सफू -

- | | |
|--------------------------------------|------------------------------------|
| क) मे सफूल | ख) साङ्गया प्याखनया में |
| ग) श्री श्री भूपतीन्द्र कृत गीत | घ) दशावतारया में |
| ङ) मे संग्रह पुरान | च) रामायणया में |
| छ) मे साकुल चुकुछङ | ज) श्री जगज्ज्योति मल्लया मे पुराण |
| झ) श्री ५ भूपतीन्द्र मल्लया मे साकुल | |

[ध्व गोष्ठी पत्रय अभिव्यक्त याना तयागु खँ शोध ज्या याथा वनेवल्य
हीके माली यःनि । गोष्ठीइ विद्वानपिसं याना दीगु टिप्पणी व मुकाव सकार
यानाः ध्व च्चखँयं ननं ननं मज्जि मगाःगु खँ हिलागु दु । मेगु खँ गथे खः
अथे तुं ल्हचवया च्वना । ध्व च्चखँ व्वनिपित नेपाल भाषा प्राचीन काव्यया
अध्ययनय् तुं अंशय स्वाहालि जुइ ताया । ने.सं. १९०० तछला ध्व १०
खुम्ह ध्व गोष्ठी पत्र पाटन संयुक्त क्याम्पसय् जुगु अनुसन्धान गोष्ठीइ व्वयागु
खः । -च्वमि]

नमस्कार !

जि विचार खः ।

जि सनातन मखु,

आधुनिक मखु ।

सनातन व आधुनिकया संधी.

जि विचार खः

विचार-कविता खः ।

विचार दुपि फुक्क नेता,

विचार मदुपि कय्ता,

तर विचार मदुम्ह मनू हे मदुगुलिं

कय्ता जक कय्ता !

जि विचार खः, छिगु जिन्दगीया अचार खः ।

जि सिउ - छिकपिं न्हिली ।

जि हास्य खः

शोक खः

संयोग-वियोग

सृष्टि व संहार खः ।

फुक्क मस्तिष्कया सृष्टि जक-

श्व शब्दत जिगु म्हुतुपनाः पाकां मुइगु मुलु व मुका जक मखु,
इच्छा हे स्यायगु धार जुया बिल ।

अलय् श्व फोन कलया मतलव ? खँ छु ? छयनय् ल्हाः दिक् ;
बिचाःया सागरय् कववाना चवनी शान्ति । शान्तिया तुगलय् थौं अशान्ति
या ज्वालामुखी तज्यानाः छयं हे दिगिदिगि कवाक भ्रुवाय ववया चवनी ।
छु लुमन थें मस्यु ? व जुक्क दनाः फोन दु पाखे वन । फोन याय्त
गनया नम्वर डायल याय्त्यनी । ... तर घृणा व तमं जाःगु छ्वाः
ज्यानाः रिसिभर दिकी । भुनुभुनु याकःचा हे हाली “हथाय् चायाः फोन
यातकि जि खुं लाय् फइमखु । जिगु हक हनन याय्त स्वःपि मनूतय्त
थौं जि थःगु कालीस्वरूप क्यना बी अलय् सी अमिसं कि जि शान्ति
जक मखु महाकाली नं — ।” थाक्कु छिनाः शान्ति पलंगय् ग्वारातुलेत
वनी । छगू प्रतिक्षाय् कवथा दक न्यनाचवंगु गृहसत प्वकेगु, अलय् त
दिकेगु थल लिहाँ वइगु प्रतिक्षाय् ।

किर्रर् — ! किर्रर् ... !! किर्रर् ... !!! बिचालं
ग्वानाचवंगु छ्वाः तमं दनदन छवयावड शान्तिया । “व हे मिसाया फोन
मखा जुइ । आसे, आः जि कयात म्हुतुइ कवक जकाः बियाः थायामथा
मयाःसा — ।” काचाक्क रिसिभर ल्हनी ।

“छाय् अफिस मवनागु — ... ? अन रिङ्ग याना चवना का — ।”

“छाय्, जि छेय् चवनाः छि कपाः स्याःला — !!??”

“खु बतं वः थें च्वं जा नः मवयागुलि ? छाय् सिस्टर रोमि
फोन मयाःला ? स्वाःलका ताःहाकः खँ, काय्कि लिफमया टिकट कयातइगु
दु । अं डा० कृष्णया बर्थ-डे थौं कीपि निम्हसितं सःतातःगु दु । व हे
डिनर पार्टी — ... । उखेतुं वनेगु खला, भच्चा — ... ।”

“छिगु ड्युटिले — ?”

“उकेला छेय् जा नापं नःमवःसे निहनसिया ड्युटि याना चवनागु ।



पण्डित सुन्दरानन्द : छगू चर्चा

धनबज्र बज्राचार्य

नेपालाया धर्म, कला आदिया क्षेत्रय् जक मखु विद्वत्ताया क्षेत्रय् नं ‘यल दे’
या योगदान कम मजू । इतिहासया पाना पुइका स्वल धाःसा थःगु देशय्
जक मखु विदेशय् नं वना विद्या व धर्मया प्रचार याःपि यल देया ‘महापण्डित’
पिनिगु यक्व देन दयाचवंगु कीसं सीका काय् फु । विशेष याना संय्देश
थजाःगु दुगंम देशय् वनाः विद्या व धर्म प्रचार याना वंपि यल देया ‘महापण्डित’
पिनिन कीसं श्रद्धापूर्वक लुमंके वहजू ।

श्वला प्राचीन व मध्यकालया खँ जुल । आधुनिक कालय् नं श्व विद्वत्परम्परा
छुं अंशय् कायम हे जूगु खने दु । उदाहरणया रूपय् कीसं पण्डित सुन्दरानन्द
पण्डित अमृतानन्द, पण्डित गुणानन्द पित्त क्यने फु । श्व स्वहां छगू हे विहारया
छगू हे वंशया पण्डितत खः । प्रस्तुत चिच्चाधंगु लेखय् पण्डित सुन्दरानन्दया
विषयय् छत्वाःचा खँ चवंगु कुतः याना चवना ।

नेपालया प्राचीन विहारमध्यय् यलया ‘ओकुबहाल’ नं छगू खः । श्वया
मेगु नां ‘रुद्रवर्णमहाविहार’ खः । अन प्राप्त ताडपत्रया अध्ययन गाना स्वय्
बलय् श्व बहाः लिच्छवीकालय् हे स्थापित जूगु खः धंगु खं सिइ दु । व
हे प्रसिद्ध बहालय् पण्डित सुन्दरानन्दया जन्म जूगु खः । पण्डित सुन्दरानन्दया
जन्म गुबले जुल धंगु निश्चित तिथिमिति प्राप्त मजुनि ने. सं. १९३ स

(वि. सं. १८५० य) छगू सफू ल्ह्याया च्वःह्य लेखकया रूपय् सुन्दरानन्द खने दु । पण्डित बाणीविलास पांडेयात सुन्दरानन्द ने. सं. १९३ (वि. सं. १८५०) स 'वेददीप' धंगू सफू ल्ह्याया च्वया बिउगु लूगु दु । अबले सुन्दरानन्द नीदं जक दुहा जूसां ने. सं. ८९३ (वि. सं. १८३०) पाखे सुन्दरानन्दया जन्म जूगु अनुमान याय् छि खनेदु । हाकनं पण्डित सुन्दरानन्द राजकुमार बहादुर शाहया प्रशंसाय् छुं पद्य च्वया थकूगु लुयावया च्वगु दु । 'बहादुर शाह वर्णनम्' धंगू व पद्य बहादुर शाहया उत्थान कालय् ने. सं. १०६-११३ य (वि. सं. १८४३-५० य) च्वःगु खने दु । थुकि नं सुन्दरानन्दया जन्म समयया अन्दाज याय् फु । ने. सं. १५३ (वि. सं. १८९०) तक सुन्दरानन्द जीवित तिनि । अबले तक वं च्वया च्वनतिनि । थुगु किसिमं पीदं मयाकक सुन्दरानन्द लेखकया रूपय् च्वनाच्वंगु खनेदु । पण्डित सुन्दरानन्द छगू जक भाषाय् मञ्च प्यंगू प्यंगू भाषां सफू च्वया थकूगु खनेदु । व खः संस्कृत, नेपाली, नेवाः भाषा व 'बोहा' रूपया हिन्दी भाषाय् कलम चलेयागु खः । उकि थः जोलिजोपि मेमेपि कवि लेखकपिके महुगु ध्व विशेषता सुन्दरानन्दया थःगु हे विशेषता छ ।

पण्डित सुन्दरानन्दया कृतित निब्व थलाः कीसं अध्ययन याय् फु । छगू मौलिक कृति व मेगु अनुदित कृति । सुन्दरानन्दया मौलिक कृति 'त्रिरत्नसौन्दर्यगाथा' मुख्य खः । थ्व 'गाथा' अर्थात् प्रशंसात्मक वर्णन रूपय् च्वयातःगु ऐतिहासिक कृति खः । थुकी श्री ५ पृथ्वीनारायण शाहनिसें श्री ५ राजेन्द्र विक्रम तकया प्रशंसात्मक वर्णन यानातःगु दु । जुजु, रानी व मन्त्रीयात 'त्रिरत्न' रूपय् चित्रण याना १२ स्तुतिकाव्य च्वया तःगु खःसां थुकि सुन्दरानन्दया ऐतिहासिक ज्ञान व मौलिक कविता शक्ति पिब्वः । थ्व बाहेक सुन्दरानन्दया फुटकर कविता नं यक्व लुया वःगु दु । छुं प्रकाशित जूसां अप्रकाशित गं आपाः हे दनि । पण्डित सुन्दरानन्दया वंशज यज्ञानन्द वज्जाचार्यया सौजस्यं प्राप्त सुन्दरानन्दया छुं अप्रकाशित फुटकर कविता जिक्के दनिगु थुपि खः —

१. श्री व्याघ्र भैरव सुन्दराष्टक (नेपाल भाषा अनुवाद सहित)
२. श्री लोकनाथ सुन्दराष्टक
३. श्री घन सुन्दराष्टक

४. आनन्द सुन्दराष्टक

५. कुलरत्न पञ्चक

६. चैत्यराज सुन्दरस्तव

७. त्रिरत्न सुन्दर पोडशी

थथे हे माला स्वल धाःसा सुन्दरानन्दया मेमेगु अप्रकाशित कृतित आपालं लुया वइतिनि । सुयाके दुसा पत्रिकाय् अथवा सफू सफुती पिकाय्केमु कल्याण जुइ ।

सुन्दरानन्दया अनुवाद रूपया कृतिमध्यय सुन्दरानन्द रामायण नामं प्रकाशित 'अध्यात्मरामायण' मुख्य खः । सुन्दरानन्द नेपालय् अति लोकप्रिय महायानी बौद्ध ग्रन्थ 'प्रज्ञापारमिता' या नं अनुवाद याना तःगु दु धंगु अनया वंशज यज्ञानन्द वज्जाचार्यया धापू दु । व ग्रन्थ धाःसा प्रकाशय् थय् मफुनि ।

चवय् न्ह्यथनागु आपालं कृति पण्डित सुन्दरानन्दया विषयय् यक्व खं तीक्के फु । सुन्दरानन्द संस्कृत भाषाय् भचा कमजोर खःसां कलम चले जूहा व्यवहार कुशल लेखक खः । थ्व निबन्धय् सुन्दरानन्द इतिहासकारया रूपय् बिउगु योगदानबारे विद्वानतय्गु ध्यानाकर्षण याय्गु जक जिगु लक्ष्य खः ।

सुन्दरानन्दया इलय् तक कीथाय् शिलालेख आदि ऐतिहासिक सामग्रीया अध्ययन यानाः वैज्ञानिक रूपं इतिहास चवय्गु ज्या बांलाक शुरु मज्जनि । ने. सं. १००० स (वि. सं. १९३७ य) भारतया प्रख्यात विद्वान पं. भगवान लाल इन्द्राजी नेपालया २३ शिलालेख प्रकाशित यासांनिसें तिनि कीथाय् वैज्ञानिक ढंगं इतिहासया अन्वेषण याय्गु ज्या शुरु जुल धकाः मानेयाना तःगु दु । तर थ्वयासिवे अर्धशताब्दी न्ह्योहे पण्डित सुन्दरानन्द च्वया थकूगु 'त्रिरत्न सौन्दर्य गाथा' सफुती शिलालेख, ताम्रपत्र आदि ऐतिहासिक सामग्रीया छुं अध्ययन याना तय् धुकूगु खनेदु । अबले सुन्दरानन्द ऐतिहासिक घटना सम्बन्धी तिथि मिति व वशावलीया नं संग्रह याःगु खनेदु । पं० सुन्दरानन्द शिलालेख वचनाः ल्ह्याया भारदारतय् बिउगु दसि खं नं लूगु दु । यस कृष्ण मन्दिरया सिद्धिनरसिंह मल्लया शिलालेख वचनाः उकिया पाठ ल्ह्यायाः माथवरसिंह थापायात बिउगु खं छथाय् सुन्दरानन्द थथे च्वया तःगु दु—

“श्री कृष्णजु देवलया शिलापत्रया नकल श्री माधवरसि थापा कर्णेल
लहयकल । सं. १५३ आशुन ।”

थुकि ने सं. ११३ स (वि. सं. १८९० य) हे सुन्दरानन्द यल कृष्ण
मन्दिरया शिलालेख ब्वंगु खँ सिद्ध जू । व शिलालेख लिपा ने. सं. १००० य
(वि. सं. १९७३ य) तिनि भगवान लाल प्रकाशित यात । थथे
सुन्दरानन्दया त्रिरत्नसौन्दर्यगाथाय अनेक शिलालेखया उल्लेख जूगु दु ।
कान्तिपुरया जुजु प्रतापमल्लया १५ ता लिपि चवया त. गु प्रसिद्ध अभिलेखया
उल्लेख न सुन्दरानन्द याता त. गु दु ।

थुकि शिलालेख आदि ऐतिहासिक सामग्रीया अध्ययन याता: नेपालया
ऐतिहासिक सामग्रीया ग्रन्थ चवयगु कुत: या: ह्य नेपालया प्रथम लेखक
पण्डित सुन्दरानन्द ख: धैगु खने दु । अनया थव प्रयासयात अनया
नातेदार पण्डित गुणानन्द अछ न्ह्याकल । राइटया ‘हिमिट्र अफ नेपाल’
धका: प्रख्यात वशावलीया रचयिता मध्यय छह्ना प्रमुख व्यक्ति गुणानन्द ख ।
व वंशावलीइ प्रशस्त शिलालेख व ताम्रपत्रया उपयोग जूगु दु । थव
खँ विचार याय बह जू ।



ने. सं. ११०२ न्हू दँया लसताय

देया व्याक्क जनता थ: थ:गु जातिय भाषा,
साहित्य, संस्कृति व कलायात चवन्ह्याका: विश्वया
न्ह्या:ने नेपा:या ह्याय तय फयमा । जिमिगु -

— भितुना —

ललितपुर नगर पञ्चायत
परिवार ।

पाखं

बिस्थापन

— केदार ‘सितु’

थौं न छुं उवर दु । म्हीग: म्हीग स्वया: थौं कपा: भचा अपो हे स्याना
यल । अयसां तबि निचा: एनासिनं तारे यायत स्वय । तर अहं ! स्यागुलिइ
छुं अन्तर वडगुखु । न्हाबलें ला थथे हे ख: । व हे कपा: स्याइगु न मखा ।
उवर ला भति भति व हे दइ । जि थव विषय चिलेत स्वय । तर, कपा: ऊन
तसकं स्यानावल । मेगु निचा: एनासिन नया बिइ । तर अहं ! कपा: स्यागु
मवलायगु नां तकं मका: । ऊन तसकं स्यानावल ।

तेविलय चवगु उपन्यास कया: स्वय । स्वयगु तल्लीनता जिके मदु, विचार
एकाग्रता जिके मदु । उपन्यासयात तिना बिइ । तेबिलसं तयाबिइ । ऊयालय
वने । पिनेया दृष्य स्वय । व हे दृष्य ! व वचव, गुलाफ स्वांया का:, अमा,
व लुखा अले पिवा: । दक्क पुलां जुइ धुकल, मुक्क पुलां । जिगुलागी थव
पृथ्वीइ न्हूगु छुं न सृष्टि मज्जनि । फुक्क पुलां ! व वेंचुगु सगं: वेंचुया वेंचु हे
तिनि, व सुपांय हाकुगुया हाकु हे तिनि ! स्वां-सिमा मदुगु नांगानु गुं ।
फुक्कसिनं जित: लायबुयाचवगु दु, हिस्यानाचवंगु दु । ख:, मगंत थ:गु रंग हिले
मफुनि, सुपांय थ:गु रंग हिले मफुनि, गुं थ:त हराभरा याय मफुनि । ख:, जिगु
जीवनय न अज्या:गु छु न्हूवा: व:गु मदुनि । मानौं, छगू ताहाक:गु यात्राय वहे
वहे दृष्य दोहरे जुयाचवंगु दु । आह ! मिखातयत न्हूगु छुं विषय लगु मदु ।

+

+

+

थौं निसें वसन्त शुभ जुल । गुलिखय स्वां-सिमात जुखुमुकं दना व:गु दु ।

ने. सं. ११०२ न्हू दँया लसताय्

ब्याक्क इष्टमित्र व ग्राहकवर्गपिन्त

भितुना

गादा रंग, म्हंवा:गु, नँस्वा:गु, सा:गु निलगिरी

चिया भपिया: संतुष्ट जुया दिसँ !

थोक व खुद्रा विक्रिया लागो स्वापू तय्गु थाय्

मन्डिन्द्र चिया उद्योग

लगंछ्य:, यल !

(वडा. नं. ५ थसिछ्य:)

ने० सं० ११०२ न्हू दँया लसताय्

- भितुना -

- १) हिमाल आयल एण्ड स्टिल (प्रा.) लि०
- २) भाजुरत्न इन्जिनियरिङ्ग एण्ड सेल्स (प्रा.) लि०
- ३) स्याकार कम्पनी (प्रा.) लि०
- ४) श्यामुकापु इन्टरनेशनल
- ५) हिमाल अक्सिजन (प्रा.) लि०
- ६) मैनेजमेन्ट सर्मिसेज (प्रा०) लि०
- ७) लक्ष्मी उद्योग (प्रा.) लि०
- ८) हिमाल एजेन्सी

ज्योति भवन, कान्तिपथ ।

पौद्यां ल्या: १३३,
ये, नेपाल ।

फोन ल्या: ११४९० व १४३२७

(८२)

खेलुइता:

खँल्हाबल्हा



भाजु कृष्णचन्द्र सिंह प्रधान

नाप छमा:

परिचय

जन्म- ने. सं. १०४६ नागपञ्चमी ।

जन्म जूगु थाय्- मुस्तागां, ये ।

चवनेगु थाय्- ताहाच:, ये ।

शिक्षा- स्वाध्याय ।

सामाजिक, शैक्षिक व राजनैतिक सेवा- शान्ति निकुञ्ज विद्यालय व नेपाली साहित्य परिषदया संस्थापक सदस्य मध्ये छ्हा; सन्देशगृह (ने. सं. १०९७) व विद्यामन्दिर पुस्तकानय (१०६७) या संस्थापक; प्रगतिशील लेखक संघ (१०७३), नेपाली साहित्य संस्थान (१०८४) व महेन्द्ररत्न पब्लिक कलेजया संस्थापक सदस्य; २१ दँ तक शान्ति निकुञ्ज, कन्या मन्दिर व महेन्द्र रत्न पब्लिक कलेजया अध्यापन कार्य; ने. सं. १०९०-९४ तक नेपाल राजकीय प्रज्ञा प्रतिष्ठानया सहसदस्य; शुद्ध राजनीतिनाप सम्बद्ध; ने. सं. १०९९ व १०७४ दँय् सुरक्षा कानून अन्तर्गत जेल ।

सजगा:- जागीर, साक्षा प्रकाशनया महाप्रबन्धक ।

साहित्यिक व भाषिक कृति

क) नेपाल भाषा- कीयु साहित्य- बाबं (समालोचना) पत्र-पत्रिकाय् तःपु लेख प्रकाशित । 'पासा' (द्विपी), 'यज्यु' (मथुरा व रमाया यःपी मुना) व 'रमा' (च्वमि-मथुरा साय्मि) या सम्पादन ।

(८३)

खेलुइता:

ख) नेपाली भाषाय् भञ्ज्याङ्गनिरै; कवि व्यथित र काव्य साधना; सालिक (निवन्ध); नेपाली उपन्यास र उपन्यासकार । साक्षा समालोचना, आँखा - लयूपी (१०६८), जन साहित्य (१०७६) व हिमानी (१०८६) या सम्पादन ।

सिरपा: - 'कवि व्यथित र काव्य साधना' ग्रन्थयात मदन पुरस्कार (१०७९) 'नेपालीमा श्रृंगारकालीन कविताको विकास' या निति रत्नश्री पदक (१०८६); 'नेपाली उपन्यास र उपन्यासकार' यात साक्षा पुरस्कार (११०१); गो. द. वा. (१०८८) ।

भ्रमण- भारत, श्रीलंका, चीन, थाइल्याण्ड, बर्मा, जापान ।

★

★

★

भाजु कृष्णचन्द्र सिंह प्रधानज्यू, दक्षिणै ह्यापां ने. सं. ११०२ क्यंगु न्ह-दया लसताय् जिमिगु 'खेलुइता' या पाखें छित भितुना देखाय् !

न्ह्यस: १ छि साहित्य खल्य-विशेष याना समालोचना विधाय् पला: छियेत छुकि प्रेरित जुया दिया ?

स्वीदं न्ह्य:या खँ ख: । उबलेया प्रगतिशीलताया लंपुइ अप्रगति-शील विचारधाराया सैद्धान्तिक विरोध अथवा आलोचना मयासै मगा:गु कारण समालोचना विधाय् पला: छियेत प्रेरित यात । अल्य् भूमिका च्वइबी मा:गु आग्रह व वाध्यतां थ्व विधाय् न्ह्यचिलेत आकर्षित यात । अनंलि थ्व क्षेत्रय् लेखक न ह्यो जुगुलि । साहित्यया विकासया निति समालोचना छगू माइल-स्टोन ख: । थ्वया समुचित उन्नति न साहित्यया मेमेगु विधा नापनापं जुइ मा: । नत्र सपूर्ण साहित्यया यथाथं परिचय व मूल्यांकन-मूल्यान्वेषणया अभाव ऐतिहासिक व समसामयिक साहित्यया यथाथं ज्ञान जुइ फइमखु । सारांशय् धाय्माल धा:सां दकल्य् त:धंगु खँ ख: आवश्यकता । थुकें हे मन्तय् निर्माणया निति प्रेरित याइ ।

न्ह्यस: २ नेपाल भाषाया गुगु विधा विशेषया समालोचना याइवि मध्ये गुलिसियां पूर्वीय काव्यशास्त्रं क्यनात:गु च्वला कसी समालोचना

थाइगु, गुलिसियां पाश्चात्य समालोचना सिद्धान्त व: कया: समालोचना याइगुलि थुवि निखल: नं एकोहोरा कुल धाईवि दु । धाथ्थे, छि स्वयंले नेपाल भाषा साहित्यया गुगु विधाया समालोचना याय्त गुजोगु स्थापदण्ड स्वस्थ व न्यायपूर्ण जुइ ?

समालोचना छगू सैद्धान्तिक प्रक्रिया ख: । गुणावगुण अथवा सत्यासत्य, औचित्यानौचित्यया निर्णय असैद्धान्तिक आधारय् जुइ मफइगुलि गुगु छगू मान्यता वा शास्त्रया व: काय्गु स्वाभाविक ख: । थुकी गुलिसिनं पूर्वीय काव्यशास्त्र क्यनात:गु कसी च्वला समालोचना याइ, गुलिसिनं पाश्चात्य समालोचना सिद्धान्तया व: कया याइ । थुलि जक मखु अरु पूर्व-पश्चिमया सुनिर्धारित नीतिपरक वा रूपवादी साहित्यिक सिद्धान्त पिहां वना मेमेगु शास्त्र वा दर्शनया लिधंसाय् समालोचना जुयाच्चंगु नं दु । उकि सिद्धान्तया आधार ख: — स्वयंगु मिखा । थन्यागु स्वयंगु मिखा हे मनुसा समालोचना गुकथं जुइ ?

एकोहोराया अर्थ संकीर्णता वा सीमितता जुइफु । थ्व स्वइनिगु थो थो विचार ख: । महत्वपूर्ण जा कृति विशेषयात वइगु समग्रतय् स्वयंगु कुत: जुइमा:— तछयाना मखु, त्वा: थला: मखु, त्कुचिना मखु । वइगु कालया सामाजिक जीवनया यथाथं व गतिशील प्रक्रियाय् स्वयंगु व्यापकता दय्मा: । अवश्य न थुकथं स्वयंगु मिखा त व्या जुइ हे मा:, थ्वइगु कसि वा व: काय्गु सिद्धान्त गहन समसामयिक यथाथंनाप सम्बद्ध व विस्तृत जुइ हे मा: । थनथाय् मेगु खँ नं स्वाना स्वयं । समालोचना — सिद्धान्त खाली साहित्य मखु । अर्थात् दर्शन, समाजशास्त्र, मनोविश्लेषण शास्त्र, राजनीति, विज्ञान, तर्क शास्त्र, नीति शास्त्र आदि अनेनेगु ज्ञान-विज्ञानया नं लिधंसा कया: ब्वलंगु विधा समालोचना जूगुलि पूर्वीय काव्यशास्त्र वा पाश्चात्य समालोचना सिद्धान्त धाय् मात्रं आ' छु ल्यंदनि धका: सुनानं न्यतेफु । थुथाय् दोष सिद्धान्तया जक मखु, बरि थ्वइत छचलीपिनिगु नं खने दइ । अल्य् पूर्वीय काव्य शास्त्र थ: हे छगू परिमितताय लाय् थुं कुल-थुकी दुने शायद थो-कल्लय् साहित्यिक मूल्यान्वेषण व जटीलता व्यने फइमखुला कि ?

पाश्चात्य समालोचना सिद्धान्त सौन्दर्यशास्त्र अथवा सौन्दर्य-विज्ञानयात संकेत याइ व थव्या सम्बन्ध दर्शनाप दु । दर्शन अथवा विभिन्न सिद्धान्त दुने हे साहित्य जुयाः साहित्य सृष्टि जुइगलि साहित्यया समालोचनाया अर्थ न व हे सत्ययात सहसिकेगु कुतः ख । अलप ज्ञान-विज्ञानया दबुली थज्याःगु सिद्धान्तया विकास-अछ आविष्कार न-नापनाप जुयाः समालोचनाया लेपु न तःबाला जुजु बनी । थुकथं स्वयम्बल्य पूर्वीय काव्यशास्त्रय थव संभावना मदय धुकल-ववर्जय धुकुगु सीमा दुने आः व दु । अयसां थव कीगु पम्पपरा न खः, शायद उकि वांछव्याः सर्वथा मुक्त जुइ थाकूगु जुइमाः तर थव निगुलि लेपु त्वःता मेगु सिद्धान्तया वःकायगु छु सम्भव जुइ ? धायधुन समालोचना खालि साहित्य मखु, मेगु सिद्धान्त व मतवादया न आश्रय कयाः साहित्यया व्यापक संभावना दयकेगुली वइगु तःधंगु ल्हाः दु । उकि असंभव मखु । थन छगु खं लोमके मज्यू । अर्थात् समालोचनात्मक सिद्धान्तया अपूर्णता वा असामर्थ्य याना दु समालोचना एकहोरा जूगु खः ? अथवा सिद्धान्तया अभाव हे स्पल्लाःगु समालोचना जुइ मफुगुया कारण खः कि ?

प्रश्न जा गुओगु मापदण्ड स्वस्थ व न्यायपूर्ण जुइ घइगु खः गुकिया लिसः समालोचना सिद्धान्तया व्यापकता व सामाजिक यथार्थया गतिशील प्रक्रियाय स्वाता मालेमाः ।

जि स्वयम्बल्य सिद्धान्त ग्हागु ज्याख्यः लिघंसा खः वइत बोलाक थुइकाः निष्पक्ष व इमान्दारीपूर्वक छपलेगु दकलय आवश्यक ताया । विभिन्न विचारधाराया लेखकया रचनायात व हे मिखां गस्वयम्बल्य खने दइगु विरोध अथवा मत भिन्नता छगु स्वाभाविक निष्कर्ष खः । उकि थन रचनाजन्य दोष वा सत्यासत्य सिक वैचारिक भेद हा काइगु आलोचनाया संभावना अप्वः थाय काइगु न सभव जुइफु । प्रत्येक रचनाया थःगु छु खंया धापु दइ ; छु खंया विश्लेषण यानाः छु न छु यथार्थ ज्वनेत स्वःगु दइ ; अथवा वइत उलाः पलाः तःगु दइ ; अथवा वस्तु स्वयं छु खः वइत बहे रूप स्वयाः

छु वास्तविकता न्हाचिका विइगु दइ ; हासिका विइगु दइ । थज्याःगु वस्तुगत यथार्थ मेमेगु न आपल दयफइ । थव जा छगु दृष्टान्त जक खः । अलप थज्याःगु सत्य गुगु जीवननाप सम्बन्धित जूसां, गुगु समाज, व्यक्ति वा स्वभावनाप आपाः सत्तीसां, छगु न छगु सामाजिक यथार्थय व्वलंगु दइ । यथार्थय थव असत्य मखु व थुमिसं जीवनय थाय कयातःगु कु वइगु खं न माने मयासं मगाः । थव औचित्ययात विवेकपूर्ण, आग्रहरहित व गुगु द्वेषभाव मतसं रचनायात वइगु संसारय ग्हापां स्वयमाः, व्यक्तिगत वा सामाजिक जीवनय लेखकं धंतःगु वस्तु वा सत्यया छु मू दु ? उकिया गुलि सम्भावना दु- इत्यादिया सम्बद्धताय विश्लेषण व मूल्यान्वेषण यायगु छगु वस्तुपरक रचनात्मक समालोचना खः । सिद्धान्त थः हे छु मखु । यदि प्रयोग व विश्लेषण ठीक मज्जुल धाःसा । सिद्धान्त व प्रयोगया व्यावहारिक कुशलताय हे स्वस्थ व न्यायपूर्ण समालोचनाया सं तःन्या, तःफाः जुइ । थुकथं उच्च कोटीया बांलाःगु रचना निर्माण यायगु वातावरण दयकेगु ज्या समालोचकया खः ।

न्यासः ३ आधुनिक कविताया छाल लक्षण व प्रवृत्ति छु छु खः ? छि स्वयम्बल्य नेपाल भाषाया कविताय थुपि लक्षण व प्रवृत्ति बांलाक लुबाच्ने धुकलला ?

हानं थन कवितायात गुगु थासाय तयाः स्वयगु कुतः यायत्यगु छाल । थव्या लागि लक्षण ग्रन्थ दहे दु । तर लक्षण ग्रन्थ कयमा तःगु लक्षण दुने चवनाः छु म्हागः वा थीकहय्या कविता बलन खइला, धाय थाकुइ । अथे हे जि धायत्यनागु लक्षण हे कविताया शाशवत्, सार्वभौमसत्त्व जुया चवनी धायगु न छगु दंभ मखुला ?

कविताया लक्षण ग्हापां कविता हे खः । कविइ थव लक्षण दःसा कविताय न दइ । उकि थव मालेगु ग्हा ग्हापां कवि यायमाः थव अर्थय कविता न छगु अनुसन्धान खः । थुकिया निती वइगु स्वरूपय जक मखु, कीगु म्वायगु तरिकाय व कीगु स्वयगु दृष्टिइ व थव फुक्कया अनुभव बलनीगु भावनाय व अभिव्यञ्जनाया शक्ती न शोधखोज

जुइमाः, परिवर्तन वयमाः । गुलि ईव्यःया च्यूताः तसें तीव्रतम व्यञ्जना दइ; अऊ अप्वः मामिक, अऊ अप्वः हादिक; अऊ अप्व धाय्गु पह-
लय् न्हूगु शीप; कनेगु ख्यै न्हूगु धापू; तुनेगु ख्यै न्हूगु जः वइ; गुलि सत्यया उद्वोदनय् न्हूगु अर्थ हा काइ; गुलि मधाः थें च्वक धयाः नं हःपाः बिया च्वनी, धया मतः थें च्वक छ्वा च्वना नं गुलि नुगः थिइ - शायद कविताया शाश्वतता व नवीनता अन हे गम दय माः उकि कवित नं थ्व अर्थय् छगू अनुसन्धान खः धइगु । थथे स्वयं बले नेपाल भाषाया कविताय् नं छगू असंतोष, छगू अनुसन्धान, छगू मेगु लं ज्वनेगु पित्याः पहः विस्तार ब्वलना च्वंगु दु । पूर्ण वैद्य, योगेन्द्र प्रधान आदिया कवितां थज्याःगु प्रवृत्तिया सकेत याः ।

न्हयसः ४ प्रगतिशील साहित्यया स्वस्थ विशेषतात छु छु थें न्यने दइला ? नेपालय् करीब स्वंगु ति दशक न्हयः व थौंकन्हय् खने दयाच्वंगु प्रगतिशील विचारधारायं व प्रगतिशील साहित्य रचनाय् छु छु अन्तर खका विया ?

साहित्यया स्वस्थ स्वरुपात हे वास्तवय् साहित्य धाइ । थ्व प्रगतिशील साहित्यया निति गुलि आवश्यक जुइ, उलि हे मेगु विचारधाराया साहित्यया निति माः । प्रगतिशील जा छगू विशेषण खः - थ्वइत हे बादया नाम अलग वर्गीकरण याय्त प्रतिवाइया संज्ञा बिइ माल । प्रगतिशील जुइव साहित्य जुइमखु, तर साहित्य जुयाः प्रगतिशील मजुइ फु । थुकि साहित्यया निति छगू बिनिष्ठ अभिव्यञ्जना माःगु जुयाच्वन धइगु क्वः जित जुइमाः । उकि साहित्यया स्वस्थ बिशेषता प्रगतिशील, साहित्यया नं स्वस्थ स्वरुप जुइ धइगु ख्यै जित विश्वास दु ।

चव्य धइथें प्रगतिशीलता विचार वा दृष्टि विशेष खः । थ्व केन्द्रियताय् मेमेगु ज्वलं गौण मजूसें निगुलिया समानुपातिक समिकरण जुयाः छ्वा, छ्धी, छ्चवः थें जुइमाः । मनूया केन्द्रीयताय् वइगु स्वत्वाःया संरक्षणया निति लेखकतय्गु भूमिका दायित्वपूर्ण जुइ । ह्वापा व आःया दत्थुइ गुलि अन्तर बल क्रमबद्ध अध्ययन मयानागुलि थथे हे धकाः क्वःछी मफु । अय्सां ऊवात्त हासिइगु कथंया परिवर्तन वःगु अनुभव जिके मदु ।

न्हयसः ५ छिगु दृष्टि थौंकन्हय् नेपाल भाषा व नेपाली भाषा नित्याया साहित्य सृजनाया गतिविधि छु गथे जुयाच्वन, ? उल्लेखनीय उपलब्धि छु छु खने दु ?

नेपाल भाषा व नेपाली भाषाया साहित्यय् वइच्वंगु सृजनात्मक गतिविधि आशा याय् बह जूसां असमान ताया । नेपाली साहित्यय् गुगु छगू क्रमिकता दु, व्यापकता दु, बिषयगत व प्रयोगिक विविधता दु, कीगु साहित्यय् उलि व उकथं वइच्वंगु मखना । विकाशया क्रमबद्ध, निरन्तरता नं मदु । थ्वया सीमित परिवेशयात स्वयं बल्य् आश्चर्यं ताय्माःगु मदु । कविताय् छ्वाः प्यह्वा खुह्वा हूनि कवित छकलं धइथें प्रादुर्भाव जुल- दुर्गालालया ल्यू । गथेकि पूर्ण वैद्य, श्यामसुन्दर, योगेन्द्र प्रधान, बुद्ध साय्मि, सुन्दर, आनन्द जोशी इत्यादि । अनलि थ्व क्रम, थ्व प्रभाव न्ह्यानावं वइच्वंगु दु ला मस्यु । थुकथं हे बाखं-साहित्यय् वइच्वंगु उपलब्धि उल्लेखनीय धाय्वहःगु जिगु लुमन्तिइ मवः । शायद थ्वइगु अध्ययन पूर्वक याय् मफुगुलि जिगु अज्ञानता नं जुइफु । उपन्यास जा कन हे गरीब-धूसवां थें जाःपि छ्वा निह्वा त्वःता र्व सु खने दत उल्लेख योग्य उपन्यासकारत ? कविताया तुलनाय् मेगु विधा लिपा लाःगु खःला धयाथें ताया ।

न्हयसः ६ छि 'व्यास काव्य व कवि व्यथितया काव्य रूप' नेपाल भाषां चव्यादी धुंकालि उकिथा जगय् छि नेपाली भाषां 'कवि व्यथित र काव्य साधना' धयागु सफू साधना याना दीगु खःला थें ?

मखु । कवि व्यथितया 'संचयिका' (नेपाली) काव्यया भूमिका चव्याबल्य् ताःहाकः जूगुलि लिपा सफूया रूप बियाः 'कवि व्यथित र काव्य साधना' तयार यानागु खः ।

न्हयसः ७ नेपाली भाषा साहित्य संसारय् सालिक (निबन्ध संग्रह सफू) धनाः नेपाल भाषाया ख्वालय् 'न्हाय्' (शीर्षकगु निबन्ध छपु जक)

व्याः चने माः गु बाधयतां छित असंतुष्टिया बोध मजूला गुबले ?
असंतुलनतां इकुमकु मधायकूला ?

भाषाया तःधंगु महत्त्व दु तर साहित्यया क्रम्य अभिव्यक्तिया
लिधंसाया रूप्य जक वडत स्वीकार याना । साहित्य - सृजना व
भाषा सेवा नितानं छगू मखु । साहित्यया विकास नापनाप जक
भाषा थाहाँ वनी । उकि लेखन - कार्य अथवा सृजनाया संसार्य
म्बानाचवनाह्य जि, जित ला कृतित्वयो महत्तां विशेष प्रभावित याः
चा हे थ्व कृतित्व नेपाली जुइमा अथवा नेपाल भाषां । न्हय
छपु जक वया चनेमाःसां ह्याय धेंगु मताया । लं लाःसा मेगु नं
चव्यतिनि - व जिगु सीमा मखु, अन्त मखु ।

न्यासः ८ छिगु नेपाल भाषाया रचना कृपि प्रकाशनय मवःगु ता ई द्य
धुंकल ! छि थज्याःपि स्पल्लाःपिनि पाखे ईलय व्यलय छुं
रचना कृति पिहाँ मवइबलय नेपाल भाषा साहित्यया वमिपि
गुलि अशांछाकाः चने माल जुइ ? थुजाःगु खं छित गुबले
च्वास्त ममिला ?

चव्यमखु धकाः पाः फडतइगु महु । चव्य मास्तिवः । तर धया
नि, गुलि चव्यमाःगु खः इलं मव्यगुलि चव्य मफु । थ्व जिगु
थःगु हे विवसता खः, थ्वइत भाषानाप स्वाना छुं धायगु धाइपिनिगु
आग्रह जुइफु । अज्याःगु परिमिततां गबलय पिहाँ वने फइ थें ?

न्यासः ९ आः 'साक्षा प्रकाशन' सम्बन्धि छता नितानं खं न्यने । न्हापापा
'नेपाली भाषा प्रकाशनी समिति' व आःयागु 'साक्षा प्रकाशन' या
नीति व उदेश्य पाना चवंगु दु ला ?

समयानुसार छुं पाइगु ला स्वाभाविक हे खः । ह्यापा छुं कथया
प्रतिवन्ध तय्त नं थ्वइगु आवश्यकता दत जुइमाः । आः अज्याःगु
छुं मन्त ।

न्यासः १० ने. सं. १०६६ (वि. वि. सं. २००३) रिष्य उवलया सरकार
'नेपाली भाषा प्रकाशनी समिति' अन्तर्गत नेपाल भाषाया सफू

जाँच यानाः फिकाय्त स्वीकृति बीग विभाग चाय्काः यक्व सफूत
पिकाय् दय्काः व्यगुलि नेपाल भाषा साहित्य उथाय् वलंगु खः ।
आः साक्षा प्रकाशन नेपाल भाषाया कृति नं प्रकाशन याय्गु
व्यवस्था याःसा साक्षा प्रकाशनया देन यक्व तःजि व तपफाः
जुइगु जिमिसं खना, छिगु छु बिचाः दु ?

धाय् धुन, अवलया सरकारयात मज्यगु सफू पिहाँ मवय्मा
धयागु उदेश्य नं उकी दुने लाः । उकि छापय् याय् ज्यू-मज्य
धइगु स्वीकृति बिइगु ज्या नेपाल भाषाया साहित्य वलंगु खः
धयागु खंय जि सहमत जुइ मफु । अथे खःसा आःला स्वीकृति
नं स्वाःल । कीगु साहित्य गावक थाहाँ वने माःगु खः ।
भाषा व साहित्यया समस्या मदय्माःगु खः- मखुला ? सैनक
अभिप्राय लं दय्कूसां वइगु फाइदा जनतां नं काइ धयाथें
जक ताया । समितिया मेगु रूप साक्षा प्रकाशन खः । मेगु
भाषाया सफू पिकाय्गु थ्वया परिधि दुने मलाः । बरू नेपाल
भाषाय् नं सकल नेपाल भाषा-भाषीतय्गु मंकाःया रूप्य थज्याःगु
हे छगू प्रकाशन संस्थाया व्यवस्था याय् फःसा गुलि बांलाइ ।

न्यासः ११ नेपालया राष्ट्रियता अज्ज वचातुकाः यनेत राष्ट्रभाषा नेपालीया
अतिरिक्त नेपाल अधिराज्य दुनेया काव्य साहित्य व बाडमयं
सम्पन्न भाषाया सफू प्रकाशन याय्गु व चवमिपित्त हने माःगु
खनेदु । साक्षा प्रकाशनया थुजोगु ज्या खंय ध्यान वंगु दु ला ?
छु योजना दु ला ?

थुकी जिगु विरोध यदु । तर थ्व खं श्री ५ या सरकार बिचाः
याय्माःगु खः, अलय एकडेमि साक्षा प्रकाशन जा छगू प्राइवेट
संस्था खः, सहकारी अन्तर्गत । सत्य ला छु धाःसा कापिनिगु
भरोसा नं माः, तर थ्वयासिकं थःहे न्यचचिले फय्माः । वास्तविक
समाधान थन हे दय्फु ।

न्यासः १२ साक्षा प्रकाशन पाखे आः तवक छु छु विषयया छु छु भाषाया स्वः गु
सफू प्रकाशित जुयाच्चवु ? प्रकाशनया नितिसफू दुत विइत च्वमि
छु छु विधि पालन यायुमा ?

साक्षा प्रकाशनं साहित्यिक सफू वाहेक कृषि, इन्जनीयरिङ्ग, विज्ञान,
वनविज्ञान थें जाः गु व शिक्षा, दर्शन, भाषा, व्याकरण, अर्थशास्त्र,
ऐन कानून, उद्योग, बाल-साहित्य आदि विषयया सफूत नं षिकाः ।
थुकथं स्यासलं मथावक विभिन्न विषय व प्रकारया सफूत षिकाय्
धुंकल । व्यावसायिक दृष्टिं चुइगु किसिमया अन्तरराष्ट्रिय महत्त्वया
छु सफूत अंग्रेजीइ नं प्रकाशित जूगु दु । प्रकाशनया विधिया निति
संस्थाय् सम्पर्क तयगु बेस जुइ । संक्षेपय् धायगु खः सा सम्बन्धित
विषयया पाण्डुलिपि सम्बन्धित विषयया विद्वानं मूल्याङ्कन यानाः
प्रस्तुत याः गु रिपोर्टया आधारय् संचालक समितिया स्वीकृति
अनुसार प्रकाशन यायगु व्यवस्था दु ।

न्यासः १३ नेपालया संस्कृति व इतिहासनाप सत्तिक स्वापू दूगु उच्च साहित्य
बाङ्गमय् सम्पन्न जूगु व नेवाः जातिवया न अस्तित्व जुया च्वंगु
नेपाल भाषां खें लहाकेगु व खें लहाय्गु त्वः ता हः गु नेवाः तय्
व्यवहार गुलित उचित जू ? थुकि १/१ गू दशक लिपाया नेपाल
भाषाया अवस्था गय् जुइ ? की सकलें जानाः थ्व व्यवहारयात
गुकथ सुधार थाय् माली ?

उचीत ला गय् धाय्फइ ? हानं अनुचीत घकाः नं स्वइत दोष
विइगु । थ्व व्यवहारया वासः छु ? ईद्वयः व आवश्यकतां मनूतय्त
दय्की, हिइकी । खालि प्रेम व हादिकता दयां मगाः । कित
अज्याः गु हे वातावरण दय् माल । लिपा थथे जुइफु धयागु सम्भावनां
स्यानाः छु व सम्भावित सूर्यं (वा दुर्घटनां ?) मुक्त जुइफइ ।
इतिहासय् गुलि साम्राज्य बल-वन, गुलि जाति विलीन जुल,
गुलि संस्कृति लोप जुया तनावन, गुलि सभ्यता बिनष्ट जुल
अथवा हिलाः मेगु रूपय् विकसित जुल, थ्वया त्याः चाः मदु ।
भविष्यय् थ्वइगु पुनरुक्ति जुइमखुत-सुनां धाय् फइ ? उकि म्वाय्

फइगु छगु विशिष्टता, व्यापकता दयाः नं अध्ययन अनुसन्धानया
वस्तु जुयाच्चवु उदाहरण नं आपालं दु । छु जुयाः बिल धाः सां नं
जुइगु क्रमय् अस्वाभाविक धायगु नं गथे । थन ला
स्वाभाविक छु खः, उकिया हा मालाः सचेत जुईगु व
स्वाका तय्त उपाय यायगु कीगु कर्तव्य खः । तर न्यासलय्
धइतः थें उलि याकनं व अःपुक गुगु साहित्य - संस्कृति-
भाषा-जाति दुसुना बनी मखु । उकिसं नेवाः त सुसंस्कृत जातिया
नेपाः मि खः । थः गु उज्ज्वल परम्परा, संस्कृति-साहित्यप्रति ममता
तयाः गुलि अप्वः गति बियाः न्यानाचवनेफइ उलि हे म्वानाः
थिनाः च्वनी । ऐतिहासिक व सांस्कृतिक महत्ताया मूयात सुनां
न्हंकाः छवयगु कुतः याय्वं न्हावनीगु परिस्थिति नं मखय् धुंकलः
न्हापा व थौया सन्दर्भय् वः गु थ्व परिवर्तन त्वः मके मज्यु ।

न्यासः १४ बौक्कन्य ल्याय्मह ल्यासे नेपाल भाषा भाषीतसे जानाः नेपाल भाषाया
साहित्य सम्मेलन, संगीत सम्मेलन, न्यासः लिसः कासा, न्हू दँ
समारोह, पत्र-पत्रिका पिकाय्गु इत्यादि ज्या यानाच्चवु छित
गय् च्वं ताः ? थुकी गनं भिके माः गु दु ला ?

प्रयाश बांलाः । थज्याः गु प्रवाह दयाचवने माः । प्रत्येक विषयया
समार हया जि प्रत्यक्षदर्शी जुइ मफुगुलि गथे च्वं व छु भिके माः
खः धाय्मफु ।

न्यासः १५ प्रज्ञा प्रतिस्थान, रेडियो नेपाल, साक्षा प्रकाशन थें जाः गु निकाय
नेपालया फुक्क भाषा भाषीप्रति सम्मान याखें उचित थाय्
बियाः यंकूसा नेपाः या नागरिकतय्के स्वस्थ समकदारी बलनाः
राष्ट्रियता नं ववानुइ धाइ । थुकी छिगु छु विचार दु ?

प्रत्येक भाषाप्रति सम्मानया दृष्टि तयाः उचित थाय् बिइमाः । अल्य
थुकथं हे थः थः गु विकास याना वनेमाः । थाय् बिइगु सम्मानया निति
जक मखु, सम्प्रदायिक सद्भावना, जातिय एकता व राष्ट्रिय
भावनायात ववानुका तय्त नं थ्व आवश्यक भाः पाः ।

न्यासः १६ नेपाल भाषा व ध्वया साहित्यया भविष्यप्रति छिगु धारणा
न्यने दइला ?

ध्वइत कीके जक परिमित जुयाः कीसं आञ्जु थिइगु कुतः धया ।
धुकथं हे कीगु मेमेगु भाष्या महत्ताय् नेपालमित जागृत जुयाच्चंगु ।
दु । ध्व पतिप्रेक्षयात उपेक्षा याय्फइ मखु ।

न्यासः १७ नेपाल भाषाया-थो थो विधाय् छित सु सु च्वमि वकलय्
अप्वः प्रभावित याःगु दु ?

आधुनिक साहित्यया अग्रज तथा लैजुवाः साहित्यकारतय्गु निष्ठा
व भाषा सेवा; न्हूःहपि विद्वान्, अनुसन्धानकर्ता व समीक्षक
भाजुपिनिगु अध्यवसायता व वैज्ञानिक विवेचना; थौकल्लय्या
कवि, कथाकार व उपन्यास लेखकतय्गु असंतोष पिदनाच्चंगु
सृष्टिया व्यथा, असमर्पित भावना व प्रयोगोन्मुख चेतनाया
आभासं जित विशेष आकर्षित याःगु दु । अथे ला संस्कृतियात विशेष
अवेग्य् ज्वनाः कीत हासिकेगुली व्यथितया छ्वासः, तुगः थिइगु
कविताय् दुर्गालाल, अभिव्यक्तिया विन्यास नापनापं समसामयिक
जीवन व परिप्रेक्षयात आधुनिक विम्ब - प्रतिविम्बय् ज्वनाः कविताया
समानान्तर विकासय् न्ह्याज्यानाच्चंगु न्हूगु चेतनाया धरातलय् पूर्ण
बैद्य, योगेन्द्र प्रधान, बुद्ध साय्मी आदि कवि अलय वेग - संवेगया
प्रवाहय् न्ह्यानाः छगु कौतूहल सृष्टि याःहा उपन्यासकार धूस्वां
नं जित प्रभावित याःगु दु ।

न्यासः १८ नेपाल भाषा बाहेक छित मेमेगु छु छु भाषाया गुगु मुगु
विषय यः ? सु सु च्वमि यः ?

समालोकया निनि साहित्यया न्ह्यागु विधायानं उलि हे महत्व
दइ, उति हे ग्यना च्वनी । न्ह्यागु भाषाया साहित्य जुइमा
उकिया सृजनात्मक विशिष्टता; परम्परां पिहां वया मेगु परम्परा
स्वाय्त हइच्चनीगु स्वस्थ प्रयोग, दृष्टि तथा विचारया मौलिक
प्रस्तुति; एनदम भिन्न व शैल्पिक बैशिष्ठ्य दुगु रचना जित
विशेष यः ।

न्यासः १९ छि नेपाल भाषां बाहेक मेमेगु छु छु भाषां च्वयादीगु याना ?
थःगु मां भाय् नेपाल भाषां च्वय्गुली गौरव व संतुष्टि वःला
कि मेमेगु भाषां च्वय्बलय् ?

विशेष यानाः नेपाली भाषां च्वयगु बानी दु । ह्यापा हिन्दी नं
च्वया । तर च्वय्बलय् भाषायात महत्व बिइगु हिसाबं प्रेरित
जुयाः गुगुं भाषां नं च्वयागु मदु । च्वय् गनं धाय्थुन थें च्वं
साहित्यय् भाषायात अभिव्यक्तिया ज्वलंया रूपय् जक कया यद्यपि
जातीय तथा राष्ट्रिय महत्ता व अस्तित्वया प्रश्न न भाषाय्
घानाच्चंगु दु । जिगु ज्या च्वय्गु खः । थःगु रचना अप्वः से अप्वः
पाठकं ब्वनेमा धइगु इच्छा न्ह्याहां लेखकया जुइफु । मखुला
धाःसा च्वय्गु छाय् व स्वइगु निति ? उकिं च्वय् मखन धाःसा
जि दुःख ताया । सृजना अथवा लेखन कार्ययान भाषाया परिवेशय्
जक तयाः स्वय् मज्यू, बन्देजयजक तयाः नाले मज्यू । थथे
खःसां भाषाजवाः व स्रष्टाया दत्थुइ गुगुं भेद हे दइमखुत । सृष्टि
दुने अस्तित्व दइ, गौरव दइ, संतुष्टि दइ - ध्व गुगुं भाषां धइगु
प्रश्नं साहित्यकारतय् उलि आकर्षित याइ मखुला कि ? प्रश्न
ला थुकि गुलि महत्वपूर्ण योगदान जुल, गुलि अभूतपूर्व कला-साहित्यया
सृजना जुल धइगु खं खः । कला व सृजनात्मक वस्तु मनुष्य मात्रयां
संपत्ति खः - चाहं ध्व नेपाल भाषाय् जुइमा, नेपाली जुइमा वा
गुगुं मेगु भाषाय् । गुगुं भाषां च्वय्गु जकः तःधंगु खं मखु, खं
खः च्वयागु वस्तु गुलि स्थलाः, गुलिजयी जुल । उकिं थःहं
मनतुना थें सफल जुइबलय् जित संतोष जू, लय ताया, गौरव ताया ।
भाषाया सिखलं चिनाः उकिया महत्तां दाय्गु ज्या गुबलें ममाना ।
अय्सां थःगु भाषाप्रति स्वइत मोह मदइ ? थःगु भाषां च्वय्बलय्
सुनां आनन्द मताइ ।



तया बिल ! लहाःतय् च्वंगु च्या व शिलाया न्ह्योने च्वंगु च्या छकः छकः
स्वल । निघुतु स्वघुतु त्वन । शिला च्या मत्वसे अर्थे राजयात जक स्वया
च्वन । थःत स्वयाच्वंगु खनेवं राजं वय्च्वंगु च्या कयाः शिलाया लहाःती
तया बिल । निम्हेम्यां च्या त्वन । खला राजं छेय् च्या त्वना वय्
धुकूगु खः । अय्न् न्ह्येपुक सवाः काकां च्या त्वना च्वन ।



ने. सं. ११०२ न्हू दँया लसताय्

— भित्तुना —

छिकपिन्त माःगु कथंया फर्निचरत - सोफासेट व मेमेगु
नं सिँया सामानत माःसा लुमंका दिसँ ।

विकाश काष्ठ कार्यालय

कमलपोखरी

फोन ल्याः १२३४१

ने. सं. ११०२ न्हू दँया लसताय्

व्यावक जनता थःथःगु जातिय भाषा,
साहित्य, संस्कृति व कलायात च्वन्हाकाः
विश्वया न्ह्याःने धस्वानाः स्वाय् फय्मा । जिमिगु

भित्तुना

एभरेष्ट आर्टस्

प्रो. बोधिवज्र बज्राचार्य

नागबहाल १५/३४८, यल

फो. ल्या. २१,२६५

पीछां ल्याः ६७६

आनन्द जोशी : जि 'जि' मखु

— माधवलाल कर्मचार्य

आनन्द जोशी नेपाःया 'विस्थापित' पुस्ताया छह चेतनशील कवि
। वय्कःया कविताय् बाध्यता व विवशताया पियांपी मफुगु भाव दु । वय्कलं
गु 'अस्तित्वयात फगत सालिक जुयाः भवाना च्वनेमाः' बाध्यता खना दीगु दु ।
हे थः दुनेया मनूयात 'छः मदुगु देगल्य् बलि बिइमाःगु बाध्यता' खना-
नादीगु दु । जीवन हनेगुयात वेकलं 'ध्यनाव्यूगु तुति यात्रा यानागु भाःपी
गु बाध्यता' व कीगु वर्तमानयात 'गोलि लाःगु तुति वरदान फयाः भवाना
मह सिपाही' भाःपिया दीगु दु । थौकन्हेया सभ्यतां कःपि सम्पूर्ण मनूयात
याः वेकलं घया नं छ्वयादीगु दु —

धातर्थे गुलि बाध्य मनू

थःह्मं दयेकागु आलपिनं थःत सुका च्वनेत

गुलि बाध्य मनू

थःह्मं खंगु गालय् थःत थुंका च्वनेत

गुलि बाध्य मनू

थःह्मं दयेकूगु छे थःत त्ययेका च्वनेत

'ध्व बाध्यता', वय्कलं चायाच्वनादीगु दु, 'सभ्यताया ल्हाः वंगु
माहासनाप मनुखं हे बुइकाः वःगु' खः गथे, कीगु वर्तमान नापं सफलसया की
जुया च्वम्ह सभ्यतां न्हूगु नामय् ककुइ बाकेगु मं ज्वनाः न्हूगु नामय् तुतियात
मीनताया कफ्युं दुने कुनाः छगू च्वापुया शहर बुइका च्वंगु खः, ब्वलंका च्वंगु
। थुगु अवस्थाय् थःह्मं नं विवशतां हे जीवन हनाच्वनेमाःगु खँ ल्हययनाः

धयाच्चना दिल —

स्व, जितः ला

गःपतय् स्वतिपांचं चिनाः

लुत्तु लुयाः जक यंका तःह्य दुगुत थे

लुत्तु लुया जक यंका तल

अले खना च्वनादिल 'वापुसा ज्वनाः वा पीत वःम्ह ज्यापु बुँइ पि त्वपुना च्वंगु खनाः लागिमिगि चायाः लिहाँ वं थे वसन्त ऋतु अथे' हे लिता वंगु; कन्हे ह्वइगु मुखस्वां विषालु कीतय्सं आक्रमण यानाः गना वना च्वंगु; थः सी धुं'कल धकाः क्रिया च्वने माःगु वातावरण; फगत जुलां धेबाय् मियाः थःगु वर्तमान, थःगु विद्रोह थःगु विश्वास धू धू जूगु; थःगु हे योजनायात कुनाः ध्वमि केत छचाखेरं थःगु हे ह्लातं पःखा दनाच्चंगु' आदि आदि । उलिजक मय् वय्कःयात धयाच्चने माःगु दु —

धात्थे गुबले जि मन् जुयाः स्वायेत स्वया

न्ह्याबले बुँख्याचा जुयाः स्वाये माःगु दु !

अथे हे, धायेमाःगु दु —

छगः निगः धेबाय् समर्पित जिगु 'थौं'

'थौं' स्वायेगु बाध्यताय् 'कन्हे' या लिताम जूगु दु ।

अथे बाध्यता व विवशतां त्वपूगु जिन्दगीं थःत 'म्वातले वालं चिना च्वनेमाःगु खुसि', 'नच्चापि ल्यासेत छम्ह हे मदुगु पिकनिक'; 'यलधवाखा... शहिद गेट...शहिद गेट ... यल धवाखा' याय्गुलो सीमित अस्तित्व, 'थः गना वना च्वंगु खना नं सह याना च्वने माःम्ह खुसि' आदि भाःपिया च्वंगु खनादिल अले छु आश्चर्य !

धुगु अवस्थाय् वय्कःया मनय् आस्था सुइगु, अनास्था लुइगु स्वाभाविक हे जुल । वेकलं अले प्रत्येक आस्थां शंकाया कीत बुइका च्वंगु खनादी । सभ्यताया प्रतीक शहरयागु जिन्दगीइ आस्थायागु आधार भ्याः हे मदुगु खनाः धया नं दी —

(१०६)

✻ खलुइताः ✻

न आस्थाया सूर्य दु व शहरया सर्गतय्

न भविष्यया जः

न वर्तमानया खुसि

छु दुसा, अनास्थाया ग्रहणं ज्वंगु जिन्दगीया स्वापाः

गुलिजक मखु, वय्कलं धयादी —

प्रत्येक क्षणय् इजाःपुतु फेनाः विश्वासया सुरुवाः त्वकूगु दु

नांगाह्य विश्वास निर्वासित घोषित जूगु दु

ब्वलंगु आस्थाया पुसा अनास्थाया दोहनं नकाः

फिसः इउंगु दु जिन्दगीइ जिन्दगी

प्रत्येक विश्वासया छे' दुनावनाच्चंगु थ्व स्थितियागु बोध्य अनास्था चरम-सीमाय् धयंस्ये लि वय्कलं धयादी —

भीके छुं दयाः नं छुं मदुगु थ्व इलय्

भी छुं खयाः नं छुं मखुगु थ्व इलय्

उकिं, कुन्जनी !

छं कुलां स्वयेत मिखा मब्बःसां जिइ धुं'कल

छाय् धाःसा —

कुलां दु

कुलां दया नं वनेत लं मदु

ले दयेकेत नं भीके तुति मदु ।

ख नं, आस्था अथे बुइगु मखु, 'बुँइ पुसा पिनाः आस्था बुइकेत नं जः माः' । तर जः मदु; वय्कःया नुगः मछिगु नं थुकिं हे । विलौना यानाः धयादी —

जि छु प्राये —

अत्याख इंगु छेँत धयेपुनाः

✻ खलुइताः ✻

१०७

मनं तुना यक्को खँया गुइं डाइनामाट तःगु स्वया च्वा
माःगु सरा

स्वानाया नामय् थःत धौ-बजि नकाः च्वनेमाःगु सराः
कूबिया च्वंहा ... ल्यासेया ... हिरोसिमाया ... ।

× × ×

भीगु दत्थुइ छुं मद्रु

जः मदया ल्वचं कयाः ध्वगिना वना च्वंगु स्वांमात जक वु

इतःमतः कंगु जीवन जक दु

श्व दक्को दत्थुइ

इमिसं खंगु भविष्य, ह्यगस, विश्वास

अभिमन्यु थे षडयन्त्रय् लानाः

चिल्लाय् दना च्वन

सी ल्यंगु हा ज्वनाः ।

उलि जक मखु, वय्कः हालादी —

उफ्, मनुखं हे स्वायेत दयेकूगु क्वथाय् मनू हे कंद

उफ्, मनुखं हे सासः ह्यायेत दयेकूगु क्वथाय्

मनू हे स्वतन्त्र जुयाः स्वाये मफु !

उफ्, गुलि बाध्य मनू !

हीमीचायाः धयादी —

अहो, थौंकन्हे आत्मसमर्पण यायेमाः जिन्दगीं

आत्मसमर्पण याये माः जिन्दगीया पलाः नं

अले मिखानिपां कांम्हसें थे धयादी —

जि 'ब्रेल' थियाः ह्यसीकाः ब्वनाच्वना

जिन्दगी

जिन्दगीं स्वायेगु प्रत्येक संभौताय्
थःगु स्वाः छोने स्वाःपाः तयाः स्वाइ (?)

स्वानाया नामय् स्वाःपाः तयाः

फगत बलात्कार याइ थःगु इच्छायात

बलात्कार याइ थःगु ह्यगसयात

बलात्कार याइ थःगु वर्तमानयात

थये खंसेलि गुगुं हे हालतय् नं थःत सम्हलय् याय्मफयाः धयादी —

गुलिखे जिन्दगी अर्थहीन जुयाः खतं नःगु दु

गुलिखे सर्गः अर्थहीन जुयाः संगुबाःगु दु

गुलिखे क्रसत अर्थहीन जुयाः हि क्यूगु दु

गुलिखे स्वां अर्थहीन जुयाः तुतिं न्हूगु दु

गुलिखे खुसि अर्थहीन जुयाः सगु दु

गुलिखे गुं अर्थहीन जुयाः चलः वंगु दु

श्व बाध्यताय् तक्कनाः स्वायेगु, स्वाना बिइगु

मुक्तिया म्ये मखु

मुक्तिया लं मखु

मुक्ति लिपाया जः मखु

अजुगति चाय्माःगु नं खँ खत, वय्कलं हे धयादी —

अहो, गुफां अन्तरिक्षतकया प्रगतिया इतिहास च्वया नं

बाध्यताया दुने जिन्दगी !!

धात्ये गुजोगु !

उकि दृढनिश्चय यानादी चेतनाया पुखुलिइ तिन्हया बिइगु थये

श्वमाः —

“खः, जिन्दगीं

बन्द क्वथाया चायेकेमाः लुखा

लुखा चायेकाः पिने पिहाँ वयाः स्व -

थःगु स्वाः थःके हे दु !

स्वाःपाः व ला ग्यानापुगु ख्युं जक खः

स्वाःपाः तयाः स्वायेगु

व ला अस्तित्वहीन जुयाः स्वायेगु जक खः ।

नापं स्पष्ट यानाः धया नं दी — स्वाःपाः ततं थःगु स्वाः म्हसीके
मफुगु जिन्दगी जिन्दगी खया नं जिन्दगी मखु ।

ख नं, थुकियागु लागि मनुखं मनूयागु मू सीकेमाः । 'मस्यगु, मथूगु
छडीइ हे थुजोगु बाध्यता, विवशता, विसर्गति हा काः वइ, अले युद्धावस्था जोगु,
शहरी सभ्यता जोगु विकृति नं ध्वदुकः वइ । उकि वय्कलं धयाचवनादीगु— आः
ला वनेमाः व थासय् गन मनू दु, मनुखं मनूया मू स्यू, थू । मखुसा, वय्कल
खनाचवन, थौंया मनू लाटोबुंगो, बुंख्याःचा व भक्कुयात ब्यूम्ह मे जुयाचवन, वयागु
मू उलि हे जुयाचवन । अछू ला, व छू निर्जीव वस्तुया संग्रहालय थे 'लाशया
संग्रह' जुयाचवन । वय्कलं धया नं दिल— इतिहासया लाख्य व भूततय्सं धया
च्वंगु दु मनू पाः लःह्याये मखंम्ह डुम जक, बालिघरी कया यंकूगु साइकल खुया
यंकाः छु याय् छु याय् जूम्ह खुं जक, कलातं याःगु विश्वासघातय् बूम्ह मचाया
बौ जक खः ।

उकि वय्कलं चाय्कादिल— थ्व स्थिति-परिस्थितियागु विरोध
याय्माःगु दु; थुकियागु विरोधय् विद्रोही जुयाः दनेमाःगु दु, सकसितं भावात्मक
जागरण हयाः थने नं माःगु दु । उकि धयादिल—

स्वीकृति हे छाय् व जिन्दगीया गुगु च्वापु थे खया चवनी

पूजा हे छाय् व सफूया गुह्य चलः वना च्वंगु पहाड्य लं
कयनी

तर थ्व फुक्क स्थिति-अवस्थिति थुकथं थौतक्क न्ह्यानाः वयाचवने
फुगुया दोष वय्कलं थःगु हे खनादिल, थः थे हे 'विस्थापित' जुया; नं 'अ-विस्था-

पित' जुइमाल धयागु चेतना काय् मफुनिपिनिगु खना दिल । थःगु हे, थःपिनिगु हे
असमर्थतां यानाः, व असमर्थतायात हिस्यानाः वसन्त लिहाँ वंगु खंके मफुपि,
थुइके मफुनिगु दोष खनादिल । उकि विरोध यायां धयादिल —

आः ला विरोध दु

विश्वासया स्वांमाय्

विष त्वाकः ज्यागु लः बिया च्वंह जिगु हे ह्याःनाप

संह्र व्वलंके त्यंगु प्रयासया विरोध यानाच्वंह

जिगु हे म्हुतुनाप !

थये विरोध याय्माःगुया आधार नं स्पष्ट यायां धयादिल—

छाय् वाध्यताया पः खाः थुनेत मदन थ्व ह्याः !

खः, ह्याः ला दनेमाः थः दुनेया मनूया संकेतय्

तुति ला ह्यायेमाः थः दुनेया मनूया संकेतय्

म्हुतुं ला सः पिज्वयेमाः थः दुनेया मनूया संकेतय्

वय्कःया पूरा विश्वास दु— थः दुनेया मनूया संकेतय् जक जिन्दगी संगतिइ,
सुसंस्कृतिइ, सुस्थितिइ न्ह्याकेगु लगाम दु । व मनूया संकेत मन्यनेगु हे तःहंगु
दोष खः । वय्कःया नुगल्य उकि धाः नं जूगु दु —

मनू-मनूया दत्थुइ त्वापुया पुसा पिइगु व बार

लिकायेगु बिचाः तक नं मयाः छं,

खः, छं बार लिकया मछ्वः ।

उकि तं लिसा काकां धयाचवना दिल—

कन्हे वइपि जिन्दगीतय् कुनीगु व बार

ह्याः वनेत वइपि तुतितय्

मृत्यु वरदान बिइगु व बार

खः, छं ला व बार' लिकयाः वांछ्वेमाःगु खः ।

मनूदुने ब्वललं वयाच्वंगु विशालता

व हे संकीर्ण घेराय् म्वायेगु क्रमया

छं ला अन्त्य यायेमा:गु ख: ।

तर छ धा:सा गुपचुप

अहो, अन्न नं व हे 'बार' सुरक्षाया कवच भापिया: म्वाना
च्वन तिति छ ।

वास्तव्य बिस्थापित 'पुस्ता'या मेपिलिसेयागु सीमारेखा नं श्व हे
ख: । मेपि थ: दुनेया मनूया संकेतय् सनेत मस्वइपि, थ: दुने ब्वललं वयाच्वंगु
विशालतायागु रति पर्वाह मतइपि, व हे संकीर्ण घेराय् म्वाय् सनीपि जूगुलि
जिन्दगीयात खुसि भा:पिया: वालं चिका: च्वनी, पा:लूथाय् घुसुहुं न्हानाच्वनी,
सूर्यया प्रत्येक जति गनावने मा:सां सहयाना च्वनी, बंसि ताना: ल: ध्वगिका
व्यूसां जिन्दगी हे धका: च्वनी; अले तालं श्वया: कुनात:गु खुसियात न्ह्याकेगु
लालसा, फिसलं त्वपुया ब्यूगु जिन्दगीया बुं फिस: चीकेगु इच्छा, विश्वास इने
फुगु सुथ बुइकेगु अभिलाषा, सीत्यंगु जिन्दगीइ स्वंग:गु मिखा ब्वलंकेगु आकांक्षा,
ख्युं इ आस्थाया मत च्याकेगु आशा-थुपि फुक्कं संक्रामक रोगं ग्रस्त जुया: अर्थ-
हीन जुयाच्वसां गुपचुप गुपचुप जुया: फगत श्वय् मफुगु स:, चुं चुं दंगु हस्ताचर,
न्ह्या बंगु ह: जुयाच्वनी । उखे 'बिस्थापित' पुस्ताया संवेदनशील नापं चेतनशील
जुया: दना व:म्ह मनू, व ब्वललं व:गु विशालतायात चाय्का: व दुनेया मनूया
संकेतय् सनेत स्वइपि जूगुलि इमिसं चा:- जिन्दगी न्ह्यलं चाय्कूगु, उरुमुहं दंगु,
अले तुति-पला: न्ह्याकूगु—

भतिचा लखं थें थ:त इना

भतिचा लखं थें थ:त प्वंका:

भतिचा लखंथें प्याका: श्व बँय्

श्व यात्रा - गुगु ह्यात थ:त सर्ग: थें व्यापक यायेत

श्व अभिमान - गुगु शुरु जुल थ:त खुसिया गति नाप -

खुसियात ह्याकेत

श्व कुत: - गुगु बुल थ:त बिस्थापित मयासे अभिव्यक्त यायेत

हे कुतलय् वेक:यागु सिद्धान्त ब्वलना वइ, वय्कलं ह्ययनादी —

दक्को जिन्दगीयात ह्यांकेत षडयन्त्रय् / कुतलय् / अभियानय्
ब्वति कया: थ:त स्याये मा:गु मडु भोसं !

× × ×

गुपचुप स्वीकृती म्वाना छु जुइ

ह्या:या खुसियात प्वंके मा: व फिसलय्

नत्र, भोगु लसपसय् बुइपि मस्त

फगत 'रोबोट' जुया: म्वायेत बाध्य जुइ

× × ×

भोगु वर्तमानया बुइ भोसं हे पुसा पिइ खने मा:गु ख:

नत्र कन्हे न्हूगु मू ज्वना वइपि जिन्दगीत मस्त

गय् म्वाये फइ

× × ×

ल: ह्यायेमा:, मखुसा ध्वगिइ व ल:

ध्वगोगु ल: नाप ध्वगिइ जिन्दगी

उकि, बाध्यतां मुक्त जुया

थ:गु ह्या:या पति-पति नं बागमति बुइका:

न्हूगु तालया जिन्दगी शुरु यायेमा: भोसं !

× × ×

ह्वा:पा: ततं थ:गु ह्वा: ह्यसीके मफुगु जिन्दगी

जिन्दगी खया: नं

जिन्दगी

मखु !

स्वीकृति हे छाया व जिन्दगीया गुगु च्वापु थें ह्वयाच्वनी

पूजा हे छाया व सफूया गुह्यं चल: वनाच्वंगु पहाड्य् लें कयनी

अले सरलं हे वय्कःया धापूयागु नं स्थापना जूवनी, वय्कलं धयादिइ—

सुनां अभिमानया गतियात पनेत स्वःगु पःखाः थुनी
सुनां जिन्दगीयात लिकुंकेत स्वःगु क्रमया विरोध यात
व ला खुसि ख ।

× × ×
पाःलूथाय् ह्मचायेवंतुं लः खुसि गय् जुइ फैं ?
प्रवाह नापं म्वायेत ला
खुसियात सि माः ।

× × ×
... अय्सां जिन्दगी ला ह्मचाइ खुसिया लः लः थें

× × ×
मृत्युनं जिन्दगी नुसां
वया ह्माःया स्पर्श न्हूगु क्यब ला नुने मफु
वं बुइकाः थकूगु आयास ला नुने मफु ।

× × ×
कुं जाःगु क्वथां मुक्त जुइकेत चायेकेमाः लुखाः
दुने च्वंगु छें मयाक्रान्त जुया म्वायेगु बेसिं पिया दने माः नुनू
सूर्ययात त्वपुया च्वंगु हाकु-सुपाय् चिइके माः जः कायेत ।

× × ×
मनुखं ला उबले पःखाः थुनी
गुबले व पःखालं वया स्वतन्त्रतायात गःकिइ !
मनुखं ला उबले विद्रोह याइ
गुबले वया जिन्दगीयात फज्जः दुने कुनी !

× × ×
बुइ पुसा पिनाः आस्था बुइकेत नं जः माः ।

थुकथं थःगु विचार, सिध्दान्त ब्वलना थःगु दृष्टिकोण स्पष्ट जूगु
थौंयागु थःम्हं खंगु असंगति, विसंगति व विकृतिपूर्ण जिन्दगीया संमस्या-
माधानया लागि प्रयत्नशील जूपि सुधारवादीतय्त धाय्थें यानाः आह्वान
पयादी—

अय् पुखूया लः हिलाच्वंपि
लः हिलां छु याये
हानं ध्वगिइ व लः
हानं कीत बुइ व कैदय् !
अय्, पुखूया पःखाः थुनाच्वंपि
पःखाः थुनां छु याये
व ध्वगिगु लखं ला
भीगु आस्था बुइकोगु बुइ नं कीत इनो ।
उाँक मोक्ष ला
व पुखू ह्माःया छ्वयेगुली जक दु !

वास्तवय् जिन्दगीयात धात्यों हे असंगति-विसंगति मुक्त याय्गु
संगति-व-अविकृतिपूर्ण याय्गु खःसा आःतकयागु जीवन-दर्शन, धारणा
कोण ज्याख्यलय् मदुगु व थुकियागु लागि न्हूगु हे दर्शन, न्हूगु हे दृष्टिकोण
हे मापदण्डयागु विकास याय्माःगु आवश्यकता खनादिल । उकि स्पष्ट
पयादिल—

न्हूगु ताल्जु व धः नं
न्हूगु मापदण्डं लनाः
न्हूगु आयास बुइकाः
बा, ह्मचाके जिन्दगी
लः यानाः ।

मखुसा, वय्कःया स्पष्ट धारणा दु, मनू मनू जुइमखु, वं म्वानाच्वंगु
यागु अर्थय् म्वानाच्वंगु जुइ मखु, अथे मजुयाः वं सित्तिकं यन्त्रणा भोग याइ,

अनेक किसिमं यातना सह याइ । थ्व खं थुइकेमाःगु आग्रह यानाः हे वयं
उकि स्पष्टं घोषणा यानादीगु खः —

थः दुनेया मनूया संकेतय्

न्ह्याः वने मफुगु ह्लाः तुति—

जि ...जि मखु !

थुकथं स्पष्ट जू-विस्थापित पुस्ताया वयकः कवि थःत विस्थापित
मयासे अभिव्यक्त याय्गु कुतलय् व्यस्त जुयादीगु दु । थ्व अभियान्त्रिक वयकः
थःदुनेयाम्ह मनु नामं-थःगु अभ्यन्तरयात थनाः वपाखे थःगु भाव, विचार व
भूति संक्रमण याकाः मेपिनिगु अभ्यन्तरयात नं थनेगु स्वयादीगु दु । मनुया
ह्लास जुजु वःगु थौयागु घडी जीवन तव्या जुजु वयाः मनुखं स्वच्छन्दता
स्वाभाविक नवसां म्वाय् फइगु विश्वास यानादीगु दु । शहीदतय्गु हिया
थुकें हे पुले फइगु व भविष्यया मस्तय्गु सुखशान्ति थुकें हे सुरचित जुइगु व
खनाच्चनादीगु दु ।

खतु, मनुया जीवनयागु अवमूल्यन मयाय्गु, हरप्रकारं उच्च
यायां वनेगु, अले अभ्यन्तरयागु विकास यायां उकियागु द्वारं आः व
स्थिति-परिस्थितियात उन्नत यायां वनेगु मनुया आकांक्षा आःजकयागु मखु, थुकि
लागि विशेष कुतःया प्रक्रिया नं ह्लापांनिसें न्ह्याना वयाच्चंगु खः । नेपाल
यागु कवितायागु क्षेत्रं नं थुकियागु परम्परा मदुगु मखु । तर थौयागु जी
गुलि नं असंगति, विसंगति व विकृति ह्लियाह्लियं तंतुतसे वयाच्चंगु दु । उकि
मूल कारण थःपिनेयागु बल, शक्ति व प्रभाव मखसे थःगु हे दुनेनिसें व्या
अकर्मण्यता, असमर्थता व कुण्ठा खः थयागु दृष्टिकोणया विकास स्पष्ट
वयकःयागु कविताय् जूवल । उकिया नापं थःके निहितगु शक्ति, सामर्थ्य व
तायागु भरय् म्वाय्फइगु जुयाः नं अथे म्वाय्गु कुतः मयागुलि थःगु विरोध या
याय्गु चेतना नं थुकी हे स्फुरण जुल । थथे जूवःगुयां मूल आधार नं छुं
विशेष परम्परा विशेष व संस्कृति विशेष मजुसें थौयागु ज्ञान विज्ञानयागु प्रा
फलस्वरूप विश्वव्यापी रूपं वःगु गुईगुई न्यूगु स्थिति-परिस्थिति व स्थिति-
स्थितिइ मनु-जाति फुक्कसिनं भोग्य यानावयाच्चंगु यन्त्रणा जू वल । थ्व यन्त्र
भोगयागु अनुभूति वास्तवय्, छुं स्थानीय स्थिति-परिस्थितियागु अले छुं

विशेषयागु जक अनुभवं दइगु अवश्य मखु, उकियागु लागि विश्वभरिया मनुतय्गु
स्थिति-बोध, अनुभव-बोध व वेदना-बोधयागु आवश्यक जू । थौकल्लय्थागु
देशयागु लुखा चालाः, विश्वयागु कुकुलामय् च्वंपि मनुतलिसे सम्पर्कया अभिवृद्धि
जुजु वनाः, सञ्चारयागु विभिन्न माध्यमयागु विकास जूगुलि नं फीथाय्थापि
कवि-लेखकतय् थुकियागु बोध जू वइगु मफइगु व मखइगु खं मखु । उकि न्हूगु मू
स्थापना याय्गु आग्रह व दुनेया मनुया संकेतय् न्ह्याःवनेमाः वइगु खँया व्याख्या उलि
न्हूगु मखुसां थुजोगु आग्रह, थुजोगु खँ स्थापना याय्त प्रयुक्त जूगु प्रतीक व दृष्टान्त
अलय् अभिव्यक्त जूगु व दृष्टान्त व प्रतीक जाःगु अनुभूति व उकियागु शैली प्रभाव-
कारी व नूकथंयागु जूवःगु दु । अस्वाभाविक मखु, थुगु सिलसिलाय् छुं खं प्रभावित
जुयाः वा मजुसें नं, तःगुमछि दृष्टान्त तःगुमछि प्रतीक स्वात्तुस्वानाः वयाः तःगुमछि
किसिमं प्रयुक्त जुयाः भावाभिव्यक्त जुइबलय् वयकःयागु कविता गुलिसिगु लागि
क्लिष्ट व अस्पष्ट जू वनी अलय् गुलिसितं मूल विषय हे तापाक्क च्वंगु न्ह्याय्मदुगु
थें, लकय्हेने मफुगु थें जू वनी । तर थ्व कविता-धारा हे थुजोगु गुकियागु आधार
खालि संवेदनशीलता जक मजुसें चिन्तनशीलता नं उत्तिकं हे ववात्तुक जुयाच्चंगु
जुइ । उगु अवस्थाय् उत्तिकं संवेदनशील व चिन्तनशील जुयाः उत्तिकं बा-खँ मा-खँ
लिसे परिचित मजुपिनिगु लागि थ्व धारा सहजं संप्रेषणीय नं जुइमखु, (इमिगु
लागि व्याख्या व टीकायागु आवश्यक जुयाच्चनी) । उकि थ्वं अभिव्यक्त याइगु
भाव, विचार व अनुभूतिया स्वरूप छुं स्थूल वा सहज रूपगु जुयाः (मिहगः मिहगः
यागु कविता-धाराय् अभ्यस्त जुयाच्चपिनिगु लागि) अनुभवगम्य मजुसे छुं मूढम
वा अमूर्त धैथें जुयाः अव्यक्त प्रकारं जक स्पर्श याइगु जुयाच्चनी । कारण थ्व
हे खः वयकःयागु कविता नं गुगुं, गुलि व्वमियागु लागि, आपाः खँ आपाः
किसिमं धयाः स्पष्ट याय्गु लोभ संवरण याय् मफयाः म्वाय्कं ताःहाकः जूगु
अलय् म्वाय्कं अनेक प्रतीक व दृष्टान्तं छायाय्गु हाकनं थाय्थासय् व हे छता
जक खँ लिसा लिसा कयाः वइच्चं थें नं ताःवइ । तर अति हे भावुक जुयाः व हे
छगू जक खँ मनय् वात्तुवाका जुइगु प्रवृत्ति नं अथे जूगु खय्फु । अथे खःसां,
थःम्हं थ्व हे खः धकाः वाचाय्थुंगु खँयात स्थापना यानाः वयनाबीगुभनं, छगू
हे मूलगु छथोखलय् घाय्गु यानाः विषयगत हिसाबं स्वःस्वःगु कवितात छथाय्
मुनाहयाः तषाव्यूगु जुसेलि व हे छगू मुनाया आधारय् कविता सम्पूर्ण स्वरूप थ्व
हे खः धकाः तय्जु यायेगु नं छिगु खँ मखु ।

न्ह्यागु थजु, थौया 'विस्थापित' पुस्ताया छम्ह चेतनशील कवि जुयाः

‘स्थापित’ मनूया प्रतिबिम्ब प्रतिस्थापना याय्गुली आनन्द जोशी गावक न्ह्याःवना-
दीगु दु । विश्वजनीन भावनायात स्थानीय परिवेशय् लवइकथं सार्वजनीन स्वरूपय् दुत
हयाः नेपाल भाषाया काव्य-विधाया स्वाप् विश्वया अन्य भाषाया काव्य-विधालिसे
हनेगु वय्कःपालें उत्थें हे न्ह्यथने बहुगु ज्या नं जू वंगु दु । म्हिगःतकयागु रोमानी
शिल्प व शैलीया थासय् थौंयागु वस्तुगत तथ्य ध्वाःगु चातुर्य व प्रविधियात वः
बियाः छत्वाथः च्वय् थकाय्गु ज्या नं जू वंगु दु । थुगु अर्थय् वय्कःया विस्थापित
जि- ‘जि’ मखु नेपाल भाषाया काव्य-चेतय् छगु सीमा-स्तम्भ जूवःगु दु—थ्व
अवश्य खः ।

५

ने. सं. ११०१, साल ।

ने. सं. ११०२ न्हू दँया लसताय्

व्यावक ग्राहकपित

— भित्तुना —

छिकपिन्त माःगु तक विदेशी सामानत

माःसा जिमिथाय् कासँ ।

विशाल बजार व्यापारी संघ

विशाल बजार, येँ ।

ने. सं. ११०२ न्हू दँया लसताय्

— भित्तुना —

सिँया बुत्ता कियातःगु झ्याः, तिकिझ्याः, चौकोस, लुखाया

खापा व उपहारयोग्य छिकपिनिगु मनं तुनादीथें जाःगु

काठकलां जाःगु सामानत माःसा जिमिथाय् कासँ !

पूर्ण उड कार्भिङ्ग इण्डष्ट्रिज

पाटन औद्योगिक क्षेत्र, यल ।

फो. ल्याः - २१४३४

(११८)

❀ खेखुइताः ❀

मोहनि बल ला थें

पुष्पराज राजकर्णिकार

गुंलाया ककु मोय्थ्याना, जंला बल

सुथ नुनेथें खसुया आक्रमण जुल

लूजः पियाच्वंगु नुगलय् घाः लात

जि ख्वय् मास्ति बल ।

खसुं यक्व फुइँ या

आखिर थ्व मोहनिया सन्देश मखा

अहा ! मोहनि वइगु जुल, मोहनि वइगु जुल

ख्वय्गु लोमंका जि लय्ताय् माःगु जुल ।

मोहनि वइ

सी काय् दइ

सर्गः यच्चुसे च्वनी

मचात, भुतुभाली तया थःत ब्वय्का च्वनी ।

अहा, गुलि ल्हाइपुसे च्वनीगु थें

मोहनि गबले वइगु थें

मोहनि गबले वइगु थें

❀ खेखुइताः ❀

(११९)

थम्हं थःत हे मालाचवनाबलय्

- सुदन खुसः

थःगु हे बिश्वासं थःत हे पत्तिचिक वपलेधुंकाः

जि थम्हं थःत हे छकः

वात्तुवालाः माला चवनाबलय्

अभावया गुगुं हूलय्

कात्तुकाक्क

सुयां मय्क-घच्यायापुक्क

पित्याः व मछि ब्वयाः

कवंचां थें

ताः ताः बपिक्वैय् सीदय्क

ततःसलं हालाच्वंगु खः ।

जाय्क ह्यय् धृणा व अपमानत इकाः

थिग्रिग दनाच्वंगु खना

थम्हं थःत अन !

थथे थम्हं थःतहे ह्यमसियावगु

जिन्दगीया त्वःधूगु तुतां चुयाः

गथे ब्वया जुयाच्वने फइ

प्रत्येकया मिस्त्रा न्होने न्होने

विश्वासया सकट थ्व इलय्

हिइमिइ जक चाचां गुलि न्ह्याका चवनेफइ

जि थःत अन

थ्व हत्तिक सासः कुनातःगु काठमाडौंया क्यालेण्डर दुने

थ्व ध्याप्प गति पनातःगु

क्यालेण्डरया काठमाडौं दुने !

○

छन्द : छगू तर्क

- नर्मदेश्वर प्रधान

वात्थें छन्द कीगु सम्पूर्ण जीवनया छगू अनिवार्य तत्व धाःसां अत्युक्ति जुइमखु । म्हया छुं अङ्ग जक संसां, म्हतुं सःजक पिहाँ वःसां अथवा नं मवासे नुगलं बिचाः जक याःसां नं की छुं नं छुं छन्दय् लाना हे च्वनी । छुं नं छुं लय वा छुं नं छुं ताल बिना गुगुं शारारिक, मानविक वा ध्वन्यात्मक गतिया अनुमान तक नं याय्फै मखु । पाइगु खँ गुलि धाःसा गुगुं छन्द नियमित जुया च्वंसा गुगुं अनियमित जुया च्वनी । गुगुं गतिया न्ह्याः वनिगु पहः खास खास नियमकथं जूसा व नियमित जुइ । अले गुगुं थथे हे वैगु नियमयात च्यूताः मतसे न्ह्यां वनेगु गतिया पहःयात अनियमित घाइ । निगुलि कथंया गतिया नं लय, ताल दया च्वनी । तर नियमित गतिया नियमित ताल व लय दया च्वंसा अनियमित गतिया ताल व लय नं अनियमित जुया च्वनी । खः, गुबलें गुबलें साहित्यय् छन्द धकाः नियमित छन्दयात जक न्ह्यथनेगु चलन दु । तर छन्दया अर्थ लय, ताल खःसा नियमित छन्दयात जक छन्द धकाः धाय् फैमखु । कारण च्वय् धैथें पहःचहलय् पाःसां नियमित व अनियमित गुगुं नं गतिसं थःथःगु कथंया लय व ताल दया च्वनी । थुगु अर्थय् नियमित व अनियमित निगूयात नं छन्द धकाः नाना काय् फु ।

भाषाय् छचलिगु ध्वनि मूलरूपं छगू तरङ्ग खः । कीसं बिभिन्न आखः- भवः न्ह्यथनेबलय् नं बिभिन्न कथंया ध्वनिया तरङ्गत पिज्वया च्वनी । फुक्क आखः- भवःया उच्चारणया मूल स्वरूप ध्वनि तरङ्ग (Sound wave) खया नं फुक्क आखःभवःया उच्चारणं पिहाँ वैगु ध्वनि तरङ्ग समान जुइमखु ! आखःभवः पाःलिस्य इमिगु ध्वनि तरङ्गया स्वभाव नं पाना च्वनी । गुगुं आखःयात ह्रस्वकथं उच्चारण याय्बलय् व दीर्घकथं उच्चारण याय्बलय् नं इमिगु ध्वनि तरङ्गय् पाःगु

खन्यदै । श्व ध्वनितरङ्गया पहचह गय् गुकथंया जुइ वैगु खँ Oscillograph यन्त्र छयला स्वःसा स्पष्ट जुइ । ध्वनिया गतिया बिकाश गुगुं निश्चित कथंया नियमितताय् च्वनकि उकि छगु नियमित लय व ताल (Rhythim) कथनी गुकियात नियमित छन्द धाय्फै । तर गुगुं 'नियमितताय्' मच्चसे भाषाय् थ्वैगु ध्वनिया तरङ्ग न्हावनकि वं अनियमित छन्द सिर्जना याइ । थुगु कथं भाषा-ध्वनिसं खन्यदैगु नियमितता वा अनियमितता ध्वनिव्यवस्थासं (Sound System) खन्यदैगु ध्वनि न्हावनिगु थीथी पह खः । श्व नियमितता वा अनियमितता ध्वनि प्रकृयासं खन्यदैगु निथी पहल्य् गुगु बांलाः, गुगु यैपुस्य च्वनि धैगु न्हासः वय्फु । खः, ध्वनि विज्ञानं सःया तरङ्ग व थ्वया न्हां वनिगु पहःचहया अध्ययन याइ, सःया तरङ्ग न्हां वना च्वंगु पह नियमित वा अनियमित गुगु खः कथना बी । तर श्व थथ्य जुलकि बांलाः वा अथ्य जुल कि बांमलाः धैगु खँ क्वःछीगु सौन्दर्यशास्त्रया ज्या खः, ध्वनि विज्ञानं श्व खँ धाइमखु । श्व बांलाः व बांमलाः थकाः बिचाः थकाः बिचाः प्वंक्यगु सौन्दर्यप्रति मनुया लुया वःगु चेतनाया विकाश लिस्सेंतिनि खः । हनं सौन्दर्यप्रतिया गुगुं मापदण्ड नं साश्वत वा सर्वकालिन जुइमखु । मनु वा ई ह्यूलिस्ये थुकी ह्युपाः वय्फु । गुगुं इलय् वा सुनानं 'नियमितताय्' सौन्दर्यया लिधंसा खंक्य फु । नियमिततायात सौन्दर्यशास्त्रया वः ताय्का नृत्यकला, सङ्गित शास्त्र अनेकसं शास्त्रीय नियमत छयलातःगु नं गावकं महुगु मखु । अथे हे काव्य रचनाय् खन्य-दैगु अनेक नियमित छन्दत नं नियमितता प्रतिया क्वात्तुगु अनुरागया छुमां खः ! तर थौकन्हे न्हून्हुगु कविताय्, न्हून्हुगु प्याखं हुल्यगु पहल्य् अनियमित छन्द नं दुहाँ वय् थुक्कुगु दु । मने लूथे योयोथे सनां प्याखं ल्हुया नं थौं आनन्द कयाच्चपि दु, सौन्दर्यया अनुभव याना च्वपि दु । कविताय् नं थःगु मनय् लूगु भावयात स्वच्छन्द कथं पिब्वय्गु लच्य तथा नियमित छन्दयात हाकुतिना वांछ्वय्गु अभियान नं वय् थुक्कुगु दु । नियमित छन्दय् च्वय्गु अव्यावहारिक ताय्का थौं मुक्त शैली च्वय्गु चलन न्यना वैच्वंगु दु । उकि सुनानं नियमित छन्दयात हे जक सौन्दर्य, संगीतया मुक्कं लिधंसा खंकाः अनियमित शैलियात हिस्साय्त्त स्वःसा व फजूल जुइ । सौन्दर्यानुभूतिया साश्वत व वस्तुगत लिधंसा नत 'नियमितता' हे खः न 'अनियमितता' हे । नियमितता स्वैतं अथवा गुबले सौन्दर्यया कारण जू वने फुसा अनियमितता नं गुबले सौन्दर्यया आधारशीला जू वय्फु । सौन्दर्य धैगु छगु मानविद्य धारणा खः, मानविद्य मान्यता खः, मानविद्य दृष्टिकोण खः । निय-मितता वा अनियमितताया गुगुं देवीय वा प्राकृतिक आधार थ्वया (सौन्दर्यया)

दैमखु । सौन्दर्यया चस्मा छुनां प्रकृति न नियमितताया पक्षपाति जुइ, न अनिय-मितताया । नियमितता वा अनियमितता ध्वनि प्रवाहया थीथी पह जक खः । बांलाः वा बांमलाःया मिखां स्वय्गु श्व मनुया ज्या खः । तर मनुया मिखां स्वय्गु दृष्टि नं व्यक्ति पाःलिस्य वा युग पाःलिस्य पाना वने फु, हिला वने फु । नियमितताय् सुनानं आनन्द व सौन्दर्य खंकसा अनियमितता दुने थ्वयाच्चनिगु थःगु हे पहया लय्, ताल दुने नं सुनां नं सौन्दर्य व आनन्द खंके फु । तर थथ्य जुल धाय्वं स्वैतं अकलात्मक थका नागःतुगः याय्गु थाय् दैमखु ।

हनं थौं श्व धापू खन्य दु कि "नियमित छन्द मज्यू, थुकें स्वतन्त्र भावाभिव्यक्तिवात पने फु । छन्दयात च्यूताः तथा च्वैतले थःगु मौलिक भाव सीफु, स्यने फु । अर्थात् नियमित छन्दया च्यः जुलकि थःगु नुगलय् लुया वःगु भावयात स्वाभाविक कथं प्वंके मफय्फु, फलस्वरूप भावाभिव्यक्ति कृत्रिम जुइ फु । उकि भावाभिव्यक्तिसं स्वाभाविकता हय्गु खःसा थ्वैत नियमित छन्दय् चिनां मखु, बरु स्वच्छन्द धाय्माः ।" पिनें स्वय्बल्य् श्व धापू पाय्छि खन्य दु । छन्दय् चिनातःगु चिनाखँ स्वच्छन्द चिनाखँ स्वयाः कृत्रिम खने दः वय्फु । तर स्वाभाविकता व अस्वाभाविकता धैगु छन्द व अछन्दया खँ मखु धैगु खँ बांलाक बिचाः याना स्वःसा सी दै । धाय्वे धाय्गु खःसा स्वाभाविकता व अस्वा-भाविकता धैगु च्वमिया थःगु चिन्तन, मनन, संस्कार व प्रतिभाया खँ खः । मनुखं टाइप स्यनी । ह्यापां वया टाइप याइगु पहल्य् छुं स्वाभाविकता दैमखु, नियमितता नं दैमखु । तर अभ्यासं यानां वं टाइप याइगु संस्कार थुकथं ग्रहण याना हइ कि बुलुहुं बुलुहुं टाइप धाय्गु पहल्य् वं स्वाभाविकता आर्जन याइ । थुकथं अभ्याश व संस्कार क्वात्तुया वःलिस्य टाइप याइमहं चाय्क कुतः मयासे हे थःगु टङ्कन कलाय् स्वाभाविकता हय् सफल जुइ । वया ह्याः वसय् जू लिस्य वं चाय्कं स्यंकेत स्वःसां वा अनियमितकथं धाय्त्त स्वःसां अःखः मचाय्क हे भिना-च्वनी । अथे हे हामोँनियम थाइपिसं नं दृश्यर मेपिलिस्य खँह्यावह्या याना मेख्यरं थःगु हामोँनियमय् म्येया धुन थाय् फयाच्चनी । थाइमहस्यां हामोँनियमया पर्दां पिहाँ वइगु सःयात थःगु संस्कार लिस्य थुलि सत्तिके धुंकी कि कुतः मयासे, वा चाय्क बिचाः धाय् म्वाक हे वं थःमहं मनं तुनागु धुन हामोँनियमं पिकाय् फैच्वनि । गुकी अरु गावक स्वाभाविकता नं दया च्वनी । सुं मनुखं मांया प्वाथं निसें टाइप सय्का दैमखु, हामोँनियम सय्का दैमखु, इमिसं आर्जन याइगु जमता, जां, व स्वाभाविकता जन्मसिद्ध मखु । सःस्यूमह कलाकारया बाद्यवादन

वा टङ्कन किलाय् नियमत लय्, ताल, छन्द दया हे नं स्वाभाविकता दया च्वनी । कृत्रिमता खने दै मखु, स्वच्छन्दता पिज्जया च्वनी । उकि स्वच्छन्दता वा स्वाभाविकता धैगु छु ? थ्व फुक्क दैवीय् ला ? जन्मजात ला ? थ्वैत मनुखं विकास याय् फै मखुला ? मनुखं संसारय् वय्, धुंकाः सय्कूगु सीकूगु क्रियाकलाप, आचरणय् खन्यदैगु गुलिखे स्वाभाविकता व स्वच्छन्दता वास्तवय् मानव आर्जित (acquired) खः । स्वच्छन्दता व स्वाभाविकता धैगु गुगु खँयात थःगु संस्कार, चिन्तन मनन लिख्य एकिकृत याय्गु अभ्यास खः, कला खः, निपुणता खः । थुमित बांलाक थ्वीकाः, सीका थःगु याय् फतकि व बुंगाःचां वःगु लःथें स्वतः वय् फु ।

छन्दय् हना स्वयानं सिद्धिचरणया कविताय्, चित्तधरया कविताय् स्वयाः अप्वः स्वच्छन्द व स्वाभाविक अभिव्यक्ति अनुभव जुइफु । धात्ये छन्द हे पूरापूर स्वच्छन्दताया पङ्कल खःसा सिद्धिचरण व चित्तधर निम्हस्यां छन्दोवध कविता उतिकं हे कृत्रिम व अस्वाभाविक जुइ माःगु खः । उकि स्वैगु चिनाखें अस्वच्छन्द व अस्वाभाविक जूवनेवं हे सम्पूर्णं द्रुपं स्वतः छन्दया जू वने माः धैगु मदु । अभिव्यक्ती खनेदैगु अस्वच्छन्दता व कृत्रिमता सदां छन्दया कारणं हे जुइ धकाः छन्दयात मुक्कं कुं खिना छ्वय्गु छन्दयात बलिया दुगुचा याय्गु बरोबर जुइ । अभिव्यक्ती खनेदैगु स्वच्छन्दता व स्वाभाविकता छन्द व अछन्दया कारणं मखु वला कवियाके प्रतिभा, संस्कार, जीवन-जगत प्रतिया गहन चिन्तन, मनन व अभिव्यक्ति इत्यादिघात थःगु याना स्वय्गु अभ्यास, चमता, जां, संस्कार गुलि दु मदुया खँ खः । भाषा, शब्द, भाव बिचाः लिख्य आत्मीयता स्वना अनेक कथं मिहते सय्धुं कूम्हस्यां च्वसु न्हाथे याना च्वःसां स्वाभाविक व स्वच्छन्द खने दया च्वनी । शब्द, भाषा, भाव, बिचाः लिखे थःत आत्मसात याय् मफुम्हं न्हावव छन्दया नियम दुने मच्चसैं स्वतन्त्र शैली छ्वःसां स्वच्छन्दता व स्वाभाविकता क्यने फेमखु, न्हावव मूवत शैलि छ्वःसां उकी कृत्रिमताया नैं ताय् दया हे च्वनी । तर न्हाथें ज्याःगु नियमित छन्द छाय् मज्जीमा, उकियात थःगु संस्कार अंगीकार याना सुनानं छ्वल्य फुसा उके स्वाभाविकता व स्वच्छन्दतां खने मदै धकाः धाय् फेमखु । प्रतिभाशाली च्वमिपिस छन्दय् च्वया हे नं खुसिसं न्हायाना च्वंगु लःथें सुगम व स्वच्छन्द कथं थःगु भाव बिचाः प्वकय् मफै धाय् फेमखु ।

च्वय्या धापू छन्दयात च्वछाय्गु व अछन्दयात क्वफाय्गु उद्देश्यं प्रेरित मखु । बरु खः स्वच्छन्दता व स्वाभाविकता धैगु नं छन्दय् भङ्ग जुइगु खः, न अछन्द ल्वीगु हे खः धैगु तर्क । भाव व भाषायात दुय्यक दुने थःगु नुगःया हिं प्याके फुसा स्वच्छन्दता व स्वाभाविकता धैगु स्वतः खनेदैगु लच्छणत खः । छन्दय् जुइमा वा अछन्दय् जुइमा थःगु नुगः व संस्कार लिखे छधी यानाः म्यले पुंके मफुसा गुगु नं अभिव्यक्ति कृत्रिम जुइ, अस्वाभाविक जुइ, अस्वच्छन्द जुइ । अथे हे नुगः व थःगु संस्कार लिखे छपू व छधी याना छ्वय्फत कि छन्द व अछन्द गुगु हे नं अकृत्रिम जुइ, स्वाभाविक जुइ, स्वच्छन्द जुइ ।

छन्द पिनेया धकि जक खः, थ्वया दुनेया भाव बिचाः लिखे आत्मीय स्वापू दैमखु, थ्व मात्र औपचारिकता खः, दुनेया भाव बिचाःयात अङ्गभङ्ग यानाः, तोडमोड यानाः पिनेया दवावया रूपय् छन्द खनेदै धैगु विश्वास च्वनीपि नं दै । खः छन्दयात पिनेया दवाव, औपचारिकता कथं छ्वलीपि नं मदै धकाः धाय् फेमखु । दुने नुगःया भावयात तोडमोड यानाः जबरजस्ति छ्वला तःगु छन्द जरूर वाह्य खने दै च्वनी । तर छन्द व नुगलय् लुयावःगु भाव बिचाः लिखे क्वात्तुगु स्वाभाविक स्वापू खने फुसा व सदां वाह्य व द्योनें द्योनेंया जक जुइ धैगु खँ मदु । दुने नुगःया भाव बिचाःया लय् व पिनेया छन्द दखी समन्वय व सामञ्जस्यता स्थापना याय् फुसा छन्द मात्र दवाव मज्जसे, मात्र औपचारिकता मज्जसे भाव बिचाःयात अछ अपा छलंङ्ग व्वय्गु “ह्वायक” हे जुइफु । छपू नं छपू संवेगावस्था (Emotional) लाना च्वनीगु कीगु मनस्थितिया नं छपू प्रकारया गति दया च्वनी, तरङ्ग दयाच्वनी । व गतिया नं न्हाइगु पहः दयाच्वनी, लय् दयाच्वनी, छन्द दयाच्वनी । मनू सुम्क च्वनी बलय् नं वया नुगलय् भाव बिचाः या प्रवाह न्हावना च्वने फु । सामान्य वा शान्त मनस्थिति कीगु नुगःया गतिया न्हाइगु पह छपू जूसा आवेगावस्थाय् मेगु हे जुया च्वनी । थुकथं कीगु भाव बिचारया न्हाइगु पहलय् नं आरोह दै, अवरोह दै, उत्तार चढाव दयाच्वनी । अर्थात् नियमित जुइव्यु वा अनियमित जुइव्यु न्हाइगु पहलय् छपू लय् दै, ताल दैच्वनी । शान्त रसानुभूति जुइबलय् मनूया मनस्थितिया गतिया ढङ्ग व रौद्र वा मेमेगु रसानुभूति जुइबलय् मनूया मनस्थितिया गति पाना च्वनि । मनूया लय्ता वै बलय् खँह्लावह्लाय् पिहांवइगु वाकवनिचा पह छन्द व लय् तं वैबलय्ता खँह्ला वह्लाया वाकवनिचा पह, छन्द व लय् लिख्य पाना च्वनि । थुकथं थ्व स्पष्ट जुइ कि मनूया थःगु नुगःया नं थःगु हे मानसिक छन्द वा लय् (Psychological

Raytheim) दयाचर्चि । मनुष्या मानसिक छन्दलिस्य सामञ्जस्य वा समन्वय याय् मफुगु पिनेया छन्द कृत्रिम जुइ, मात्र दवाव थें खने दै । नियमित छन्द जक मखु स्वतन्त्र छन्द नं यदि मानसिक छन्द लिस्य समन्वय वा काय्म याय् मफुत कि वनं छगु दवाव हे जक सिद्ध जुइ । भाव बिचाः व छन्दया मर्म बांलाक थुम्ह सःस्युम्ह कविपिसं भाव, बिचाः व थम्हं छयलाच्चंगु गुगुं नं छन्द-यात छगुलि मेगुली बांलाक धाले याय् फैं च्वनि । कुशल कवि छयलिगु छन्द पिनेया वसा जक मजुसे उकी वं बिभिन्न भाव बिचाःयात अरु अप्पो स्पष्ट व मर्मस्पर्शी याय् सफल जुया च्वनि । थी थी छन्द छयला नं उकिया माध्यमं थीथी भावया रसानुभूति याके भाव बिचाः व छन्दया मर्म थुपि कविपि बांलाक सैच्वनि । नुगःया करुणा भावतयत्त मर्मज्ञ कविपिनि ह्लाती च्वंगु छन्द अरु अप्पो करुणातम याय्फैं च्वनि । वीर रसं जाःगु भावयात अज्यागु हे पाय्छिगु छन्द छयला निपुणम्ह कवि अरु अप्पः जोश तने फैंच्वनि । उकि छन्द सदां बन्धन मखु, वसा मखु, दवाव मखु शब्द, भाषा, भाव बिचाः या लय् सुर तालया मर्म श्वीका इमि थीथी सामञ्जस्य व समन्वय थना अनेककथं मिहेतुपि प्रतिभाशाली कबिया च्वसुइ छन्द व भाव छगु हे पाय् मोहया निरव्यया खापा (Two Faces of the Same Coin) जुया थिनां च्वनि ।

धापुया तात्पर्य खः च्वसुइ बन्धन वा मुक्ति, स्वाभाविकता वा कृत्रिमताया मूलभूत कारण छन्द व अछन्द मखु । छन्द दुने नं भाव बिचारं मुक्ति व स्वच्छन्दताया सासः ह्याय् फु यदि छयःगु छन्द व भाव बिचारयात छगु समन्व-यात्मक संस्कारं प्याके फुसा । अथे हे स्वतन्त्र शैलि नं कयकुना भाव बिचाः मुक्तकथं प्वव्यत संकिर्ण जुइफु यदि भाव व अभिव्यक्ति दश्वी च्वमि गुगुं आत्मीयता ह्य् मफुसा । भाव बिचाः व भाषाया लय् प्रति दुग्यंगु संस्कार गावक दुम्ह अले इमि दश्वी आत्मीयता मनन याय्फुम्ह च्वमि थःगु च्वसुइ सदां मुक्त भावाभिव्यक्ति कयने फैंच्वनि, स्वाभाविकता थने फैं च्वनि चाहे व छन्य च्वय् मा वा अछन्दय् ।

५

चवखँ

गेटअप

— फणीन्द्ररत्न बज्राचार्य

बांमलात कि मामं थः मचायात व काय्-म्याय्पिसं थः मांयात ला नाले मछाले थो धाःसा गेटअप मदुगु सफू सुया जक स्वय् यइ ? गेटअप मदुगु सफू म्हय् वसः मदुम्ह मनु थें खः । वय् हे मछालापुसे च्वं । थुलि साधारण खँ नं मनुइकुसे बिना गेटअपया सफू पिकाः जुइपि लेखक व प्रकाशकत नं पाठकतय् मनोविज्ञान मथूपि ध्वादःत हे खः । दुने यगु थजु पिने सफूया खापाः नि कःकः धासे जिगिजिगि बांलाय्माः । गेटअपयात भाजु जातियागु किपा नं उलि चित्ता-कर्षक जुइ मखु गुलि मयजु जातियागु किपा जुइ । मयजु धाल कि ल्यासेम्ह व ल्वः वनापुसे च्वंम्ह धकाः ला धाय् हे माःगु मखु । खुया-पुया छु खँ, ध्व सफूया खँ जक मखु वासः थलनिसें कयाः न्हागु चीजया नं लेबिल स्वयादिसें उकी आपा यानाः सुन्दरी रमणीयागु हे किपा दया च्वनी । छि सिनेमा, रेडियो नेपाल व मेमेगु नं देशया विज्ञापन न्यना स्वया व वना दीगु ला द हे दइ ।

थौया ध्व फिलिमिल संसारय् गेटअप माःगु सफू वय्बह जुइकेत व जुइकेत जक मखु । न्हागु चेत्रय् स्वसां गेटअप हे माः । थःगु छयगु न्हाथे बांलाःसां मज्यू थौकल्लय्था सुन्दरीतयत्त । खालय् तुइक म्हासुक ह्याउँक पांला-पाला थ्यावक क्रीमं बुइमाः, म्हुतुसिइ लाली ह्याउँक जुइक छीमाः, मिखा फुसिइ हाकुक सुरमां उलेमाः, मिखावःया पिने वाउँसे च्वंक रंगं पाय्माः, न्हाथे याना नं प्राकृतिक सौन्दर्ययात त्वपुया कृत्रिम शृंगारं कःकः धाय्केमाः । अलय् जक आधुनिक भद्र महिलाया तँय् थ्यनी मखुसा उमेरं ल्यासेसां फेशनया अभावं अजि बज्ये धाय् ल्वइ । बज्ये भाय् ल्वःम्हसिगु किपा सुयां स्वय् यइमखु । उकि थौकल्लय्था कालयात गेटअप हे माः, मेकअप हे माः । मिखा कानं भवय् खं, वसः कानं भवय् मखं धया थें गेटअप मदुगु सफू व मेकअप मदुम्ह मिसा ध्याववय् लिक्वय् सुला च्वने माली ।